






*c. tabula.*


16,006.

Uf. 5262.


40



Uf 5262











# Denominatio locorum in hac *synographia* confignatorum.

1. Civitas Rigenfis.
2. Arx Rigenfis cum munitione inferiori recenrer ad Dunam extructa.
3. Propugnaculum angulare circa portam Lanionum.
4. Propugnaculum angulare verfus Arcem.
5. Propugnaculum Iacobum cum Loricis inferioribus.
6. Loricæ five munitiones inferiores ad bafin Valli longioris inter Iacobinum & arenarium propugnaculum unâ cum aggere interfecto & portâ, disruptâ.
7. Turris arenaria ruinis deformata.
8. Propugnaculum angulare arenarium cum Semilunio seu hemicyclo nec non binis ejusdem aggeribus interfectis & cuniculis contrariis.
9. Repagulum Pomarii exterioris ante portam arenariam.
10. Claustra portæ interioris arenariæ difjectæ.
11. Propugnaculum angulare ad portam Novam dictam.
12. Propugnaculum angulare ad balneas.
13. Propugnaculum angulare portæ Equileæ.
14. Hemicyclus ante repagulum pomarii exterioris portæ Equileæ, unâ cum aggere interiori interfecto.
15. Palus concamerata influens intra pomærium valli Equilei.
16. Portæ Septem verfus Dunam publicæ.
17. Munimentum ad forum halecum, itemque ad forum aquarum portæ Balfamentariæ.
18. Offium Dunæ fluminis five Portus, in quo claffis 160. Naviû.
19. Arx Dunamundefi.
20. Munimentum & Castra ad Mühlgrabium.
21. Pafcuæ Civitatis publicæ.
22. Castra Regiæ Majestatis.
23. Stativa Ducis Exercituum Generalis.
24. Stativa Marefcalci Campeftris in prædio Hintziano.
25. Foffæ & aggeres minores per Montes arenofos fparfim ducti ferè ad rivum ubi tormenta expofita funt.
26. Fornax calcaria.
27. Munimentum tormentarium, Battoria dictum in horto Wittiano, è quo turris Arenaria ferè tota convulfa eft.
28. Munimentum poft templum Divæ Gertrudis.
29. Munimentum & Stativa Tribunalis Siftonis circa Molam alatam.
30. Stativa Iohannis Henrici penes Xenodochium Dvi Georgii.
31. Foffæ hoftiles annuæ ad ipfas ufque Civitatis foffas ductæ.
32. Decem munimenta tormentaria fuper Molendino aquario hortisq; & ædibus prope ipfas Civitatis foffas fitis, è quibus propugnacula angularia, Iacobæum, arenarium, & ad Novam portam itemque Munitiones eorundem laterales valde conquaffata funt.
33. Tria munimenta ante pomærium portæ arenariæ, in quibz Mortaria ignivoma polita lapides 160. pondo ejaculata funt.
34. Foffa fub tecto à Molendino arenario ad hemicyclum ufque ducta.
35. Pons virgultis conftitutus fuper foffam Civitatis, hemicyclo junctus.
36. Pons quaquam verfum tectus & foffæ aquariæ Civitatis ad ipfum ufque propugnaculum Dvi Iacobi inferius fuperinductus, fuper quo Tribunalis Sifton impetum in Rigenfes fecit.
37. Foffa, per quam aqua è foffa Civitatis derivata eft.
38. Triremes, navigia, ac Cymbæ Civitatis.
39. Infula è regione Arcis fita, in qua 7. militum figna primos aggeres jacere conati funt.
40. Triumebimus, quædam alacea ufulata, altera in prædam ducta eft.
41. Munimentum trans Dunam geminum penes prædium Dvi Georgii.
42. Caftellum five fortalitium in Infula Saggeriana.
43. Caftellum in Infula Ebbiana.
44. Caftellum in Infula Iefuitarum Duvelsholm dicta.
45. Caftellum five Munimentum penes turrim antiquam trans Dunam ubi Stativa Tribunalis Kobronis.
46. Turris antiqua trans Dunam.
47. Molendinum trans Dunam.
48. Pugna velitaris cum Polonis.
49. Caftellum fuper Infula Meifterholm dicta.
50. Caftellum in Infula Fidericiana.
51. Pontes quorum beneficio Caftella ea infularia contignata funt &c.

Excufa operâ & impenfis Nicolai Mollini Typographi RIGENSIS.



De expugnatione  
**CIVITATIS RIGENSIS**  
**LIVONIAE METROPOLIS**

*Quam*

Serenissimus Svecorum Gottorum. & Vandalorum &c. &c. REX, GUSTAVVS ADOLPHVS  
Calendis Augusti Anno proximè elapso 1621. infestis armis ipse oppugnatum venit, & terrâ marique 13. Augusti undique cinctam, ad  
deditionem tandem 16. Septembris facientem compulit.

Loco Relationis verissimæ.  
**EPISTOLÆ IIII.**

In quarum { primâ ad Sereniss. Poloniae Regem } à Spectab. Senatu scriptis, obsi-  
& { secundâ ad Illust. Ducem Campe- } dionis illius & inevitabilis de-  
stræ Mag. Duc. Lithvaniae Dñ. Chri- { ditionis necessitas eisdem verè  
stophorû Radziwilum Princ. R. I. } accurateq; explicantur.

Ex tertiâ verò responsi loco ab eodem M. D. Lithvaniae Campiductore in impro-  
perium Spblis Senatus scriptâ, quasi deditio ea, nullâ cogente gravi ne-  
cessitate, præcipiti saltem metu facta sit,

Quarta tandem nata est Apologetica Spblis Senatûs, in quâ factæ deditiois ratio  
expedita redditur.

Latino & Germanico idiomate in gratiâ veritatis amantium in lucē editæ.

Daniel 5. cap.

Potestatem habet altissimus in Regno hominum, & quemcunq; volueris suscitabis  
super illud.

Seneca Epistol. 91.

Nihil publicè stabile est; tam hominum quam Urbium fata voluntur.

Lips. 1. de Constant. cap. 16.

O mira & nunquam comprehensa Necessitatis lex!

Cum Grat. & Privil. Ser. Reg. Majest. Sveciæ ne à quoquam imprimantur.

Excusæ Rigæ per Nicolatum Mollinum Typographum

Anno Domini M. DC. XXII.





606254

Illust<sup>mo</sup> Principi ac D<sup>no</sup> D<sup>no</sup> Christophoro  
Radziwvil, Duci Birzarum, & Dubinkorum, Sac. Rom.  
Imp. Principi, Mag. Duc. Lithv. Campidustori, nec non Seiven,  
Zysimorien, Bystrzyceñ Polzyrwenliq;  
Capitaneo &c. &c.




Sub exitum fere anni proxime elapsi,  
literas Ill<sup>me</sup> C<sup>dnis</sup> Vre accepimus satis  
aculeatas & injurias, quibus ad no-  
stras antea datas, causas deditiois  
urbis nostra candidè exponentes, ani-  
mo valde commoto & hostili respon-  
det, nobisq; exprobrat, ac si nullà justà de causà victori Ci-  
vitatem dedidissimus, imo gravissimum perfidia crimen  
impingit. Tantas igitur injurias ad animum revocan-  
tes legitimam honoris famèq; nostra defensionem conscri-  
psimus, quam statim C<sup>dnis</sup> Vre t<sup>um</sup> misissimus, nisi in causà  
tàm arduà Sac. Regiæ M<sup>tis</sup> D<sup>ni</sup> nostri clementissimi con-  
sensus nobis fuisset expectandus. Nunc finitâ illâ morâ,  
literas nostras defensorias Ill<sup>me</sup> C<sup>dnis</sup> Vre mittimus, non  
aliud spectantes, quàm ut optimum Civitatis ornamen-  
tum, honoris & existimationis nimirum possessionem,  
virtute partam, virtute conservatam legitimè tueamur,  
Benè valeat Ill<sup>ma</sup> C<sup>do</sup> Vra & necessitati nostra ignoscat.  
Dat. Rige 3. Julii 1622.

Proconsules Consulesq; Regiæ  
Civitatis Rigenlis.

Lector





*Lector benevole,*

**U**m deditioem, quam in autumno anni proxime præteriti 1621. Serenissimo & Potentissimo Principi ac Dño Dño GUSTAVO ADOLPHO Svecorum Gothorum & Vandalorum &c. &c. Regi Dño nunc nostro clementissimo ineluctabilis fati necessitas facere nos iussit, præcipiti turpique metu, nullà urgente gravi necessitate factam esse Illustrissimus Dux Campestris Mag. Duc. Lithvaniæ Dñs Christophorus Radziwillus Princeps in opprobrium nostrū objectare nobis non sit veritus; quinimò alibi quoque passim, & in Regno Poloniæ inprimis, iniquā censoriā notā nos perstringi & odiis male feriatorum hominum prægravari compertum habeamus: Aliter facere non potuimus, honoris & famæ nostræ ratione ita exigente, quin seriem rei gestæ & obsidionis faciem nō solum Illustræ Celdni ipsius vivis coloribus depingeremus, verū etiam divulgatis & in lucem publicam editis cū nostris ad Regem Poloniæ & Ducem Exercituum Mag. Duc. Lithvani campestrē itatim ab expugnatione urbis scriptis, tūm contumeliosis quoq; ipsius Celdnis ad nos, & iis quibus honoris nostri vindicias postulamus literis, non aliam nos, quā pietatis & virtutis cynosuram, nec non omnium gentium jura & exempla in hoc negotio secutos esse, toti mundo omnibusque veritatis studiosis testatum redderemus. Vale. Dat. Rigæ die 3. mensis Iulii Anno Domini 1622.

*Proconsules Consulesq; Regia  
Civitatis Rigensis.*

*Literæ*

Literæ Sp. Senatus Rigensis, scriptæ  
Ad Regiam Majest. Poloniæ, Post expugnationem urbis

*Serenissime ac potentissime Princeps, Domine clementissime,*

*Servitia & obsequia nostra promissima cum veneratione.*

**N**on dubitamus Regiam Majest. Vam. auditione jam accepisse, summog; dolore affici, in eam fortunam nos fatali quādam rerum conversione devenisse, quam nec ipsamet R<sup>a</sup> M<sup>tas</sup> Vra unquam credidit, nec nos eventuram aliquando opinati sumus: sed Deus Regnorum & imperiorum terminos constituit ac mutat, pro-ut ei visum fuit; nec humana sagacitati datum est, reconditos divini mysterii recessus perscrutari, qualemcunq; tandem duriciem vel iniquitatem præ se ferre videantur. Meminit R<sup>a</sup> M<sup>tas</sup> Vra in proxime præteritis generalibus Comitibus per nuncios nostros tam publicè quā privatim literis nostris frequentibus periculi magnitudinem à Sueciæ Regno nobis imminentē, nos humillimè ac querulā voce exposuisse. A nonnullis sanè, rem & tempus prudenter pensitantibus fides nobis habita fuit, a nonnullis vicissim derogata, qui vel præoccupati animi affectione vel sinistrā aliorum credulitate & opinione ducti fuerunt. Gavisi tamen fuimus, quod Repub. gravissimo Turcico bello alibi implicatā, R<sup>a</sup> M<sup>tas</sup> Vra partem aliquam sollicitudinis suæ in misc-

*A*

*ram*



ram Livoniam derivare ac perficere dignata fuit, ut  
Illmo Principi, Domino Radzivilo Campiductori Ma-  
gni Duc. Lithvanie cura tuenda Livonia publicâ auto-  
ritate committeretur. Collegerat is mox copias aliquas,  
ut nobis relatum est, sed quæ aliò postea abductæ sint, quod  
non leves autores securitatem Livonia, quocunq; tandem  
animo, pollicerentur. Deinde aures R<sup>e</sup> M<sup>ajest</sup> V<sup>er</sup>ite-  
ratis literis cum fatigaremus, responsum tulimus, Illustri-  
simo D<sup>no</sup> Palatino Vilnensi hanc curam Livonia de-  
fendenda incumbere: quo audito, haud parùm turbati su-  
mus; quippe jam notum erat, eundem Dominum Palati-  
num, ad subeundas Generalis in Poloniâ Ducis vices,  
esse à R<sup>a</sup> Majest. V<sup>ra</sup> in Podoliam evocatum: cui gra-  
vissimo oneri suscipiendo, ut maximè suffecturus sit, ta-  
men Livonia curam cum vix in tantâ rerum mole gerere  
posse, & jure fore excusatum, statuimus: postea iterum  
ad Ill<sup>um</sup> Dominum Campiducem remissi fuimus, cum  
bona pars temporis effluxisset, hostis verò noster summo  
studio ac diligentia ad rem conficiendam pergeret.  
Quamobrem non desistimus deinceps quoque tam R<sup>m</sup>  
M<sup>ajest</sup> V<sup>ram</sup>, quanquam maximis occupationibus di-  
stentam, quàm ipsum Dominum Campiducem, orare,  
interpellare, obsecrare, ut quâ fieri possit, summâ celeri-  
tate, auxiliares copia cogerentur, ac in Livoniam mitte-  
rentur; facile enim & expeditum brevemq; esse e Sve-  
ciâ in Livoniam transitum, qui à nemine presentiri vel  
prenun-

prænunciari queat: itaq; operam dandam esse Domino  
Campiduci, ut prior possessionem campi adipiscatur; sic  
enim multis rebus potior futurus sit, posteriorem verò, ut-  
ut bene instructus armatusq; veniret, multis incommodis  
obnoxium fore. Quamvis autem Dominus Campidux  
ad summam diligentiam nihil reliquum fecisse videatur,  
quo minùs justum exercitum & mature colligeret ac in  
Livoniam duceret: tamen ab hoste tùm nostro diu bellum  
preparante preventus fuit, qui classe suâ instructissimâ  
portum flumensq; Duna mox occupavit, militemq; in  
continentem exposuit, ac post paucos dies, adventantibus  
reliquis copiis terrestri itinere, in urbis conspectum uni-  
versus exercitus prodiit & castra metari cœpit, aggeres,  
fossas, munitionesq; plurimas, admirabili festinatione,  
duxit & firmavit: deinde grandioribus tormentis sum-  
mâ vi ac vehementiâ pinnas munitionum nostrarum ita  
verberavit, ut vix consistendi locus fuerit: Nihilominùs  
animo impavido, quantum omnino per vires nostras li-  
cuit, resistimus & vices reddidimus, ut non pauci in ca-  
stris hostilibus ceciderint. Sanè non parva nos sollicitudo  
curaq; incesserat, quod trecetos tantum milites, licet sum-  
mo studio, in viciniori Germaniâ ac Livoniâ cōquisitos,  
conducere potuimus. Nam Daniæ Rex aliq; Principes  
militem cogētes & amplo stipendio allicientes, magno no-  
bis impedimento fuerunt: in ipsâ verò Livoniâ, armis vi-  
visq; omnino exhaustâ frustra milites conquisiti fuerant.  
Huic tamen malo ut quâcunq; ratione mederemur, equi-



tum praefectos Ceridone[m] & La-Barre, qui Illustrissimo Domino Zamoscio Palatino operam obstrinxerat, sed sero venturus erat, peculiari stipendio conduximus, ut arci in communi periculo praessent: quae res vires nostras distraxit ac labefactavit. Quamvis autem cives nostri militesq[ue], mirâ animorum alacritate, quævis pericula subire non detrectaverint: tamen singulis fere diebus, non paucos fortuna belli absorpsit. Sed spes auxilii à Repub. ferendi animos diu sustentavit, praesertim cum Illustriss. Dominus Campiductor ultra Dunam conspiciendum se praebebat, ac velut hostiles ibidem copias aggressus fuit, quæ tamen vix duodecimam partem exercitus efficiunt, qui, ut ex certissimis autoribus didicimus, nonaginta novem vexilla peditum, equitum viginti & unum, in singula vexilla centum & quinquaginta viris computatis, complectitur. Postea verò quàm à duabus septimanis alioquotq[ue] diebus, ex quo Dominus Campiductor, unam tantum noctem moratus, recesserat, nulla amplior spes suppetiarum affulsit, Civitas autem arctiori indies obsidione premeretur, numerus militum ad dimidiam partem imminueretur, civium quoq[ue] juvenumq[ue] non pauci interiiissent; non ita ex omnibus partibus hosti occurrì potuit, ut voluntas & necessitas nostra requirebat. Igitur propius ad munimenta nostra movens hostis, nocturno tempore ea suffodere cuniculosq[ue] agere ita properavit, ut tribus in locis eos persecerit, longumq[ue] in spaci-  
qua-

quatuordecim nimirum orgyarum diduxerit, suppositis viginti quatuor cadis pulvere nitrato repletis, jam jamq[ue] in aërem cum certissimâ superstantium perire vallum disiecturus erat, nisi feminei sexus & parvulorum misericordia animum oppugnantis subisset. Itaq[ue] omni humani auxilii respectu nobis praefiso, cum ne unus quidem de quingentis illis peditibus, quos Gedano submissum iri R<sup>a</sup> M<sup>as</sup> V<sup>ra</sup> promiserat, compareret, essetq[ue] res ad extremum adducta discrimen, habito cum D<sup>ño</sup> Castellano Venden, alijsq[ue] Nobilibus tum Equitum Praefectis Capitaneisq[ue] rei bellicæ peritis consilio, rem desperatam esse omnibus conclamantibus, in colloquium descendimus; pactiq[ue] incolumitatem uxorum, liberorum, tum omnium jurium ac libertatum nostrarum, in fidem ac ditionem Serenissimi Regis Gustavi Adolphi concessimus. Quà in re admirabilem victoris clementiam & lenitatem satis predicare non possumus, qui summâ moderatione animi hanc fortunam suam superavit, ac nos vivere coëgit; idq[ue] supplicanti-  
bus nobis benignissimè largitus est, ut si intra triennii spaci-  
um pax æquis conditionibus inter utrumq[ue] Regem coiret, cum omni jure & libertate illibatâ, in ditionem Regiæ Majestatis V<sup>re</sup> redeundi nobis potestas sit. Sanctè coram S<sup>a</sup>. R<sup>a</sup>. M<sup>te</sup> V<sup>a</sup> affirmamus, idem coram D<sup>e</sup>i justissimi & omnium Angelorum facie, in ultimâ illâ mundi disquisitione testificaturi, paratissimos nos fuisse, unâ cum uxoribus & liberis omnibusq[ue] fortunis, cer-  
tissimam




tissimam oppetere mortem, si ulla vel laus vel utilitas ad  
 Sm Rm Mm Vm & Rempub. promanare potuisset; nisi  
 quoque pietas erga Deum & fidei nostra commissos, a tam  
 crudeli facinore ac furore nos revocasset; quin ipsam Rm  
 Mm Vm id improbaturam, persuasum nobis fuisset.  
 Quorum autem culpâ hoc Reipub. Polonia detrimentum  
 acciderit, Deus judicabit, qui omnium animorum occul-  
 tos recessus perspicit. Dum autem facere coacti sumus,  
 quod divina humanaque jura ac naturalis ratio, tum o-  
 mnium gentium laudata exempla permittunt, quasumus  
 Rm Mm Vm, non voluntati vel ulli culpæ nostræ, sed  
 fatali cuidam ac immutabili rerum conversioni imputa-  
 re dignetur: quin summa ope in eam curam incumbat, ut  
 omnis causa fundendi innoxii Christiani sanguinis in  
 cælum clamantis, e mediò tollatur, pax firma tandem sta-  
 biliatur, vastationibus ac direptionibus finis imponatur,  
 quiesque oppressis & defagitatis populus restituatur. Alio-  
 quin cælum & terra testimonium contra injustos oppres-  
 sores perhibebunt, & ira divina magis magisque incensa,  
 iisdem dolorem sempiternum inuret. Certè Livonia  
 omnis, tantam Christiani sanguinis effusionem nunc nan-  
 scat ac horret. Deus victoriarum autor Se Re Mti Ve  
 optatissimum triumphum contra barbaras gentes largia-  
 tur, cujus gratiæ innocentiam nostram commendamus,  
 Datum Riga die 20. Septembris, Anno 1621.

Literæ

Literæ Sp. Senatus missæ ad Ill<sup>mum</sup> Ducem  
 Christophorum Radziwvill Campiductorem  
 M. D. Lithuania post expugnationem urbis.

Illustrissime Princeps, Domine Gratióssime.  
 Obsequiorum nostrorum promptitudinem debitâ cum observantiâ.


 Quantas in difficultates gravissimum hoc bellum,  
 nostram Civitatem diuturnis calamitatibus  
 jam antea concussam, conjecerit, ipsamet Ill<sup>ma</sup>  
 C do Tra jam antea, tam ex publicâ famâ, quam ex cre-  
 bris literis nostris cognovit. Equidem memoriâ tenemus,  
 in nuper præteritis Comitibus, apparatus hostilium armo-  
 rum presentientes, per nuncios nostros, & Se Re Mti &  
 universis Ordinibus, nos periculi magnitudinem ob o-  
 culos posuisse, maturaque auxilia nobis submiti opemque  
 ferri, prout Respub. tenetur, ac fides publica exposcit, sum-  
 mis precibus orasse: non enim esse in nostrâ potestate, to-  
 tius belli molem cervicibus nostris suscipere aut sustinere;  
 non esse prudentia, cum universi Sociæ Regni viribus, no-  
 stras imminutas & afflictas vires comparare, aut vanâ  
 ostentatione supra sortem fortunarum nostrarum, imbe-  
 cillitatem agræ Civitatis extollere, id agentes, ne publica  
 cura imminueretur & nostra fortitudini onus gravissi-  
 mum permitteretur. Eandem quoque in sententiam Ill<sup>m</sup> Cm  
 Vm multa dixisse & scripsisse non ignoramus: quo minus  
 autem secundis auribus hæc omnia acciperentur, fatalis qui-  
 dam torpor, aut præconcepta ex privatis opinionibus &

fini.



sinistris suggestionibus securitas offecisse videtur. Quamvis autem ex publico Comitiorum decreto Ill<sup>ma</sup> C<sup>di</sup> V<sup>e</sup> Livonia defendenda partes, ut publica dignitas fidesq<sup>ue</sup> efflagitat, commissa fuerint: tamen postea, nescimus, quorum instinctu aut artificio, multa objecta fuerunt impedimenta, quominus tam necessaria defensio tempestive susciperetur. Quamobrem non destitimus, frequentibus literis, aures Re<sup>Ma</sup>is & procerum fatigare, ne tantum periculum negligerent, aut longè remotam enervatamq<sup>ue</sup> provinciam Livoniam incendio proximam tempestivis subsidiis destituerent. Non defuit quidem Re<sup>Ma</sup>i voluntas aut animus clementissimus, sed quod contra commune Comitiorum placitum ad Ill<sup>um</sup> Dominum Palatinum Vilnensem rejecti fuerimus, qui Livonia defensionem prastiturus sit, valde mirati & simul turbati sumus, quod Dominum Palatinum ad totius Regni & Reip<sup>ublice</sup> universa tutelam, & sup<sup>remi</sup> Ducis munus jam in Podoliam evocatum & designatum esse sciremus. Interim non parùm temporis preciosissimi perit; cuius quidem jacturam nos summo cum dolore deploravimus. Itaq<sup>ue</sup> literis iteratò ad R<sup>m</sup> M<sup>tem</sup> missis, hanc moram deprecati sumus; tùm demum responsum nobis fuit, Ill<sup>ma</sup> C<sup>di</sup> V<sup>e</sup> hanc provinciam esse commissam. Ab eo tempore, non quievisse Ill<sup>mam</sup> C<sup>di</sup> V<sup>e</sup> statuiamus; quin omnia quae tanti negotii magnitudo requirit, summâ diligentia & celeritate parâsse, ut in tempore rebus laborantibus

succur-

succurreret, ac muneris sui dignitatem ac Reip<sup>ublice</sup> fidem tueretur, idq<sup>ue</sup> pluribus literis suis testatum fecit. Sanè non mediocriter, hisce auditis, recreati fuimus; attamen temporis & rerum momenta ponderantes, solitudinem nostram de partis adversa mirificâ vigilantia & celeritate omittere non potuimus, jam tùm animo providentes, qui prior campi possessionem adeptus fuerit, eum multis modis fore potio<sup>riorem</sup>, positiq<sup>ue</sup> ac firmatis semel castris, difficultates maximas alteri objecturum. Non inficias ibi Ill<sup>ma</sup> C<sup>di</sup> V<sup>e</sup> crebras in eam sententiam nos literas scripsisse, quarum Exempla, si opus fuerit, bonâ fide publicè ubiq<sup>ue</sup> exhiberi ac recitari non abnuimus. Nunc plurimo labore ac molestia, militis conscribendi & necessaria parandi diligentiam Ill<sup>ma</sup> C<sup>di</sup> V<sup>e</sup> constituisse, facile con-  
jicimus, eo praesertim tempore, quo immanissimus Christiani nominis hostis Turcarum Imperator, bello Regnum Polonia aggressurus erat, omnesq<sup>ue</sup> vicina regiones armis virisq<sup>ue</sup> exhausta, vix domestico suo subsidio sufficerent. Interea, quod valde metuimus, classis Svecica instructissima portum nostrum occupavit, militem exposuit; exercitus reliquus unâ cum Serenissimo Sveciae Rege, terrestri itinere Pernaviâ supervenit: nec mora, ubi locorum opportunitatem contemplatus fuit, castra & tentoria fixa, aggeres & munitiones circa Civitatem, cis ultraq<sup>ue</sup> Dunam extruxit, magnâq<sup>ue</sup> festinatione, quod valde mirandum est, omnes viarum aditus & itinera interclusit, arctissi-

B

mâq<sup>ue</sup>



maque obsidione Civitatem terramque circum vallavit.  
Haud tamen ita animis consternati fuimus, ut non modis  
omnibus pro virium nostrarum mediocritate resistere-  
mus: Quamvis numerus conductorum militum supra  
trecentos non assurgeret, tamen promptissima civium  
juvenum alacritas supplevit, Et summo conatu vim ho-  
stilem propulsa vit. Caterum singulis diebus, aliquot ex  
tam exiguo numero tum civium tum militum, violentis-  
sima Et continua tormentorum verberatione fortiter ce-  
ciderunt: spe tamen auxilii Reipub. animos sustentarunt;  
praesertim cum Ill<sup>ma</sup> C. Va ante dies circiter novemdecim  
ultra Dunam in conspectum hostis venisset, ac ve-  
litando eum provocasset. Verum enim vero cum prater  
opinionem Ill<sup>ma</sup> C. Va, perspecta hostilis aggeris firmitu-  
dine, tum militis copiam ibidem collocata, qua tamen vix  
duodecima pars totius exercitus fuit, ab eo die succurrere  
nobis non potuerit; Civitas autem majori vi indies, non  
tantum aperto Marte, sed clandestinis quoque, cuniculis  
oppugnaretur, Et pulvis nitratus in locis subtus aggerem  
Et propugnacula nostra, circa portam arenosam posita  
Et occultatus, certissimam ac inevitabilem perniciem  
nobis omnibus minaretur, nobisque nulla ratione tanto  
periculo obviam ire liceret: habito cum Dno Castellano  
aliisque Nobilibus, tum Capitaneis, Et equitum Praefectis,  
res bellica peritis, consilio, rem desperatam esse animad-  
vertimus: ac proinde in ipso extremi periculi articulo,

ut o-

ut omnes jam tum fatebantur, Et nunc, visa adversa partis  
potentia ac horribili apparatu, sine dubitatione affirmant,  
colloquendi veniam petimus, eaque impetrata, certis con-  
ditionibus, in potestatem ac ditionem Serenissimi Sueciae Re-  
gis, omnium consensu, juxta certa formula praescriptum  
concessimus, vitamque ac salutem omnium reliquorum ci-  
vium, uxorum ac liberorum, tum fortunas, admirabili  
ac perpetuo predicanda victoris clementia, cujus ani-  
mum Deus ipse inclinavit, conservavimus, id quod jure  
divino Et humano, tum laudatis exemplis omnium gen-  
tium, concessum esse, omnes sana ratione praediti noverunt,  
satiis habentes, fatali dispositioni, cujus mysteria perscru-  
tari mortalibus non est datum, ceu vi majori cedere, ac  
meliori fortuna nos Civitatemque, prudenter tam vali-  
dum ictum declinando, reservare, quam vana ac stolidam  
ferociam, viriumque nostrarum ignorance, instar bruto-  
rum in eadem promiscuam rueri, uxoresque ac parvulos  
innoxios, furentis militis libidini cadique prostituere: ex  
qua re nulla laus nobis, nullum emolumentum Reipub.  
fuisse expectandum. Nunc divino beneficio, tum  
Serenissimi Sueciae Regis, Domini nostri clementissimi sum-  
ma moderatione, Christianum sanguinem fundere ab-  
horrentis, vivimus, Et intuentes exercitus robur viginti  
millium virorum bene armatorum numerum superans,  
tum cuniculorum tribus in locis stupendo opere facto-  
rum, qui universa Civitatis ruinam attraxissent, sum-

B 2

mis



mis in cœlum laudibus offerimus clementiam Serenissimi Re-  
gis Gustavi Adolphi, qui insciis nobis ac minimè creden-  
tibus, militis impetum prade ac direptionis avidissimum,  
imperio ac sapientiâ suâ cohibuit; alioquin ante dies ali-  
quot extremam cladem ignorantes passi fuissimus. Nunc  
Illma C. Ura sine animi passione aut affectione iudicet, ju-  
dicent omnes Christiani Reges & Principes, num prater  
ius ac fas quicquam commiserimus, quod cum ciues nostri  
continuis sex ferè septimanarum diurnis ac nocturnis  
vigiliis, excubiis, ac laboribus in restaurandâ munitione  
defuncti essent, militum vero pars dimidia, ac non pauci  
civium juvenumq, tum bajulorum occubissent, nobisq,  
validissima hostilis impressio, de versis in locis, tum sub-  
terraneum periculum, ubi 24. cadi pulveris pyrii occul-  
tabantur, ob oculos versaretur, suppetiarum spes nulla  
appareret, deniq, alia quoq, necessaria nos deficerent, hu-  
manitatis quàm crudelitatis maiorem rationem habueri-  
mus, ac certam Victoris clementiam experiri quàm in-  
terire maluerimus. Quantâ animi magnitudine ac mo-  
deratione fortunam suam temperaverit victor, vel hinc  
apparet, quod subjectionis nostrae pacto hanc conditio-  
nem apponi permiserit, ut si interea pacis negotium aquis  
legibus transigi posset, eâdem fide & integritate, quâ nos  
suscepit, salvis iuribus & libertatibus nos e nexu suo di-  
mitteret, ac redire ad pristinum Dominum pateretur.  
Damnosissima nobis fuit hac obsidio, in quâ supra quin-  
decim

decim millia globorum in Civitatem sunt missa, a nostrâ  
quoq, parte in principio pro virili responsum fuit: at po-  
stea, p. opugnaculis superioribus violentiâ hostili deturba-  
tis, cessare coacti sumus. Igitur hoc solum superest, ut  
Illma C. Ua summâ animi contentione pro suâ autoritate  
elaboret, ut funestissimo huic bello Livoniam consumen-  
ci, Luthvania similem fortunam minstanti, invito quoq,  
Rege, a prudentissimis Ordinibus finis imponatur, Respub.  
decus & existimatio vindicetur, & oppressis per summam  
injuriam populis ac subditis fidelissimis & innocētissimis,  
de quorum sanguine luditur, pax & tranquillitas tandem  
restituatur. Hanc multis precibus ac votis continuis su-  
pra annos jam viginti oravimus, hanc etiamnum iure ex-  
poscimus: alioquin ad sanctissimum Domini nostri Jesu  
Christi tribunal, in ultimo & aequissimo iudicio accusa-  
turi, qui privata sua cupiditati, gloriam DEI & Eccle-  
sia salutem postponuerunt. Deum autem sine pace nemo  
videbit. Hac libero & soluto animo, nullo metu aut ini-  
niis oppresso ingenuè scribimus, ut in utrâq, fortunâ ani-  
mi nostri firmitudinem probaremus. Deus Optim. Max.  
Illm C. Ua salvam conservet, ac Remp. Poloniam contra  
immanissimos Christiani nominis hostes tueatur. Da-  
tum Riga 20. Septembris, Anno 1621.

Litera Illmi Ducis Radzivilii, ad Splm Sena-  
tum responsoria.

B 3

Christo-



Christophorus Radzivvil, DEI gratiâ Dux  
Birzarum & Dubinkorum S. R. Imperii Prin-  
ceps, Exercituum M. D. Lithvaniae Dux.

Spectabili Senatui ac omnibus Ordinibus Civi-  
tatis Rigenf. salutem.

**P**osteaquam de deditioe urbis vestra, certis pri-  
mum nunciis, deinde literarum vestrarum signi-  
ficatione accepi, equidem pro eo, ac par erat gra-  
viter capum hunc & acerbè tuli; non quod jacturam  
istam Se Re M<sup>ti</sup> D<sup>no</sup> nostro clementissimo & Reipub.  
dammum aliquod irreparabile afferre existimem, sed quod  
vobis fortunisq; vestris fatalem quendam & funesum  
diem presentiscere mihi videar. Non enim tam inhu-  
manus sum, ut humanis non ingemiscam casibus, nec tam  
durus, ut amicitia, quam vobiscum integrè colui, obli-  
visci queam. Qualem itaq; habueritis amicum hactenus,  
nunc tandem cum Se Re M<sup>ti</sup> & Reipub., eademq; operâ  
mihi quoq; amici esse desistis, cognoscite, & simul quid  
de facto vestro sentire cogar, quidq; S<sup>m</sup> R<sup>m</sup> M<sup>tem</sup> & Rem-  
pub. de eo judicaturam putem, ascripse. Urbem florentis-  
simam omniq; rerum & armorum copid instructam &  
abundantem, cum spes propinqui auxilii prestò esset, ultro  
hosti tradidistis, obliti nexus & sacramenti, quo Re M<sup>ti</sup>  
& Reipub. obstricti tenemini, nec memores, tam festina-  
tum & praeceptum consilium quis tandem maneat exitus.  
Quod enim destitutionem primum, deinde vim hostilem  
queri-

querimini, excusationem hanc quonam pacto Se Re M<sup>ti</sup>  
totiq; orbi sitis approbaturi, vobismet ipsis reputandum  
relinquo. Ac primam quidem prætensionem quod atti-  
net, efflagitasse vos opem & auxilia Reipub., verum &  
fatendum est; sed nec id falsum aut diffitendum, opem &  
auxilia Reipub. in Comitibus Regni decreta, ac tandem  
ingruente bello submissa vobis esse. Hic fortassis vel tar-  
ditatem, vel infirmitatem accusabitis! Sit sanè aliqua in-  
ferendo auxilio mora interjecta; idcircone vos a nobis  
publicè desertos, usq; ad invidiam apud exteros jactabi-  
tis? cum auxilia, licet non ita, ut cupiebamus, maturè, non  
tamen vicissim sic serò venerint, quin presentem calami-  
tatem saltem ad paucos adhuc dies durando declinare in  
manu vestrà esset, ac tarditas ista cuiusvis potius causa, quàm  
oblivioni aut incuria vestri periculi imputari deberet.  
Quicquid enim hinc mora fuit, totum id cum in hostem Com-  
missarios nostros in tractatibus ludentem, & sub inducia-  
rum spe bellum integro triennio cōtra nos preparatum oc-  
cultantem, rejici debet, tum in sinistras suggestiones, qua,  
ut scribitis, effecerunt, ne nos priores possessione campi ade-  
pti fuerimus. Quod si penes eos, qui infidam pacem sug-  
gesserunt, haeret crimen, huius tarditatis quid causa est, quo  
minus vestra vos istius culpa condemnet confessio, qui ti-  
teris quibusdam vestris pacis futura spem facere non du-  
bitastis? Quid multis? venisse auxilia multos ante de-  
ditionem dies, diffiteri non potestis, cum ante 20. diem  
cepta



cepta obsidionis exactum, signa nostra volitare in vestro  
ac hostis conspectu videritis. Nempe nostra vos pauci-  
tas animos despondere coëgit! An vos fortunam belli  
numero bellatorum metimini, ac non potius prepotentis  
Dei patrocinio, qui meliori causa deesse non solet? Quo-  
ties in eadem causâ eundem hostem longè imparibus co-  
piis congressi superavimus? exciderantne animis tot in-  
clita nostrorum decora? Victoriarum trophæa? quibus  
magnum illud numen testatum est, esse sibi cura inique  
suscepti belli ultionem. Nec mihi deerat animus, per  
ausa? vestigia majorum vadendi; dedisset mihi, uti-  
nam, nuper ad ripam Dunæ pugnandi copiam hostis, cum  
etiam afflicta morbo? profligatam valetudinem me-  
am, decernendi cupidus, in propulsationem periculi ve-  
stri impendere non dubitarem. Sanè longo jam post ho-  
minum memoriam tempore, Regionis ista non nisi exigua  
manu contra numerosos hostium exercitus defensa sunt;  
ut mirari mihi subeat, potuisse vos hoc tempore numerum  
exercitus nostri despicere, cum præsertim indies auctior  
fieret,? confluentes undiq; copie expectarentur. Pau-  
citatem quoq; conducti præsidii pretenditis! Id vero sub  
admiracionem venit, Civitatem longo jam tempore præ-  
sentis belli præsciam, tam malè de mercenario milite sibi  
prospexisse, cum amen memoriam hominum nondum ex-  
cesserat, tempore pacis longè majorem eorundem nume-  
rum intra mensa sua alere consuevisse. Quid quod præ-  
ter ur-

ter urbanam cohortem, equitum quoq; præsidium a me  
concessum tuenda urbi superfuit. Sed præterea, itane  
mascula virtutis Riga inops fuit, ut etiam absq; conducto  
milite vigiliis ac laboribus civium vestrorum ultra exi-  
guum mensis unius? octo-dierum spaciū defendi ne-  
qui verit? Miles stipendio astringitur, vobis vero pic-  
tas, vobis fides, vobis omnia divina humanaq; jura in  
tantâ præsertim plebis concordia? constantia, necessita-  
tem durandi imponebant. An pauca præteriti præsen-  
tisq; temporis habuistis urbium exempla, qua in tristissi-  
mam conditionem? deploratissimam fortunam (licet in  
causâ haud justâ) sese ultro deicere, quàm infidem oppu-  
gnantis concedere maluerunt? Vobis verò quid defuit?  
an vos inopia Civitatis commeatu? annonâ non mo-  
dò ad necessitatem, sed etiam ad abundantiam instru-  
ctissima terrebat? an de suppetiis S<sup>c</sup> R<sup>e</sup> M<sup>is</sup> jam jam re-  
diturus desperabatis? At literis meis per vestros inter-  
nuncios transmissis testatum vobis feceram, me ab urbe  
recipiendarum reliquarum copiarum causâ saltem ad ca-  
stra digressum fuisse, ac interea minime ociatum fuisse, li-  
cet id in conspectu vestro non fieret. Quis animo suo  
presentiscere, aut conjecturâ assequi poterat, vos nullâ  
fracti animi significatione datâ, interea dum redeunte  
morbo implicitus, jam jam ventura auxilia præstolor,  
tam festinatam deditionem, me nullo modo præmonito,  
deproperaturos fuisse? Sed nimirum ruinam turrium  
suppo.



supposito pulvere pyro machinatum declinare voluistis.   
P. imine Rigenses hoc genere oppugnationis sunt petiti?   
aut nulla ex arte militari evitandi cuniculos ratio ostendebatur, cum in affluentia promptissima plebis fossores deesse non possent? Denique cum tanta vos premeret necessitas, aut iam animos despondere inciperetis, grave videlicet aut factum nimis difficile fuit, me vix aliquot miliariibus ab urbe distantem impendentis discriminis commonefacere, qui dedecus hoc & detrimentum Reipub. etiam capitis mei periculo, si qua forte sineret causa vè Deus vè, avertendum puta vissem. Clementiam victoris predicatis. Hæc quidem homine & principe Christiano, si qua alia virtus, maxime digna est; Sed si hæc vera sunt, ut vera ex nostratibus intelligo, ac ideo libenter ipsi licet hosti laudem hæc in parte tribuo, certè in istam clementiam deliquistis, siquidem vano terrori ac metui ante deditiorem nimium indulgistis. Quantum dedecus quæ vè culpa commissæ sit, videtis! Nunc quam miser sit futurus ac calamitosus adeo præcipitis consilii eventus, considerate. Ac nescio fanè, an non perire semel expugnatis satius fuerit, quam lento veluti cruciatu confici, & cum sempiternâ nominis infamiâ, non uno letho interire? Riga enim ut Svecis nunc, ita brevi nostratibus expugnabilis erit. Sed vos, ô Rigenses, qualem sortem Civitati vestra, ex quo castitatem & integritatem fidei suæ amisit, tempora minuentur, videte. Taceo mala, quæ vos ab hostilibus præsidis

mane-

maneant, utut se prima initia dant qui vobis Civitatis vestra munitiones, quas tam parvo negotio capi permittitis, nunquam sine numerosâ militum custodia concedent. Nam libertatem quidem verbis polliceri, quam re vobis incolumem præstare proclivius erit, quâ semel delibatâ, florem suum utinam recuperare possit. Indicate, quantum de opibus vestris decrescat, mercaturâ Civitati adempta! sed quid dico de opibus? imò quàm angustam sortem extremamq; pauperiem rationes vestrae subitura sint, maturè expendite. Quid vobis nunc vestra in Rempub. prosunt merita? quid decantata fides & fortitudo? si cum maxime florere debebant, exaruerunt. Infelix & nefastus dies, quo primum ad tractatus allecti estis, ille vobis invidit, quo minus fiduciâ meritorum vestrorum, jura & libertates vestras apud Rm Mtem & Rempub. longius proferre possetis. Benè cum eis actum video, qui pulcherrimâ morte damnosam patriæ deditiorem in istâ obsidione præverterunt: melius cum eis, qui pro aris & focus strenuè dimicantes, ab omnibus tractatibus puros & immunes animos retinuerunt; optime cum illis, qui spontaneum exilium amplecti, ac desertis patriis laribus clementiam Sc Ræ Mm & fidem Reipub. implorare constituerunt. Vestra de pace obtestatio satis est pathetica, sed hoc tempore, permissis A. arti habentis, vix aliquid ponderis habitura, nisi tota res in integrum restituta fuerit. Quis enim non vitio verteret Sc Ræ A. & Reip.

C 2

si tam




putam enormem injuriam, quam nobis barbarico bello  
 intentis hostis hic, nullâ Christiani sanguinis ratione ha-  
 bitâ, intulit, negligeret. Ut ut tamen est, vestrum est,  
 pacem optare, non verò nos ad eam, Rege invito, faciendam  
 commonescere: Apud nos enim, ut cui vis ordini, ita mul-  
 to magis Magistratus a Deo nobis concessio sua debet con-  
 stare libertas & prerogativa, quam imperiosis contentio-  
 nibus, in causâ presertim tam iniquâ, violare fas non est.  
 Quamvis autem Dei gratiâ ita comparatus sum, ut equi-  
 tate causæ fretus, modo pugnam non detrectet neque defugiat  
 hosti, de summâ rerum decernere possim & audcam: ta-  
 men, ne a pacis consiliis abhorreere videar, siquidem pars  
 adversa animam suam nobis candidè declararet, pro eâ  
 quam a Sa Ra Mte & Repub. accepimus facultate, non  
 parceremus labori, ut aliquid in salutem harum provin-  
 ciarum confici posset. Hæc sunt, quæ literis vestris pro-  
 vocatus respondendum duxi, quæ quidem a vobis eo, quo  
 a me scripta sunt animo, acceptum iri confido, cum in his  
 literis non hostem, sed veterem vestrum amicum egerim,  
 plûs condolentia quàm iracundia, benevola commonesca-  
 tione, quàm minacibus verbis, utpote salutis non exitii  
 vestri cupidus, indulserim. Non possum enim dissimu-  
 lare meum vestri causâ dolorem, cum non mœnia, non  
 ædificia, non turres vestras, sed virtutem Rigenſium to-  
 ties à me summo conatu defensam, & laudatam, concu-  
 disse, elanguisse, fractam, conculatam, insultationibus  
 male

malevolorum, qui talia de vobis dudum ominantes, me-  
 um in vos affectum criminabantur, prostitutam intelli-  
 gam. Valete, pristinos animos capeſſite, & Re Mti  
 & Reipub. nostræ de prostigatis ante viginti septem dies  
 barbarorum quinquaginta millibus, ac obtento in Wal-  
 lachiâ campi dominio, congratulamini. Datum ex  
 Castris ad prædium Newgut die Octobris Anno 1621.

Literæ Apologeticæ Spectabilis Senatus,  
 Præinsertis Illustr<sup>mi</sup> Principis Christophori  
 Radzivvillii Exercituum M. D. Lichvanix  
 Campiducis literis oppositæ.

Illustrissime Princeps.

Obsequia nostra pro præsentis status conditione  
 Illustrissimæ Celsni. Vestræ deferimus.


 Ccepimus literas Ill<sup>ma</sup> Cels. Væ in Castris ad  
 prædium Newgut mense Octobri, Anno proxi-  
 mæ præterito editas, quas ad nostras literas hosti-  
 liter expugnata urbis nostræ indices Ill<sup>ma</sup> Cel<sup>do</sup> Væ rescri-  
 bendas censuit; easq; in confesso nostro, præsentibus Tri-  
 bunis ac Senioribus utriusq; Collegii, publicè recitari feci-  
 mus. Ex quibus Ill<sup>ma</sup> Cels. Vam ob deditiorem urbis  
 nostræ vehementer dolere, miserari quoq; pristina ami-  
 citia memorem hoc infortunium nostrum, & huma-  
 num hunc casum ut hominem quidem ferre, gravissimâ  
 tamen cum famæ ac honoris nostri contumeliâ, nos cum  
 C 3 perſi-



perfidia ac inconstantia, tūm pusillanimitatis ac precipitiis, in dedenda ultro hosti urbe, nullā urgente graui necessitate, nec pramonitā Illm<sup>a</sup> Cels. V<sup>a</sup>, consilii accusare, atq; exinde secuturos perpetuos angores & cruciatus, imō panoethriam & fatalem interitum nobis Civitatiq; nostrae ominari, ac proinde ad reassumendos pristinos animos & ad congratulandum Regi & Reipub. Polonae de obtentā nuper in Valachia contra Tartaros & Turcas victoriā, nos pro veteri confidentiā adhortari, intelleximus.

Ad varia istarum literarum, quas prima dicta vit animi perturbatio, argumenta inter se & cum re uti gesta est pugnantiā, non erat quidem ab initio animus nobis rescribere quicquam. Graves enim arduaq; rationes spem nobis faciebant fore, ut Tempori, quae veritatis filia est, perturbati hic iudicii error cederet, atq; cum jam satis praeter meritum nostrum (humano more loquendo) afflicti, & iniquam saevientis fortune aleam experti essemus, sibi a contumeliā & lesione honoris nostri, quem semper saluum illibatumq; conserva vimus, temperaret. Frequenti autem auditioe indies accipimus, quā iniqui ac periculosi in castris Illm<sup>a</sup> Cels. V<sup>a</sup> inq; vicinis locis de nobis & expugnatione urbis nostrae etiam nūm spargantur sermones, quāmq; ignominiosam ipsa Illm<sup>a</sup> Cels. V<sup>a</sup> in nuperis suis ad Dñm Benedictum Hintz Collegam olim nostrum & alios oclusis passus lueris (a quarum missione impofterum in nostram nostrorumq; perneciam

ciam meritò abstinendum) de inevitabili hāc derelicta ac omni auxilio destituta Civitatis deditione mentionem faciat. Proinde ne in vindicando honore & existimatione nostrā segiores videremur, aliter facere non potuimus, quin ad literas Illm<sup>a</sup> Cels. V<sup>a</sup> ea regereremus, quae simplicem nostrum candorem & innocentiam arguerent. Testis sit huius orationis ipse Deus, testes sint qui viderunt, amici, inimici: Audiat quoq; ea, quae gesta sunt, legatq; mundus, & ad normam rectae rationis sine affectu dijudicet. Quoniam verò autor literarum nimia styli acie nos perstringit, ac demonstrare nititur, Regia Atm & Respub. Polonae nomine praestita esse, quae a supremo ac directo Domino ad avertendos a Civitate sibi subjecta belli casus & exitus requiruntur; econtra a nobis officii fidesq; metas transgressis facta esse quae omitti, omissa quae fieri debuerunt: muneris nostri esse arbitrati sumus, pro innocentia nostrā asserendā eviderenter ostendere, Regiam Atm & Rempub. Polonam nihil praestitisse, quo tristissimus hic casus a nobis & Civitatis nostrae cervicibus averteretur; Nos verò ne a priori statu nostro & jure superioritatis Regni Poloniae avelleremur, praestitisse omnia, quae a bonis ac fidelibus subditis honoris ac conscientiae ratio postulat. Quod dum facimus, calamum nostrum ita temperabimus, ut veritatis cynosura secutus Re Atm ac Reipub. Polonae nihil detrahat, tribuat vè, unde major nobis nostrisq; factis, quā par est, accedat asimatio.

Non



Non putamus opera precium esse longius hic recensere, quàm gravi in Regno Suecia Anno 1598. & 99. & unde subortum fuerit bellum intestinum: Sanè ignis ille successus in Regnum usq; Polonia, eiq; adhaerentes Provincias suas ejaculatus est scintillas, quæ in tantam belli flammam exarsere, ut non solum Livonia tota, nobilis illa Provincia, non unius olim sed variorum Magistratum sedes ac mater fecundissima, hostiumq; potentium, etiam non accersito aliunde auxilio, acerrima propulsatrix, in cinerem sit redacta; verùm etiam potentissima Polonia ac Magni Ducatus Lithvania ditiones in restringendo hoc cruenti belli incendio totos viginti annos occupata, ingentem virium virorum ac opum jaçturam subjerint. Tantùm novissimas istas inducias biennales Illmæ Celsis De uti Campiducis operâ & instinetu die 15. Novemb. Anno 1618. presentibus nostris Internunciis, inter utraq; Regna sancitas, eidem in memoriam revocandas esse duximus, & quidem in hunc finem sancitas, ut interea temporis, interventu Christianorum Principum, quod caput hujus inter utraq; Regna exorta controversia est, vel sopiretur planè, vel per Senatores utriusq; Regni universales Inducia longiores (ad quam rem plenioribus mandatis instructi accedere vellent) pangerentur.

Quam telam exorsurus Illis Dñus Jacobus de la Gardie, Generalis Exercituum Suecia Dux & Esthonia Guber-

Gubernator, literas Revaliæ die 12 Octob. Anno 1619. id est, priori ab induciis renovatis anno ad Ducem Exercitus Mag. Duc. Lithvanie & Commissarium Livonie Generalem Illmum Dñm Joannem Carolum Chodkewitz dedit, quibus significat, velle quidem Regem ac Dominum suum biennales istas inducias sanctè observare; deinceps verò, iis elapsis, in incertitudine istâ, ex certis rationibus quæ in iisdem literis enarrantur, amplius minime versari, sed cum ipso Rege Polonia vel perpetuam & constantem pacem vel plurium annorum inducias inire, ac tùm Pernaviam quoq; ultrò restituere velle. A quâ sententiâ demoveri nullâ ratione potuit Suecia Generalis, adeò ut, etiam si Generalis Lithvanie creberrimis suis literis ac nunciis ad prorogandam pacem terminum sibi locumq; præfigi flagitaret, atq; eam ob rem in Livoniam ipse, de morbo suo ac itineris molestiâ parum sollicitus veniret, tamen ante directam & perspicuam resolutionem ad propositos articulos, ne tempus quidem aut locum præfigere, nedum ad ulteriores Tractatus progredi voluerit: De quibus omnibus transmissa à nobis exemplaria Illm Cels. Vam jam tùm certiore reddidit.

Cum verò voluntas ac animus Regis Polonia ad pacem suo nomine (quod unice pars urgebat altera) stabilendam, neq; propenderet ipse, neq; ullâ ratione permoveri posset, quid aliud inde, adhibita in consilium ratione, quàm belli redintegratio expectari potuit? Atq; ita se rem

D

habere



habere, variis ex locis adeoque ipso regno Suecia & nos &  
ipsa Regia *M<sup>tes</sup>* Polonia educta fuit; nimirum bellum ter-  
ræ marisq; summis viribus preparari, in promptu esse om-  
nes belli gerendi rationes & instrumenta, Regni incol-  
as Ducum peratissimorum operâ tot annos assiduis exer-  
ceri armis, & imprimis omnes has machinationes caput  
Civitatis Rigensis petituras esse; de quo ipso Regia *M<sup>tes</sup>*  
quoq; ne incauti ab hoste opprimeremur, peculiaribus suis  
litteris nos pramonitos voluit. Quid quod in Regno Polo-  
niæ jamdudum ad bellum hoc Turcicum, quod ex positione  
causarum secundarum prudentes ac cordati viri non pauci  
prævidebant atq; certò prænunciabant, res spectare vide-  
retur; ac sub idem ferè tempus, quo inducia exspirabant, u-  
terq; exercitus Polonici Ducum flore selectissimi mili-  
tis (quod infelix istius funestissimi belli initium fuit) à  
barbaris in *Wallachia* oppressus interierit. Talia consi-  
derantem decuit sanè Regiam *M<sup>tes</sup>* tanquam directum  
Dominum Livonia & Rempub. Poloniam, partem solli-  
citudinis suæ in hanc quoq; desolatam Provinciam & Ci-  
vitatem impendere, & vel exemplo aliorum Principum,  
qui in similibus casibus idem non rarò præstiterunt, ad se-  
curitatem fidelium subditorum, suo titulo ac nomine in-  
signitam pacem & suspensionem armorum, dum melior  
se se daret occasio, sine præjudicio negotii principalis am-  
plecti, vel si id placeret minus, Provincia ac Civitati de  
ius quæ ad necessariam defensionem pertinerent, mature  
provi-

providere. Quàm nos ingruentis hujus belli & irruptio-  
nis hostilis metus, ex variis indicis cõceptus torserit! quàm  
non forent nunc ea Civitatis plùs quàm vicennali bello  
exhausta vires, quæ sustinenda potentia majori pares esse  
possent! quanta esset totius Provincia, imprimis arcis Ri-  
gensis ac Dunamundensis vastitas ac desolatio! satis solli-  
citè Internuntii nostri non tantum superioribus annis sed  
& in proximè *Warsavia* celebratis Comitibus Regia *M<sup>tes</sup>*  
explicatum reddidè; atq; ne nos fideles subditos suos Ra-  
*M<sup>tes</sup>* in tanto rerum discrimine desereret, quin potiùs ob-  
impendentis Turcici belli periculum, vel oblatus ab hoste  
diuturnioris pacis condiciones acceptare, vel in tempore  
defensionem Livonia meditari dignaretur; tum quoq; ut  
arces principales, imprimis Rigensem ac Dunamun-  
densensem omni præsidio nudatas muniri, milite, annonâ,  
bellicoq; apparatu instrui, & nostra quoq; Civitati, si ob-  
sidenda foret, stipendia in quingentos aut sexcentos mili-  
tes ad sex menses, pulverem pyrium, globosq; subministra-  
ri, (acceptâ à nobis cautione, restituenda fore omnia, si ob-  
sidio secuta non fuerit) deniq; sufficientem exercitum pri-  
orem hoste in possessionem campi venire juberet, per o-  
mnia sacra totius Civitatis nomine sunt precati; in mi-  
nùs, deivinum numen totiusq; mundi iudicium obtestati  
sunt.

Fateri quidem cogimur, Regia *M<sup>tes</sup>* sollicitudinem, sta-  
tim ac nuncium de infausa strage *Wallachicâ* accepit,  
D 2 cluxisse



eluxisse ex eo, quod, non expectatis Comitibus, per peculiare literas Ill<sup>me</sup> Cni. V<sup>e</sup> utpote Campiduci defensionem Livonia commendavit, ad conscribendum exercitum sufficientem Universales literas transmiserit, Ducem Curlandiae & Semigalliae, nec non Ultradunensem, Curonensem, Piltensemq; Nobilitatem, hancq; ipsam urbem nostram, hoste ingruente, ad Ill<sup>m</sup> Cels. V<sup>m</sup> remiserit. Nec deposuit hanc curam Regia M<sup>te</sup> etiam in ipsis Comitibus DD. Senatorum & Internunciorum Terrestrium votis & assensu adjuncta, imò Ill<sup>ma</sup> Cne. V<sup>e</sup> autore & promotore summam animi contentione ad egit, ut, si ve ad pacem si ve ad bellum respectaret, omnia ista consilia & actiones non nisi Regiam prudentiam & paternam sollicitudinem pra se ferrent. Etenim non tantum Commissio DD<sup>nis</sup> Commissariis de prolongandis sub titulo ac nomine Regiae M<sup>te</sup> incertum tempus inducis edi iussa, verum etiam si tractatus non succederent, Ill<sup>me</sup> Cni. V<sup>e</sup> unanimi omnium Ordinū suffragio à Regia M<sup>te</sup> potestas defendenda Livonia & belli gerendi data, sumtus ex arario Magni Ducatus Lithvaniae decreti, nostriq; adeò Internuncii responso solatii pleno dimissi sunt, atq; nos sicubi necessitas postularet, ad Ill<sup>m</sup> Cels. V<sup>m</sup> utpote Campiducem ire iussi sumus.

Non minori laude dignum censemus animum Ill<sup>me</sup> Cels<sup>is</sup> V<sup>e</sup> utpote quae eam quae decebat fide & industriam Mandata Regiae M<sup>te</sup> exequi, omnia conquirere quae ad hanc expeditionem facerent, equitatum peditatumq; exi-

quo temporis spacio partim colligere, partim Capiteanos ac Praefectos constituere, isq; colligendi militis potestatem dare non intermisit. At verò maximo dolore affecti sumus, cum intelligeremus, sana haec consilia tam subito interversa esse, inventosq; alios, qui, dum Ill<sup>m</sup> Cels. V<sup>m</sup> prospera Fratris laudabilis memoria Principis Ianussii Ec. Ec. Castellani olim Vilnensis mors à Comitibus iusto citius advocaret, amabilem spem pacis Regiae M<sup>te</sup> sub priori Statuum non ipsius Regis asssecuratione ineunda facerent, Livoniaq; defensionem jam decretam in suspensore relinquendam suaderent, idq; non tantum contra communem Ordinum legem, sed & speciale mandatum à Regia M<sup>te</sup> R<sup>mo</sup> D<sup>no</sup> Cancellario Regni datum. Et haec ipsa mandata tractandi cuinam data sunt? Non Ill<sup>me</sup> Cels<sup>is</sup> V<sup>e</sup> Campiductori, sed D<sup>no</sup> Generali Mag. Ducat. Lithvaniae Joanni Carolo Chodkiewiczio (tamen si ille ex decreto Comitiali contra Turcas Duxiturus erat) & prioribus Commissariis: ad quid? ut pacem vel inducias non Regia manus nomenve (à quo parti alteri ne latum unguem recedere certum erat) sed DD. Senatorum duntaxat autoritas confirmaret. Sed et hoc maxime doluimus, quod tum demum praesidia in arcibus collocare & militiam instruere Ill<sup>me</sup> Cels. V<sup>e</sup> permissum fuerit, quando Tractatus felicem finem sortitari non essent, & bellum redintegrandum foret; observato interea arario Mag. Duc. Lithvaniae.



Hæc consiliorum metamorphosis animos nostros tanto reddidit perturbatiores, quanto bellum terrâ mariq; valide restaurari, relationes, quas sub initium noviter incun-  
tis anni ex diversis locis accepimus, confirmârunt certius. Ea q; Ill<sup>ma</sup> Cdo Ura nō tantū ex variis literis nostris, sed  
Ex iis, quæ noster ad exequias dicti Dñi Castellani Vil-  
nensis fratris Ill<sup>me</sup> Cnis Ure missus Internuncius retulit, abunde intelligere, atq; non sibi soli habere, sed eādem quā nos diligentia Regia M<sup>te</sup> & DD. Senatoribus Regni Magniq; Ducatus Lithuania communicare dignata fuit. Quid autem ceteri consultores in vidi? præconcep-  
tam semel de induciis ad priorem normam redintegran-  
dis opinionem mordicus tenere, in clausulâ ibidem inser-  
tâ, quæ non nisi præviâ denunciatione trimestri, si tenta-  
ti tractatus malè cesserint, arma resumere jubet, firmam  
spem locare (quæ tamen denuntiatio armorum 28 Martii facta est) cum ratione insanire, quasi bellica hæc expedi-  
tio vel contra Moschum, vel pro Palatino Rheno adorna-  
ta esset, hostem viresq; hostiles, utcunq; res ceciderit,  
(quod maximum in bellis peccatum est) præ se contentui  
ducere, Rigam urbem censere ejus potentia quæ expugna-  
ri non possit, & maximum defensionis subsidium ab indi-  
genis vicinorum aliquot Samogitia districtum, nec non  
Ducatus Curlandiae & Pillensis expectare; parum atten-  
dentes querulas nostrorum voces & lamentationes, qui  
in Comitibus superioribus aliquot publice nostro nomine  
conte-

testati sunt, non esse ampliùs eas Civitatis nostræ vi-  
res, quæ solæ obsidionem nullis subnixæ presidiiis aut au-  
xiliaribus copiis sustinere possent: Quam parum etiam  
spei subsit in Provincialium subsidio, quibus solenne sem-  
per fuit limites potiùs tueri suos, quàm contra hostem in  
aciem prodire, Rm M<sup>tem</sup> & anteriores belli Duces non  
latuit, idq; superiora testata sunt tempora ac bella in Li-  
voniam gesta, atq; adeo ipsammet Ill<sup>m</sup> Cels. Vm experien-  
tia magistra satus, proh dolor, edoctam dedit.

Hanc infelicitatem nostram imis suspiriis deploravi-  
mus, variisq; literis ac nunciis nostris coram Regia M<sup>te</sup>  
& DD. Senatoribus, ope atq; auxilio Reipub. implora-  
to, questi sumus. Sed surdus narrata est fabula; Atq;  
nos eandem, quam Livonia semper, fortuna aleam nunc  
quoq; experiri coacti sumus; sic sanè nunquam antea  
maturè auxilia submissa, nunquam Provincia contra ho-  
stes Reipub. defensa, sed quasi derelicta atq; hostis arbitrio  
objecta fuit: Amissa verò; non tam contra hostes, quàm  
miseros indigenas subditosq; innocentes totis viribus sa-  
vitum est, perfidia ac laesa Majestatis criminis incusatos,  
quod miracula edere, soliq; armatorum hostium potenti-  
am propulsare non potuerint, aut superati in ea, quas in-  
habuissent, arcibus & territoris, spontè in exilium mi-  
grare noluerint: id magis mirandum est, quod  
facilissima sanè hæc videtur religionis nationisq; ex-  
stirpanda ratio, præsepte Ill<sup>ma</sup> Cels. Ura aliisq; Nobilibus  
Venda



Vende Anno 1618. votis comprobata eorum, qui zelo quodam spiritali inflammati, felicem propaganda religionis progressum interitu Provincia & inprimis hujus Civitatis metiri, & de reformatanda in unum & statu Ecclesiastico vicissim subjuganda atq; approprianda Provinciam desperare visi sunt, nisi prius ad Volmaria Vendeq; vastitatem ac desolationem Riga quoq; redacta fuerit: Quorum sententia alii immerito quodam erga nos concepto odio, licet plurimis in rebus ab iisdem dissentirent, hanc in parte ablandiri non dubitarunt. Cui rei etiam non parum fortasse adjumenti attulit hereditarium contra Illm Cels. Um & Domum Ipsius Ducalem odium, verbis factiq; expressum, quò via ad virtutem exserendam, & bene de Repub. merendum Illm Cels. Va occluderentur, de nobis verò culta cum Illma Cels. Va & Ducali ejusdem prosapia mutuo amicitia (quæ unica invidia hujus ac malevolentia mater est) quasi vindicta sumeretur.

Ad assequendum autem hunc scopum, intenti in hanc occasionem juere oculi eorum, qui eo potissimum tempore, quo plurimum se autoritate suâ efficere posse sperabant, Regem optimum in id induxerunt, ut de successu tractatum ex præscripto prioris formula instituendorum nullatenus dubitaret, aut denunciationem armorum nullius momenti esse crederet. Non carebat res periculo, quod hanc ratione commissa Illm Cui Va publica Comitiorum autori-

autoritate defensionis preparatio usq; ad dubium eorundem tractatum eventum suspensa, expeditio bellica & militis collectio, clauso interea Mag. Duc. Lithvania arario, inhibita, imò copia jam conscripta variis illecebris ac artibus abalienata à Capitaneis & Equitum Præfectis fuerint, non sine insigni Illm Cui Va cujus militia nomina sua jam professi erant, contumeliâ.

Perniciosa ista consilia quis exceperit exitus, etiamnum in propatulo est. Persuasioni enim Reg. Mui facta tractatum eventus minime respondit; siquidem dictus Dñs Generalis Exercituum Suecia Dux, non expectatâ nostrorum Commissariorum, qui in tantâ re plus nimio socordes fuerant, declaratione, per literas satis efficaces Borgis die 28. Martii ejusdem Anni 1621, editas nomine Sermi. Regis sui, indictis armis, inducias resignavit; & cum nihilominus ad tractandam sub conditionibus supra expressis pacem, si modò nostri simili mandato, sine quo inanes futura essent omnes istius Conventionis actiones, instructi venirent, terminum iis primam diem Maii & locum inter Oberpahlum & Album-Lapidem præfixisset, ibi tùm nostri adeò imparati ad rem accessere, ut arctitudinem istius termini, quem tamen ipsi metu impendentis periculi tempestivè impetrare debebant, deprecari, dilationis veniam petere necessum habuerint.

Nos visis hisce literis advertimus statim, convenire hanc externam hostis actionem, cum omnibus iis, quæ de  
E ipsius



ipsius preparatione ac intentione nobis relata fuerant: Et ut hac ipsa hinc inde allata ad nos nuncia, Et quid de iis nos sentiremus, Dñi Commissarii quoq; loco Et tempore designato congressi scirent, omnem operam dedimus, ablegato ad eundem locum publicis sumtibus, è civium numero, qui quæ ibi agerentur, studiosè attenderet, Et celeri viâ ad nos referret, Et in primis capita Instructionis, de quibus nobis contra consuetudinem Regni Polonia quicquam scire hæcenus non licuit, quoad formam Et materiam nobis transmittenda à Dñis Commissariis impetraret. Res autem ipsa ostendit, cum nostrorum Instructio Regiâ manu ac sigillo insignita non esset, repudiata pace, certò ad arma denuò rem venturam esse; neq; vanum fuisse timorem ac sollicitudinem Reginum, quibus antea de bello vociferantibus, quasi vel pusillanimes essent, vel privatis rebus studerent, fides habita nunquam fuit.

Sed Et ab ipsâ denuntiatione belli, fortè suffecisset adhuc tempus ad defensionem preparandam necessarium, nisi novum de repente eumq; perniciosum quàm plurimi tam in aulâ Regiæ M<sup>ajestatis</sup>, quàm hic in viciniâ sparsissent errorem, quasi Svecica ista belli expeditio in rem Sermi Electoris Brandenburgici, promovendi tantùm fendi Prussici ergò suscepta quidem, sed nunc, re per DD. Commissarios feliciter transactâ, Et promissione pacis apud Serenissimum Regem Sveciæ impetranda, Regiæ M<sup>ajestatis</sup> Polonia inter reliquas conditiones ab Electore factâ, posita ac

sita ac sopita esset. Quæ jucunda quidem at falsa persuasio, mentes quàm plurimum hominû occupavit adeò, ut torpore quodam lento quasi fascinati debitam sollicitudinem defensionis ferè deponerent, non attendentes; in rebus tanto cum periculo conjunctis, indictis publicè Et notoriè preparatis armis, ex alienis causis Et longè petitis circumstantiis, timenda potiùs omnia, quàm incerta speranda esse. Contra quorum opiniones tam per literas quàm oretenus vehementer disputavimus atq; missis creberrimis ad Regiam M<sup>ajestatem</sup> ibidemq; in aulâ residentes DD. Senatores ac Officiales, nec non ad Mag. Duc. Lithvæ Exercitus Ducem Et Livonia Commissarium Generalem, tam ante quàm post ipsius in Podoliam abitum (ad quem Regia M<sup>ajestatis</sup> nos literis quibusdam suis remiserat) porrò ad Illm Cels. Vm Sluckoviam usq; ad DD. Senatores Mag. Duc. Lithvania ad Conventum Et Tribunal Vilnensè, tum quoq; ad 4. istos districtus, quibus tuenda Livonia provincia demandata erat Upitensem, Wilkomiriensem, Rosseinensem Et Braclaviensem, simulq; ad Ducatum Curlandia, Nobilitatem Piltensem, Et ad paucos eos, qui adhuc in Livoniâ residebant arcium Capitaneos, literis ac nunciis, quanta nobis instarent pericula, diligenter ob oculos iisdem posuimus, vires ac potentiam hostis terrâ mariq; instructissimi propediem adventuri, ejusq; in obsidenda hæc urbe decretum immutabile aperuimus; preces Et suspiria literis jungentes, ut aut Regiâ Induciarum assecuratione huic malo obviam iretur, aut



praedia quaecumque, Germanorum Polonorumve, peditum equitumve (quod antea nunquam, dum melior nobis fortuna arrideret, admisimus, quin nostro potius stipendio milites octingentos, imò plures, qui ad numerum interdum millenarium accedebant, aluimus) & copia quoque subsidaria necessitati nostra submitterentur, arces Dunamundensis, Kokenhausensis, Rigensis omni praesidio & annonâ destituta, maturè rebus ad obsidionem tolerandam necessariis instruerentur; praeterea ut illam arcis Rigensis ruinosa ac incrimis partem, quae occupata maximum Civitati periculum minaretur, nobis destruere liceret; considerarent periculi magnitudinem, in quo si desereremur, fore praediximus, ut vicina quoque Provincia exitii nostri damna participatura essent; Insuper per Secretarium nostrum in aula Regiâ agentem, summo quo potuit fieri studio Revdum Dñm Archi-Episcopum ac Primate Regni, nec non DD. Consiliarios, Officiales, ac cubi- culi Regii Praefectos sollicitavimus (quod ipsum quoque Dñus Marefcalcus Terrestris Curlandiae Dionysius ab Oelsen, & à DD. Commissariis missus Internuncius Urangelius Equitum Praefectus fideliter gnâviterque praestiterant) exorarent denique Regiam Maest, ut perpensa hâc extremâ, quâ undequaque Regnum cingeretur, necessitate, exempla aliorum Principum secuta, hâc vice inducias Regii tituli autoritate iniret atque confirmaret: sin minùs, legitimam, ut dictum, defensionem praestaret. Sed illud ne profusis quidem lacrymis obtineri potuit; hoc vero Regia

Mtis

Mtis litera multiplices & responsa per Dñm Archi-Episcopum reddita sanctè nobis promiserunt, non desertum nos, sed debitè defensum iri.

Postea cum jam in discrimen res deducta esset, praesidiariam 500. peditum manum Gedano expectare jussi sumus; ac tùm demum Illme Cui Vae Universales litera expeditoria tradita, atque ararium Lithvæ reclusum est, cum jam robur ac flos militiae Lithvania, Livonia, Curlandia & ex hâc ipsâ Civitate conquestus contra Turcam in Podoliam abductus, collecti quoque contributionum in Comitibus decretarum redditus Provinciales jam hinc aucti essent. Atque eodem demum tempore è Thesaurò Lithvaniae Revisor quidam cum aliquâ pecunia summula ad nos venit, qui arces Dunamundensem, Kokenhausensem, Rigensem, implorato nostro in ministrandis materiis operariisq. auxilio, muniret.

Ingruentem verò hostilem impressionem ac obsidionem etiam tùm pro fabulâ ac ludibrio nihilominus habitam esse vel inde patet, quod nostro in aula agenti Secretario objecta contra Jesuitas Actores amicos nostros multis rerum argumentis comprabatos Exceptio armorum amputata sit, quasi ea, uti Jesuita asserbant, ad eludendum tantum Judicium praeenderetur; Citationes quoque criminales ratione causa hactenus à nobis moneta, vigore Privilegii & continui usus, quae sanè tam in pondere quam valore monetam Regni & Magni

E 3

Duca.



Ducatus Lithvania superabat, ad instantiam Instigatoris (unde tantisper, donec auxilia Reipub. subvenirent, solatium caperemus) per eundem Revisorem Thesauri Lithvanici nobis insinuata sint: egregium verò tormentorum numerum, sub sufficienti nostrâ cautione Dunamundâ abducendi, ac lapidum quendam acervum de summitate arcis Rigensis deiciendi potestas nobis denegata sit, satiusq; ductam, tam nos, quàm Dunamundenses machinas hostis direptioni objicere.

Parem quoq; fidem ac animorum propensionem apud Tribunal Vilnense ac Conventus prefatorum quatuor districtuum atq; viciniam omnem reperimus; nimirum, non esse credenda quæ Rigenses de bello spargerent, Pánico terrore eos perculsos esse, carere animis; Proinde neq; veriti sunt nimiam nostram credulitatem, quæ copias subsidarias Reipub. in Provinciam attraheret (siquidem Mars ipse nondum oculis cernetur) publicè accusare atq; flagitare à nobis, ut eadem literis nostris repudiata gradum sistere juberentur; nō fieret, contra nos protestari, quinimò eò temeritatis de venire, ut irrupturi etiam hostis potentiam ac obsidionem vel totum nos annum tolerare posse ineptè statuerent, publicèq; profiterentur.

Ex hac hominum incredulitate majus ad curam & sollicitudinem Illmæ Cels. Væ augmentum accessit, quippe quæ pacti non confisa unâ nobiscum de bello ingruenti vociferari non desistit, ad auxilium nobis maturè ferendum, campum.

campumq; occupandum promptissima, si quæ ad bellum gerendum necessaria erant ad manus habuisset, aut eâ quâ decebat celeritate comparare potuisset. Non pratermissimus variis literis nostris compellare Illm Cels. Vm, cum videremus militem tumultuarium, qui justum exercitum conficeret, tempestivè satis conscribi, nobisq; suppetias venire non posse, dignaretur quantocyûs milite atq; apparatu bellico arces prefatas munire, atq; imprimis in nostram Civitatem presidia mittere, de quibus quidem, ut in bello fieri solet, nunquam non spes nobis ab Illa Cne Va facta, sed tamen ne unus miles submissus in Civitatem fuit: praterquam quod Schwartzhoffium Equitum Praefectum Illma Cdo Va turmâ suâ Dunamundam nudam ac incrementum occupare, nos verò commune periculum eidem frumentum, sal, polentam, aliq; necessaria suppeditare jussit. Nec minorem nobis difficultatem peperere hinc illi Equitum Praefecti Wilhelmus de La-Barre & Gabriel Ceridon, qui licet vigore literarum Universalium nomine Illma Cnis Væ per nos ipsis exhibitarum cum cohortibus suis defensionem arcis Rigensis suscipere tenerentur, ab initio tamen propter nuditatem arcis ac defectum omnium rerum hanc provinciam, & quidem non immerito, detrectârunt.

Ex his & aliis rerum testimoniis, quis non videt in diem vixisse omnes, nec fuisse prater Illm Cels. Vm & nos quemquam, qui periculum ullum belli metueret? In tantâ verò



tâ verò rerum perturbatione animis tamen fracti non sumus, quin majori alacritate & industria, pro modulo virium nostrarum, nihil intentatum reliquimus, quod ad propulsandos hostiles impetus conservandamq; Civitatem pertinere videretur. In specie præter eos, qui jam Civitati merebant, Capitaneos, Officiales ac milites, alium insuper rei militaris peritiâ insignem Capitaneum *Wilhelmum Schoutten*, efflagitatu nostro *Lubeca* exautoratum, nostro stipendio conduximus, datâ tûm simul ipsi & deinde per literas potestate, quantumcunq; militum numerum secum ad nos traducendi. Similiter & Capitaneum *Joannem Hillen* aliosq; quamplurimos Officiales, tormentorum magistros, & quicquid militis tumultuarii conquiri potuit, autora vimus: Adhuc machinas nostras bellicas & armamentaria, quantum per temporis brevitate licuit adornari, triremes ac munitiones ad fluvium *Dunam* reparari, valla mœniaq; pristina firmitati restitui, novum illud propugnaculum angulare ad *D. Jacobi* portam ingenti labore ac sumtu consummari, fossas expurgari, loricas cespiticias ad basin vallorum erigi, loca quæ non satis tuta viderentur ac hosti per via muniti, juventutem armis exerceri, omniaq; ad debitam defensionem necessaria, quam potuit fieri solertissimè, ordinari ac disponi curavimus. Quibus in rebus omnibus tantam alacritatem nostrorum videre fuit, ut pro se quisque unâ cum suis domesticis, ad instar operariorum in fossis val-

sis vallisque, molestissimos quosq; labores subire non detrectaverint, adeoq; hemicyclos *Semilunia*, loricas vallorum, aliaq; similia opera in locis hostili machinationi per vias ac nudis, summâ celeritate ante adventum hostis perfecerrint, meriti applausum admirationem ac laudem peregrinorum in Urbem adventantium. Neq; verò etiam *Arce Rigensi* ac *Dunamundensi* idoneis opificibus, operariis, tormentorum Magistris & materiis, aliisq; rebus necessariis, nec non annonâ, instrumentis bellicis ad fidem publicam iisdem subministratis, ope atq; auxilio nostro, domesticæ opera quodammodo postponentes, desuimus.

Insuper cum *Dñs Nicolaus Okun Vice-Capitanus Arcis Rigensis*, nobilis miles, ejusdem, licet 25. tantû præsidariis *Lithvanicis* vulgò *Wybrance* dictis custodiretur, strenuum se defensorem professus, ad quoscunq; fortuna ictus fortiter sustinendos unâ nobiscum paratus esset, perperaso summo, quod eadem arx vicina ruinosâ nobis minaretur periculo, cum præfatis equitum Præfectis de *La-Barre* & *Ceridone*, defectum peditatus equitatu non tam in usum urbis nostræ quam in terrorem hostis supplere volentes, 8. Augusti convenimus, ut se in arcem cum equitatu suo transferrent: & promissum quidem ipsis in capitâ & septimanas trium talciorum unâ cum pabulo in equos, ultra quod à Rege merebantur, quandiu nobis adfuere, integrû, juxta quietationes nobis redditas, stipendium exsolvimus, sed exiguum sanè vicissim emolumentû exinde per-



de percepimus. Ac quoniam equitum Praefectus de La-  
Barre non Ille Cui De sed Dño Palatino Podolia Za-  
moyscio militia sacramento obstrictus erat, cautionem à  
nobis extorsit, si hac conventio fortè sibi fraudi foret, aut  
rejecto per Ilm Cui Um calculo ipsius damnum aliquod  
ac deminutionem in stipendio regio sentire cogeretur, il-  
lud nos resarcire, atq; in omnibus ipsum commilitonesq;  
ejus indemnes prestare cogeremur. Quae conditio tan-  
tam in hoc negotio difficultatem peperit, ut duodecimā  
demum Augusti summā ita necessitate jubente ad finem sit  
deductum, prout ad Regiam Aem & Ilm Cels. Um per-  
scripsimus. Sanè nos tanto sumtuum dispendio superse-  
dere potuissemus, si necessitati Arcis istius tempestive  
Respub. succursum ivisset.

Silenzio hic praterimus sumtus ingentes, quos durante  
obsidione in opifices ac operarios, quorum operis agrè ipsi  
carere potuimus, ad reparanda valla ac propugnacula  
arcis ruinosae & inermis contra hostiles impetus constru-  
enda, non pari quidem semper numero sed propè centena-  
rium aequante, conductos erogavimus. Tum quoq; quod  
ex conventionem cum praefatis Equitum Praefectis initā, no-  
stram manum, quae ad minimum 60. ad centum usq;, pra-  
ter equitatum, constabat viris, cum praesidio arcis con-  
jungere & tam in usum Arcis quam Urbis aggerum fossor-  
es ingenti sumtu, Belgarum more, durante obsidione ale-  
re coacti simus.

Pra-

Praterè cum jam hostis cum sua classe 160. navibus  
constante, jma Augusti ad ostium Duna appulisset, et quari à  
ejusdem ipsum flumen intrasset, castraq; metari ad Muhl-  
grabium cepisset, quippe potentior, quam cui copia nostra  
navales exiguae resisterent (qua tamen ipsa pro mediocri-  
tate virium suarum naviculas binas interceptas in pra-  
dam duxere) nos imbecillitatem nostram & absentiam  
exercitus campestris, in quo unice salus suburbiorum no-  
strorum sita erat, considerantes, non habitā ratione ullā a-  
dificiorum nostrorum magno precio secundā tertiāq; vice  
erectorum, molendinorum, hortorumq; excultissimorum  
nec non calamitatis & miseria inquilinorum, concordī  
omnium Ordinum suffragio decrevimus, incendio consu-  
menda, inq; cinerem redigenda suburbana omnia. Nec  
mora; jacturam hanc animosè aspernati, in sua quisq; adi-  
ficia & hortos se viri, certatim ignem ferrumq; immitte-  
re, arbores luxuriantes & fructiferas unā cum sepimen-  
tis hortorum excidere, in medio igni fumogq; quacumq; in  
circulo suburbano extabant, magno labore nec sine peri-  
culo solo aquare.

Quid ultra? Cum neq; Lubeca neq; Borussia, multi-  
plici ac numerosā militum collectione, p̄ quam crescere  
indies ac augeri in immensum stipendia necesse erat, e va-  
cnata, copias ullas nobis reliquas fecissent; In hac vero  
Urbe totaq; Livonia ac Curlandia, viris in Podoliam  
abductis, exhaustā non posset conquiri major militum nu-  
merus, quam qui (exceptis tormentorum Magistris) ad

F 2

treccen-



trecentos assurgeret; neq; subvenirent Gedano à Regiâ  
Mte atq; ex Lithvania ab Illmâ Cne Vâ flagitata ac pro-  
missa sepius præsidia, Nobiles Livonos quocunq; vellent,  
quorum aliqui operam suam nobis offerebant ipsi, ad id in-  
ducendor, eosq; tanquam viros strenuos ac militares me-  
diocri stipendio menstruo apud nos in communi hoc peri-  
culo alendos censuimus, ut hâc ratione copia nostra con-  
tra hostem auctiores redderentur: Verum illi majus  
quàm par erat & fortuna nostra paterentur, Equidem in-  
equites nulli nobis aut sanè parvo usui futuros, stipendium  
nec non alias immunitates ac libertates nos postulare sa-  
tagebant; ac procùl à Jove & fulmine nos solos furori sa-  
vientis Martis propinare, nostri infortunii spectatores  
agere, ac post nostrum naufragium, quocunq; fortuna in-  
clinaret, cursum suum dirigere se potius velle visi sunt,  
quàm nostra & communis miseria partem aliquam ca-  
pere.

Cujus farina plures quoq; inventi sunt, qui procaci-  
tati lingua plus nimio indulgentes Civitati insultare, ser-  
mones de bello spernere; postea verò ingravescenti in-  
dies descrimint una cum uxoribus ac liberis sese subdu-  
cere, ac Arcium custodiam vix uni aut alteri rustico-  
rum vel muliercularum committere non dubitarunt, ni-  
mirum hi ipsi, qui lingua potius quàm animo fortes in  
libero campo Rigenses sub sui iudicii censuram etiam-  
num vocant, nec vident mantica quod in tergo est: pau-  
cos No-

cos Nobilium excipimus, qui in urbem hanc commigran-  
tes ad subeundam nobiscum utriusq; fortuna aleam sese  
vigore certa cujusdam conventionis obstrictos esse vo-  
luerunt.

In tanto rerum defectu, cum nihilominus urbs no-  
stra pro virili defendenda esset, nolimus deesse officio  
nostro, aut animos despondentes hostis actiones ociosis  
oculis intueri: Quin potius fideles Cives nostros eorum-  
q; hospites, peregrinos, servitores, nec non operarios  
armis accinximus, latiq; disciplina militaris legibus,  
duktorum ac Officialium imperio parere jussimus, quem-  
cunq; tandem successum divinum numen largiturum  
esset.

Cum verò jam ordines virique armorum capaces in  
quadrifariam urbis regiones, arcem, aliaq; propugna-  
cula ac munitiones tam superiores quàm inferiores distri-  
buerentur, ex distractione virium nostrarum in varia  
loca infirmitudinem ac paucitatem præsidiarum oriri  
necessum fuit. Trecenti enim illi stipendiarii in tre-  
mibus ac munitionibus ad flumen, in Arce, in binis illis  
Semilunis ad pomerium porta stabularia, & ad pro-  
pugnaculum arenarium dispositi, continuis vigiliis ac  
molestiis mancipati sunt. Nec melior cives nostros  
ac incolas fortuna mansit, qui in amplis illis ac vastis  
quadrigenis urbis partibus contra hostem terrâ mariq;  
nocte dieq; nobis insidias struentem in præsidiis alienis



per vices locorum disordinati, toto obsidionis tempore  
vix arma, nedum vestes deponere, aut quietem ullam ca-  
pere potuerunt. Et quamvis ab Ill<sup>m</sup> Cne Vā tam su-  
bito hoc praesertim perturbatissimo Reip<sup>is</sup> statu, justum ex-  
ercitum, qui nostra defensione sufficeret conquestum iri  
valde dubitarem, ac recordatio eorum, quae antea Pro-  
vinciales in simili casu facere consueverunt, in varias ac  
incipites cogitandi curas animos nostros distraheret, non  
potuimus tamen nobis non polliceri certū de Ill<sup>m</sup> Cne  
Vā, eandem, sicubi ad decernendum acie cum hoste sese  
non satis instructam senteret, cum iis ipsis, quas haberet co-  
piis acceleraturam, & ad continuas preces nostras iustum  
exercitum praesidiarium in urbem introducturam fuisse.  
Quod sanē viis ad nos aditibusq; nondū interclusis factū  
oportuit. Hostis quidē posteaquā eductas ex navibus oo-  
pias, simulq; eas, quae terrestri itinere ad venerāt, lustrasset,  
ac fortissimis castris ad Muhlgrabium se munisset, contē-  
platus opportunitates locorum propius Urbem, in velita-  
ri pugna cum nostratibus penes palestram jaculatoriam  
quam perticam a viariam vocant inistā, de propugnaculis  
& turri arenariā strenuē, exceptus est. Sed postea 12. Au-  
gusti literis nos monere cepit, ut nimirum Internuncios  
nostros in castra ad Muhlgrabium mitteremus, qui cer-  
tis conditionibus secum ibidem paciscerentur, acceptoq;  
a nobis debito responso; (non esse videlicet muneris nostri  
tractare cum hoste, a Regiā M<sup>te</sup> Polonia in Comitibus eo

ipso

ipso mense celebratis vel subsidia idonea vel compositio-  
nis media, quae ne tūm quidem impossibilia visa sunt, ad  
affectationem nostram procul dubio decretum iri) non  
moratus diutius, a mane statim diei sequentis, nempe (13.  
Augusti) triremibus ac navigiis quibusdam, quae septem  
vehebant vexilla peditum, Dunā flumen adversum a-  
scendit, ac sine morā in Insula minori e regione arcis pro-  
pinqua sitā, aggeres struere; eodemq; statim die ingenti  
conatu & impetu ab hac urbis parte castra metari inci-  
pit. Esi autem virtuti nostratum in frangendis hosti-  
libus hisce impressionibus terrā mariq; factis, primā facie  
abblandiri fortuna visa est, benēq; sese dederunt initia,  
dum signis illis septem militum pedem referre coactis, in-  
signes binae triremes globis transverberata penē aquis  
mergerentur, quarum tamen altera machinis quibusdam  
bellicis & commeatu onusta, in pradam ducta, altera in  
aquis igni consumpta est; navis quoq; Iovis nomine in-  
signita vix evaderet, & militum non pauci interirent: de  
turri similiter, cui ab arenā nomen est, aliisq; propugna-  
culis ab hac parte certatim emissā globorum fulmina per  
medios viros ipsiusq; Regis tentoria ruentia, magno nu-  
mero obvias cohortes ferirent, proximos quoq; Regi ac  
Principi viros sternerent. Attamen quod in bellis solenne  
esse solet, non eodem diu fortuna lata permanfit loco, sed  
mutavit vices: Siquidem hostis iacturam suorum horren-  
dis tormentorum ictibus cadentium suisq; deq; ferens, eā

ipsā



ipsa nocte à ripâ Dunæ fluminis ad Hintzii prædium usq̃,  
atq̃, inde per montes arenosos usq̃, ad Mublgrabium lon-  
ginquos aggerum tractus fossasq̃, profundas perfici, pro-  
pugnacula itidem ligno terrâq̃, firmata (14. Augusti) in  
prædiis Hintzii & Ragemanni contra Illm Cels. Um erigi  
curavit, & circa vesperam è longinquo in Turrim, pro-  
pugnaculum angulare & Semilunium, quibus arena  
nomen indidit, dispendendi tormenta initium fecit. Tum  
quoq̃, penes D. Georgii Nosocomium (die 15. Augusti)  
validam munitionem extruxit; quam quidem primo di-  
luculo diei insequentis bini Regii equitum Præfecti no-  
stris militibus stipati adoriri atq̃, destruere connisi sunt,  
forti sanè impetu, sed parum felici successu, licet de vallibus  
quoq̃, & propugnaculis nostris conatus ille strenuè juva-  
retur; mox (eodem) penes prædium Wittenianum muni-  
mentum tormentarium vulgò Battoriam dictum, fun-  
davit, atq̃, ex eo globos 25. pondo in turrim nostram arc-  
nariam, de qua pridè ingentia hosti damna illata erant  
atq̃, nunc vices strenuè reddebantur, ejaculatus est: Po-  
stero die, qui erat decimus septimus Augusti, missis sine in-  
termissione in urbem globis, Prætorium, templa, adesq̃,  
quamplurimas ruinas deformavit, atq̃, novum insuper  
munitionis opus in horto Dñi Proconsulis Rami fieri fe-  
cit. Simili ratione intra paucos hosce dies ultra Dunam  
penes turrim, validum propugnaculum deproperavit, ex  
eoq̃, & aliis vicinis castellis in portas nostras, inq̃, ipsam  
urbem

urbem indefinenter fulminavit, ac nominatim triremes  
nostras adeò quassavit, ut ex alterâ maiore tantum non  
submersâ tormenta noctu versatili tympano extrahi vix  
potuerint, reliquæ in influentē paludem concameratam in-  
tra urbis pomeria subductæ atq̃, occultatæ fuerint; imò ut  
ne equos quidem suos equitū Præfecti in arce tanto jaculo-  
rum discrimini obnoxia, sed in urbe potiùs alendos existi-  
marent, ipsi verò excubias ibidem alternatim agerent.

Aperire quidem dignata erat Illma Cdo Vra nobis (15.  
Augusti) per Guilhelmu Barberium Gallum, suum de  
turbandis per impetum Kazakorum Lysowscianorum  
ab hac parte hostis machinationibus, & de suâ impressio-  
ne ab illâ parte in hostem faciendâ, consilium; ad quod per-  
ficiendum nostras quoq̃, vires cum Illm Cdo Vra con-  
ungere, triremibus ac navigiis nostris eidem adesse, tormenta  
pulverem, globos, palas, aliâq̃, instrumenta bellica com-  
municare jubebamur: Verum cum jam hostis à discessu  
Barberii, loci, quem ipse aliiq̃, paulò antè lustraverant,  
opportunitatem occupasset, aggeribusq̃, eundem firmasset,  
facile videre fuit, nullam superfore rationem consilii  
istius in effectum deducendi. Unde non vana animos  
nostros subit sollicitudo, nâ subito Illma Cdo Vra nobis suc-  
cursum veniret, omnes viarum aditus adeò occlusum  
iri, ut impossibile deinceps futurum sit Illm Cdo Vra mul-  
tis millibus ad nos auxilio suo sublevandos percurrere:  
quod ipsum exitus postea comprobavit. Quare expedi-  
tis hinc



tis hinc (18. Augusti) per medios hostes & circumstantia pericula Nobili Friderico Buring & villico nostro Henrico Wessel *Illm Cels. Vm*, praterquam quod jam antea à Barberio ac variis nunciis nec non ex literis nostris statum nostrum didicisset, denuò de ingravescenti indies obsidione nostrâ informandam, ejusdemq; opem ac auxilium, antequam ab hoste arctius constringeremur, impetrandum duximus.

Interea temporis hostis minimè ociatus est: Etenim versus portam arenariam nocturno tempore fossas triplicatas & sinuosas, usq; ad molam aquariam, atq; inde ulterius per hortum Michaelis Brauweri Pharmacopola usq; ad stratam lapidibus plateam ante D. Jacobi portam, prope ipsas urbis fossas, ac simul eadem operâ ex iisdem fossis suis in distinctis locis, prout quisq; commodus ipsi visus est, mirabili celeritate, munitiones (quas Battorias vocant) tam veras quam fallaces seu imaginarias duci erigiq; curavit. Ex quibus (die 20. Augusti) angulare propugnaculum Jacobaeum, & imprimis laterales nostras munitiones continuis validisq; tormentorum ictibus non incassum verberavit. Sed de nostris quoq; propugnaculis hosti satis iracundè responsum fuit: Unde & Chiliarche seu Tribuni Sittonis munimentum unâ cum machinis ibidem positis disturbatum est.

Posteris diebus fortalitiâ sive castellum in insulâ Ebbiand, ex quo nostratum non pauci, homines, equi, qui a-

quam

quam è Dunâ haustum ita verant, petiti sunt, & alia bina castella sive munimenta ad intercludendum planè per aquas transitû, alterum in insulâ Dn. Proconsulis Iannis Friderici, alterum è regione in Jesuitarum nimirum insulâ Düwelsholm dictâ, erecta sunt: qua nos summis viribus, de vallis, aggeribus Duna, triremibus ac navigiis nostris fulminando, impedire, sed frustrâ conati sumus; in quâ tamen pugna utrinq; non pauci prater vulneratos mortem oppetere.

Die 23. Augusti ex omnibus simul munimentis suis hostis terna propugnacula nostra angularia & turrim arenariam vehementi & continuâ globorum 25. & 50 libras pendentium explosione quassa vit, adeò, ut contignatio turris superior decideret, dictaq; propugnacula non leviter concuterentur; lorica quoq; licet 20. ampliùs pedes Geometricos lata essent, pertinaci globorû vi perterebrata, securitatè excubantibus prestare vix possent. Eundem globi majores mille ampliùs hâc die (quam vis non minore ferè numerum alii dies sibi vendicent) in urbem immissi sunt, à quibus templa, turres ac adificia nostra sedè deformata fuerunt. Quare considerantes periculi indies crescentis magnitudinem, eodem die iteratò piscatores eos, qui ultra fanum D. Barbara, decimo ab hinc milliari, apud *Illmam Cels Vm* in castris aliquantò diutius detenti, tandem sine responso literario per tot viarum discrimina 1. Septemb. reversi erant, sub conticinium noctis hinc Cym-

22. Augusti



bâ quâdam summo cum vite discrimine ad l<sup>m</sup> Cdm Um expedivimus, ab eâdemq, ut succenturiatam tandem nobis opem ferret, instantissimè rogavimus, præsertim cum ad varias literas Et tabellarios nostros nihil dum hucusq, nobis responsum esset.

Hostis verò de die in diem nostras munitiones quassare non desit; unde magna turris arenaria portio (24. Augusti) deturbata, ac turris Curia sæpius trajecta est. Et noctu quidem etiam navigiis in Semilunium seu Semicirculum pomerii stabularii Et aggeres Duna tentata est impressio, sed hostis inde suo imò Et nostro detrimento viriliter repulsus abiit. A molâ deinceps arenariâ, (25. Augusti) fossa ad ipsam usq, Civitatis fossam producta, Et bina munimenta extructa sunt, alterum in superficie domus cerdonis non procul à pomerio porta arenaria, alterum ad portam D. Jacobi penes hortum Happachu; simulq, mortaria ignivoma in iisdem posita ac plantata, latera quoq, propugnaculorum Civitatis totum diem valdè conquassata, insigniterq, corrupta sunt.

Neg, verò etiam nostra siluerunt propugnacula, de quibus missa tormentorum tonitrua sævisimè in hostes grassata sunt, ac obvia quaq, nunc crates vimineas, nunc tormenta, tormentorumq, Magistros, nunc Officialium magnam partem rapuere, præter eos, qui de grege militum cecidere, uti à transfugis postridie nobis relatum est. Nec mirum quod Et hîc Et illîc continuâ Et perpetuâ illâ jaculatione tormenta nonnulla disrupta sint.

Hâc

Hâc nocte hostis denuò latus urbis quod Duna alluit navigiis adoriri conatus, sed retrocedere coactus est. Durante verò totam noctem mutuo jaculantium certamine, dum streperent creperentq, utrinq, bombardæ, ecce piscatores illi summo in periculo versati redeunt, Et literas responsorias Ill<sup>me</sup> Cnis Va die <sup>2. Septemb.</sup> <sup>23. Augusti</sup> in castris anonymis exaratas, interjecta hætenus mora indices nobis exhibent. Quibus perlectis, quod nonnihil temporis quidem collectioni majoris exercitus, qui erecto ultra Dunam propugnaculo perumpendo sufficeret, datum esse; nunc verò Ill<sup>m</sup> Cels. Um copiis auctiorem tandem rectâ ad nos tendere, atq, ad expediendam salutem Civitatis etiam cum capitis sui periculo, brevi se hosti ac Civitati conspiciendam præbere velle, significarent, idq, ipsum etiam nobis Dñi Benedicti à Wahlen equitum Præfecti schedula solati plena confirmaret, ingenti latitudinē tota nobiscum Civitas perfusa est, præsertim cum nocte dieq, insequenti globis utrinq, inter se certantibus, classicum in urbe caneretur, Et concursus undequaq, fieret.

Sed non solidum nimis hoc gaudium fuit. Hostis enim eâdem vehementiâ (27. Et 28. Augusti) propugnaculis Civitatis tam angularibus quàm lateralibus extreme conquassatis in Semilunium arenarium se dire perrexit, plurimosq, nostratum e medio sustulit, candentesq, globos jacere in urbem cepit. Insuper omnes viarum exi-

G 3

tus Et



tus & diverticula, quæ solus Dunæ fluvijs reliqua adhuc fecerat, munimentis ac navigijs hinc inde dispalatis arctissimè clausit, adeo ut ne sagacissimis quidè tabellariis nostris, licèt eadem quâ antea astrictâ transitum sepius molientibus tranare liceret. Sanè tantus furor hostis atq; indefessum in oppugnandâ urbe nostrâ studium fuit, ut una hora 90. & 100. amplius globos 25. 50. etiam 64. pondo in nostra propugnacula explosos numerârit, à quorum reparatione, quæ magno labore, sumtu ac periculo constabat, nulla nox immunis mansit. Hâc quoq; diè porta arenosa exterior, atq; interioris fastigia convulsa ruebant: conatusq; est hostis (29. Augusti) nocte clandestinâ virgultis fossam Civitatis sub Semilunio arenario adimplere, sed cum plurimi hinc inde caderent cessare ab opere incepto coactus est. Quid multis? perire quidem non pauci militares ac strenui viri, qui eorum ducere contra nos & viros præ cæteris se ostendere voluerunt, machinis ancis ac sclopetis longioribus nostratium ictis; ac tùm quoq; cùm terrestri & aquatico apparatu in Semilunium propugnaculi, quod ad portam stabuli est, nocte quâ diem 35. Augusti antecedebat, tentaretur irruptio, plurimi, fugatis cæteris, mortem aut vulnera in prædam reportârunt: Sed tamen nostrates quoq; eadem fortuna belli exceperit; nunc hîc nunc ibi cecidit alius, aut saucius ingemuit, sive civis ipse, sive in civium numero militaret; nunc optimus quisq; ex iis, qui machinis bellicis præ-

sunt,

sunt, discerptus, nunc stipendiariorum pars magna jactis in Semilunium pyrobolis (quos Granadas vocant) vulnerata, ambusta, miserèq; perempta jacuit. Cum itaq; robur militare tali indies ratione decresceret, atq; infirmitudine non minùs ex continuis vigilijs, molestijs, ac laboribus contractâ, eorum qui arma capefferent contra hostem numerus minueretur, convocari in domum collegiatam mercatorum cives ac quicunq; ætate militari essent, jussimus, eosq; ut in eodem virtutis ac fortitudinis cursu perdurarent, admonitos, Illæ Cnis De adventu & spe propediem adventuri auxilij solati sumus, propositis honoris ac utilitatis premiis iis, quicunq; in primâ statione contra hostem pugnaturi ac caput periculis obiecturi essent.

Hæc cum auribus animisq; accepissent, & ad arma hilari vultu plenisq; spei animis vix digressi essent, ecce repentinus totam urbem pervasit rumor, adesse quasi Deum ex machinâ Illm Cm Vm & se cum vexillis suis ultra Dunam conspiciendam præbere. Tùm verò superfundente sese læticia vix temperatum est, certamen in gaudio fuit; juvenes, pueri, senes, fœmina, mares, voce manibusq; significare publicam lætitiâ; non audire eos, qui volitantia signa videre; multum sibi deesse ad gaudij summam rati, nisi etiam oculos quisq; suos lachrymis, quas perpetuus angor pueris fœminisq; expresserat, madentes, hilari hoc spectaculo passum refectumq; irent;

Idere



Irere omnes, quicunq; ire vel reptare poterant, alii an  
 Dunae aggeres se proripere, nil veriti glandes hominum.  
 equorumq; voraces; alii in valla globis undequaq; vo-  
 lantibus obvia; alii turrium cacumina antehac nun-  
 quam à se trita, aut nunquam terenda fortè deinceps, spe-  
 ctatum jucundum pugnae praludium scandere, nec machi-  
 nas in se directas timere. Irremibus confestim è concame-  
 rato supra influentem pomærio, ubi in hunc casum parata  
 servabantur, in altum eductis, Christophorus Bireken de  
 Boitzenburg Capitaneus noster, per medios hostes ad ri-  
 pam, quâ Ill<sup>ma</sup> Cdo Va perruptura credebatur, viam sibi  
 querere conatus est; reliqua navigia ac cymba, quid ul-  
 trà mandaretur, & quonam sequi deberent, expectare  
 iussa. Sed ciues nostri nondum perceptâ Ill<sup>me</sup> Cnis Ve  
 intentione & consilio, cæco quasi impetu ducti; Ad quid,  
 inquiunt, moras inanes necitimus? quin coniecti in cym-  
 bas munimenta (erant illa in insulâ Ebbenii, Saggeri, &  
 in prædio Rigemanniæ contra vim munitissima) adori-  
 ti, viam Ill<sup>me</sup> Cni Suae certò ad nos perruptura sternimus?  
 Et, ingredièrè naves, trajice Dunam, frustra prohibente  
 Senatu, inter se quoq; gratificantes Ill<sup>me</sup> Cni Va clamare,  
 laudare signa, laudare equites hastatos, diem ipsum laudi-  
 bus ferre, quò Ill<sup>m</sup> Cels. Vm Liberatorem suum adesse cer-  
 nerent, miseria sua & tam arcta obsidioni finem factu-  
 rum, dignum cui vitam fortunâq; suas unice acceptas  
 terrent.

Erant

Erant tamen qui rem aliis perpendentes modum læ-  
 titia sua imperabant, solliciti, ultrâ quid futurum esset;  
 inprimis cum nondum collatis cum Ill<sup>ma</sup> Cels. Vâ sentien-  
 tiis res cœpta esset, & à celeritate, in quâ maximè negotii  
 feliciter expediendi cardo versabatur, fortuna non staret.  
 Etenim licet Ill<sup>m</sup> Cels. Vm cum copiis suis ad montem usq;  
 explicato ordine progressam, in ipsum deindè propugnacu-  
 lum globis de monte jactis pulsatum imperterrito animo  
 per media discrimina impetum facere, cum hostibus extrâ  
 se proripientibus pugnam velitarem variâ victoriâ &  
 ancipiti Marte inire, castra quoq; (quanquam in loco  
 non satis tuto) totâ nocte posita videremus; attamen cum  
 subito hostiles undiquè copiae equestres, pedestres, ad pro-  
 pugnaculum confluerent, facilè ex ipsius loci situ conjeci-  
 mus, diu Ill<sup>m</sup> Cels. Vm, nâ claudi a veret, ibidem morari  
 non posse, atq; subito in ventos abiturum gaudium tam  
 subito exortum. Nihilominus gratulabundi de felici ad-  
 ventu Ill<sup>me</sup> Cnis Va nuncium nostrum cum literis, nocte  
 silenti, quid animi Ill<sup>ma</sup> Cdo Va haberet, quidq; à nobis  
 fieri vellet, exploratum misimus. Sed spe desiderati re-  
 sponsi frustrati sumus. Etenim Ill<sup>ma</sup> Cdo Va comperta,  
 majorem esse hostis in munitissimo illo loco potentiam,  
 quàm quæ viribus Ill<sup>me</sup> Cnis Va frangi aut superari pos-  
 set; castris se tenere, non satis securum videri; nec viam  
 esse, quâ annona subveberetur clausis; aut, imminutâ  
 hostium manu, mutua auxilia ac copia utriusq; nostrum

H

conjun-



conjungerentur; (quamvis praefatus Capuanus noster postero etiam die fortiter irremis in hostem irruere, repam, quae ab illa parte Duna est, aucupari, atq; viam Ill<sup>me</sup> Cui<sup>us</sup> U<sup>bi</sup>, non sine caede ac sanguine nostratum, ad nos perveniendi aperire summo studio anniteretur) capto in arenam consilio, altera statim ab adventu suo die (nempe 31. Augusti) media castra sua in quibus Ill<sup>me</sup> Cui<sup>us</sup> U<sup>bi</sup> discumbent globi tormentarii non leve creaverunt periculum, incensa à se deferenda censuit, eoq; ipso nos inter spem et metum anxios magis reliquit, qui ad in votis unice habuimus, ut vel per hunc ipsum nuncium ratio consilii istius et causa dantaxat abitus nobis aperta fuisset; is vero Skaddiam usq; 31. miliaria Ill<sup>me</sup> Cui<sup>us</sup> U<sup>bi</sup> sequi coactus, inde demum cum dubio responso ad nos remissus est.

Super repentinam hanc rerum vicissitudine lata totius Civitatis facies mutata, vultus hilarabundi tantum non in lachrymas versi, ac tristis silentio defixi plurimum animi, hoste imprimis clamore ac fragore bombardarum triumphos super abitu Ill<sup>me</sup> Cui<sup>us</sup> U<sup>bi</sup> ac jubila passim sonante, ac Theonino morsu ex aggeribus suis ac fossis prope urbem sitis, fugam (ita discessum Ill<sup>me</sup> Cui<sup>us</sup> U<sup>bi</sup> nominabat) nostratibus excubias agentibus exprobrante, atq; eo ipso indubitatam sibi iam animosiori spem potiunda urbis factam gloriantem; nostratibus vero sub tanta gravissima obsidionis mole tandem se succubituros subverentibus. Quanquam nos rationes, quibus mota Ill<sup>me</sup> Cui<sup>us</sup> U<sup>bi</sup> abiit, altius perpendentes,

pendentes, in communi hac tristitia dolori nostro modum statuimus; quod, cum è speculis turribusq; nostris hostiles copias pedestres ac equestres sursum deorsumq; Dunam immenso agmine conglomari prospiceremus, quae facili negotio Ill<sup>me</sup> Cui<sup>us</sup> U<sup>bi</sup> obsessis undiq; viis cincta, necessitatem pugnandi in loco importuno impositura essent, Ill<sup>me</sup> Cui<sup>us</sup> U<sup>bi</sup> opportuno tempore abiturum molita, se suosq; servavit; spe freti non dubia, Ill<sup>me</sup> Cui<sup>us</sup> U<sup>bi</sup> brevi majori cum fructu auctis viribus ad officium rediturae. Hac dum fiant, hostis obsidioni majori virium conatu incumbendum sibi ratus (1. Septemb.) vigilantiam nostratum et alacritatem ab omni parte tantopere exercuit, ut armis perpetuo accinctis nulla quiete ac securitate penè perfrui liceret. Jamq; promotis noctu propius Semilunium, quod propugnaculo arenario adheret, et ad ipsos semilunii pedes vineis ac gerris suis, nova caede nostratum, qui conatui huic obstiterant, causam dedit: eademq; opera, munimento quodam propè cataraclas pomerii exterioris adstructo, ad cuniculos nostros in fraudem suam paratos penetrare conatus est; cui cum nostrates cataphractariis lanceatis stipati strenue obviam irent, catapultis ignis vomis (quas Granadas vocant) in Semilunium projectis magnam stragem edidit: Similiter cum machinis majoribus utrinq; hisce binis diebus valide certaretur, et hinc et illic magna caedes edita est; hostium verò etiam quam plurimi bombardis ac sclopetis nostratum sigillatim percussi nullam non die ceciderunt.



Continuis hisce fulminationibus diei addita nox, noctiq; dies altera, quâ templa turreſq; quaterna templorum ac Prætorii quoq; insigniter lancinata, ac in æde D. Joannis à ly. hnucho penſili deturbato plurimi terrore plagisq; perculſi ſunt; ab ignitis globis ferreis fornices D. Petri, ædiumq; tecta paſſim incendium hauſere, quod tamen opera ac indiſtriâ eorum, quibus reſtinguendi ignis provincia in quaternis urbis partibus demandata erat, per Dei gratiam mox reſtinctum eſt; glandes verò plumbeæ ſclopætorum, quemadmodum durante obſidione, ita nunc imprimis denſiſſimè, in arcibus domuum, in templis, inter ſuggeſta ac populum, dum ſacra fierent, volare ac decidere viſa ſunt, quibus tecta ædium ac templorum valde ſunt conquaſſata.

Atq; his ita peractis, denuò per tubicinem hæc ipſa 2. Septemb. die cum literis ad nos miſſum, hoſtis dedi ſibi urbem, poſteaquam ſubſidiaria Polonorum manus jam fugiſſet, poſtulavit. Deductus ille eſt, re cum Dño Caſtellano Gotthardo Joanne à Tiſenſauſen aliisq; Nobilibus, nec non cum Dño Vice-Capitaneo ac Reviſore Arcis Rigenſis & Regis equitum Præſectis deliberatâ, in urbem, litera acceptata, & in conſilio conſueto recitata ſunt, communicatoq; cum præſatis Dñis conſilio, de reſponſo dando conſultatio ſuſcepta eſt. Sed cum προβόλευμα illud, an tubicen iſte ſalvo conductu donandus, & cum literis in urbem receptandus eſſet, diſparitate votorum ac ſententiarum juſto diutius protraheretur, hoſtem in propugnaculum an-

lum angulare arenarium & Semilunium ejusdem violentam impreſſionem facere nunciatur: Inde claſſicum canitur, ad vallorum deſenſionem ſummâ contentione feſtinatur. E Mansfeldianâ cohorte audaciores quosq;, cum quibus incurſionem molientibus noſirates ſtrenuè dimicabant, Mars jure ſuo pignoratus eſt, alii cuniculis in eum caſum preparatis in aërem diſjecti vitam finire. Proximè inſequentibus diebus (3<sup>tiâ</sup> 4<sup>tiâ</sup> Septemb.) ſimiliter varias hinc inde turbas interdum nocturnq;, utrobique, tam ex caſtris quàm navibus hoſtis dedit; eiq; beneficio ſoffarum occultarum publicam Civitatis ſoffam aquariam ſub Semilunio virgultis adimplere fruſtrâ impedito, facile fuit, gerras ſuas lorica aut prætentura Semilunii ſuperſternere, cùm huic conatui, infra tormentorum lineam, non niſi violentâ excuſſione, quam nec locus ille nec vires noſtra admittebant, obviam iri poſſet: Attamen præmiis ac brabejis propoſitis, ſtipendiariorum fortiſſimum quemq; induximus, qui gerras iſtas harpagonibus diſturbatas incendio abſumerent, hoſtemq; munimento expellerent. Tentata, quæ conſuluimus, fortiter, peracta feliciter: gerra alia diſturbata, alia incenſa, nequicquam hoſte hoc facinus impediente, ſed tamen Granatis ac miſſilibus ignivomis in Semilunium jactis, plurimi etiam noſtratum peremti ac vulnerati ſunt. At verò quia hoſtis eo in nido pedem firmiſſimè fixerat, facile negotio denuò ibidem evaſit ſuperior & fortior.



Cum itaq; propugnacula angularia ac munitiones laterales ad D. Jacobi & Arenariam, Novamq; portas indefinenti tormentorum fulminatione magis magisque destruerentur ac corruerent, nos vice versa dies noctesq; fabros lignarios, murarios, operarios, cives ipsos, eorumq; servitores operi accinximus, ac per eosdem nil cade trium, quatuor, quinq; ac plurium singulis noctibus pereuntium deterritos, loca ruinam passa summo studio, assiduo labore ac sumtu restaurari fecimus. Productis prater ea aggeribus suis ad fossas usq; Civitatis propè Jacobinum propugnaculum, erectisq; duobus munimentis, hostis, ejusdem propugnaculi pinnas validè quassatas deiecit, inferiores loricas ad basin Valli exstructas glebis gerrisq; deturbatis adimplevit, locumq; ad repellendam hostilem irruptionem planè ineptum reddidit. Mox pontem superne ac utrinq; linteamine tectum ac vestitum hora octava matutinâ, summâ celeritate ac vehementiâ fossa aquaria Civitatis superinjici jussit, operâ ac studio Joannis Jacobi fabrorum lignariorum Magistri & N. Hornikii excubiarum in cohorte Mansfeldianâ Praefecti, quos promissione egregia remunerationis delinitos ad tentandum hoc facinus Regia M<sup>tas</sup> induxerat: Pons verò ille, noctis tenebrosa beneficio, per eos qui fossam aquariam transerant, fune crassiori ad palos lorica inferioris alligatus, cum multo quàm par erat longior esset, in curvaturam retortus est; Et nihilominus Hornikio super eodem ponte cum

te cum militibus suis praecunte, reliqua manus auctore ac Duce Jacobo Sittonio inprimis, aliisque Capitaneis, strictis gladiis ad irrumpendum compulsâ, lorica inferiore conscendere; Alia quoq; Sittoniana chiliâ sive Regimentum ut dicitur, in propugnaculum Semilunare porta arenaria similem irruptionem facturum, utriusq; propugnaculi extremitates occupare sat agebant. Quae conamina quò feliciter cederent, tormenta in nostrates strenuè reluctantes, & solo petis alternas vices reddentes directâ ac explosa sunt: At favente nobis fortunâ, pons ille ita redintegrari non potuit, ut ordini statario militum transcurrentium ferèdo par esset, quin insuper de propugnaculo angulari arenario noctu iterum reparato, ictu grandioris machina rumpitur, mergiq; capit. Unde militum alii, rupturâ pontis disjuncti premere vestigia eorum, qui lorica jam tenebant, non poterant, verum & hi & illi praesens periculum evitaturi, gradum referre, atq; ad munimentorum aylum conuigere sunt coacti. Magna hic caedes utrinq; facta est; Capitaneo Sittoni crus vulnerato mutila pars deinceps recidenda fuit; vexilla bina nova, alterum aquilâ candidâ Regni, alterum equo sylvestri Magni Ducatus Lithvaniae insignibus decorata, tum primâ vice hosti ostentata super propugnaculo D. Jacobi angulari, binis signiferis nostris è manibus tormentorum vi excussa, quorum alter, simulq; cum ipso non pauci circum juvenumq; ac eorum, qui tormentis praesunt



sunt & operantur nec non militum ac operariorum ex acceptis ante hostem vulneribus paulò post periére; unus de quatuor Senatoribus, quorum singuli singulis civium classibus præsunt, graviter vulneratus periculum vitæ adit.

Sedato hoc tumultu, Tubicincm, qui à 2. Septemb. hucusq; detentus erat, literali responso instructum (5. Septemb.) dimisimus, cum eâ declaratione, constantissimè nos penes Regem ac Rempub. Polonam persequeratos, etiamsi extrema nobis fortuna subeunda foret. Tum verò sollicitudo hac animos nostros occupavit, nullum non moturum lapidem hostem, quò pontem, quem diximus, cum aggere siue loricâ combinatum ad impetum redintegraret; proinde maturato consilio, circulus non tantum piceis de propugnaculo jaciendis, sed aliis etiam artificiosis ignibus cymbâ reconditis, eundem incendio absumendum, atq; ex compactâ in fossâ urbis trabibus rate, quæ undiq; circumtectâ tormenta vehebat & magistros, globis catenatis dirumpendum censuimus. Non cessit hæc nocte consilium incendiis, variis ac numerosis excubitoribus tum iusto ordine inter se dispositis insidias avertentibus; interim tamen subimpletam glebis gerrisq; loricam inferiorem, procuratione Dñi Sub-Camerarii aliorumq; ex civium numero ad id deputatorum, per fossores mercenarios, non sine periculo (tormenta enim jam antea in hanc lineam directâ, statim ac ex motu indicium laboris sumtum est, non parum damni dedere) repurgamus, nec non munitiones superio-

superiores ac laterales valdè labefactas, ad hostem facilius repellendum, reficimus; & nihilominus de rate compactili, dum hæc fiunt, in munimentum hostis & pontem machinas præfatas, quantum possumus, exoneramus. Sed hostis similiter eadem nocte, biremibus in Dunâ flumine magnâ copiâ adventantibus, aliud machinari visus est, ad cuius insultum excipiendum omnia tam in urbe quam in arce parata esse oportuit. Noctē verò quæ sextam Septembris diem precedebat, operâ juvenis cujusdam mercatoris ignis ille artificialis pontem corripuit, & quæ aquam pertingebat totum combustit, cuius restringendi studio licet flagraret hostis, continuis tamen jaculationibus nostratum adversus est.

Cum itaq; videret, destructo ponte tum in eo loco sibi rei agenda occasionem ademptam esse, in agendis cuniculis ad propugnaculum arenarium majori quàm antea studio perrexit. Nos verò plures cunicularios ex stipendiariorum numero conduximus, qui ministerio operariorum suffulti ad cuniculos hostis in Semilunio cuniculos contrarios agerent, & ab interiori quoq; propugnaculi parte caput siue fontem cuniculorum in omnem eventum derivarent. Porro & alia opera instans periculum perficere nos iussit: Ex consilio peritiorum rei bellicæ, crudelem militum nostrorum & perpetuam lanceam Semilunium, intersectum, novo aggere fossâq;, quæ vallo utrinq; jungebatur, præmuniri, portas quæ Dunam respici-

I

uni in-



unt infirmiores, operâ civium obstipari, nec non compagem trabium densissimam tergo portæ arenaria, cuius claustra propemodum revulsa erant, agglutinari, terrâq; suppleri; similiter & loricas recentes vallorum, ligneas munitiones, pavimenta fenestraq; machinales reparari, atq; alia necessaria opera assiduis hominum equorumq; laboribus diurnis ac nocturnis fieri iussimus. Verum enim verò hostis, tam cuniculariorum (quorum numerus in tot partes dividi poterat, ut ternæ hora in orbem operi attribuerentur) quam ararii Svecici viribus, majoribus quàm quibus exhausta nostra Civitatis reliquæ responderent, subnixus, nostrates assiduo labore subterraneo penè confectos superavit. Adhuc variâ fortunâ æquo tamen Marte in ipsis cuniculis pugnaretur, ita ut, quò visus auditusq; raperet, alter in alterum cominus hastis gladiisq; saevirent, nostrates in superjaculis igni vomis seu Granadis in hostiles cuniculos projectis irrumpentibus strenuè obsisterent; tandem tamen res Svecica fuit superior, nostrosq; ad latus declinare coëgit: Qui tamen sequenti nocte animosè in cuniculo isto adversus hostem tuendo se gesserunt, ut iactis in hostem missilibus super inventis eum loco depulerint. Postridie hostis celeritate suâ & numero nostros fossores circa meridiem antevertit, ac magnâ vi ad nostros cuniculos ac simul ad inferiores munitiones portæ proximas penetrare laboravit; atq; Semilunio jam jere potius erat; denno tamen à nostris

stris cum damno suo repulsus fuit: de laterali quoq; propugnaculo ad portam Jacobi ita excepti fuerunt oppugnantes, ut non pauci, sicut ex loco sanguine consperso apparuit, interierint.

Sed nec hostis sibi defuit, quin ex ingentibus tormentis, qua mortaria vocantur, saxa stupenda magnitudinis in Civitatem misit, ac simul reliquis grandioribus tormentis globos ignitos ejaculando vicem suam ultus est: Ubi iterum nonnulli civium nostrorum in vallo consistentium nec non aliquot equites in arce perierunt, qui partim extincti, partim semiamines in domus suas deportati, magno cum uxorum & liberorum ejulatu excepti fuerunt. Quin singulis diebus tam cives quàm juvenes, milites, tormentorum magistri & operarii ab hoste intercepti, nec parvo numero sepultura mandati sunt: pluri præterea vulneribus affecti, ac diuturnis laboribus, durante obsidione, debilitati in gravissimos morbos inciderunt, atq; hoc modo propugnantium numerus valde fuit imminutus.

Postridie, qui erat Dominicus & nonus dies mensis Septembris, hostis majoribus tormentis & saxorum ejaculationibus, in quibus aliquot, centum & sexaginta librarum pondus æquarunt, Civitatem petere strenuè perrexit, idq; sub ipsum sacrorum tempus, quo euntes ac redeuntes è templo periculis obnoxii fuerunt; lapides enim & igniti globi passim in plateas & forum decidebant: inter-



rum cuniculariis hostilibus sub artificioso tecto, ad Civitatis fundamenta penetrare satagentibus, presente militia nostra praefecto, sarissus & gladiis utrinque pugnatum fuit; eoque in conflictu non pauci occubuerunt.

Porro sub tempus vespertinum summa vi nostros cuniculos invasi, & mox Petardam, ut nominant, ibidem occultatam succendit, opus nostrum violenter disiecit, in quo praedictus Dominus Praefectus, dum intentius operi incumbit, summum vita aut captivitatis discrimen adiit: hujus invasionis successum & eventum ipse Rex cum Principe fratre ac supremo belli Duce (ut postea compertum fuit) e loco propinquo speculati sunt; atque in hoc demum conflictu miles Civitatis e textorum sodalitia ab hoste capitur, qui statum Civitatis detegere ac revelare coactus est; quo audito, hostis ad cogitata & consilia sua exequenda, imprimis vero ad hemicyclum seu Semilunium occupandum animatus fuit; nec mora, integrum militum regimen ad invadendum locum mittit; duo Capitanei Joannes Bannier & Laschapel Gallus, quibus se postea Most Scotus de Mansfeldicis copiis junxit, principium invasionis fecerunt, & propugnaculo nostro jam ante ad radicem semidiruto, nec non inferiori munitioni pertinaci assultu imminere coeperunt, ac quominus in suo proposito tardarentur, liberumque aditum ad propugnaculum Jacobeam sibi patefacerent, Petardam ad portam inferioris munitionis affixam inflammaverunt, fumo quoque tecti, magna vi nostros adorti sunt, ac in supremam loricam non-

nulli

nulli strictis gladiis evaserunt. Mansfeldicas copias Gustavus Horn cum suo regimine subsequutus est, & nostros graviter exercuit.

Non cessatum quoque est a nostra parte modis omnibus efficere, ut consilia hostilia frangerentur: itaque ex duobus tam nova porta quam Jacobi propugnaculis & occultis lateralium munitionum fenestris noctu preparatis, grandiora tormenta in subeuntes frequenter displosa, tum e superioribus locis ad portam arenosam, saxa, trabes, pices circuli, artificiosi ignes & machinulae, Granaten dicta, devolutae & projectae sunt; milites quoque inferius collocati viriliter assilientem hostem tam Germanum quam Suecum aliquoties repulerunt, quo in certamine filius Laschapellex Vexillifer promptissima audacia, paternam vocem animatus, cum aliis Officialibus & militibus, ac cum ipso Petarda magistro (ut ex loco superiori vidimus, ac captivi postea retulerunt) occubuerunt. Tandem hostis multitudinem superans & praevalens inferiori munimento & basi propugnaculi arenarii per vim potitus est; ac dum nostros in superiori parte Calibz in profligandis irruentibus occuparentur, cespitem fodere, ac introrsus latibula parare festinavit, omnesque nostrorum ex cavernis ejicere eos molientium conatus & labores elusit. Atque in hac pugna ultra centum civis, milites, artifices misere perierunt.

Nihilominus nocte sequenti super istis propugnaculis nova munitiones subitaneo opere excitata atque utrinque defensionis remedia adhibita sunt, aggeres fossaeque ductae,

13

quibus



quibus pars laesa & occupata à reliquo corpore recideretur, hosti<sup>q</sup> usui non esset: consularum quoq<sup>ue</sup> fuit, an ullà ratione hostis ex suis latibulis expelli ac vallum liberari possit, dictisq<sup>ue</sup> variis sententiis, ut cuiusq<sup>ue</sup> ingenium ac experientia tulit, tandem placuit postridie summo manè eruptionem improvisam esse tentandam, fortè cunicularios exturbare aut in suis cubilibus cœdi posse: quam ad rem perficiendam reliqui civium, militum, juvenum, mirificam alacritatem præ se tulerunt. Igitur sub diluculum diei decimi Septembris parati omnes aderant, destinata executuri; pars per arenosam, pars per Jacobeam portam exiverant, ac vigiles hostiles jam ceciderant. Ceterum rem aliis perpendentes prudentiores & diu in militiâ versati consilium esse summo cum periculo conjunctum viderunt: tam valido enim exercitui reliquas Civitatis & exiguas per se vires simul objicere temeritatis summa esse judicârunt, itaq<sup>ue</sup> in ipso executionis acturevocati sunt. Sequenti die, habito cum peritioribus consilio, e re visum fuit, principalem cuniculum perficere, vallumq<sup>ue</sup>, quantum vires sinerent, summâ celeritate scindere, ac nova opera extrahium contignationibus in locis commodis festinanter extruere, unde hosti irrupenti visumâ resisteretur. Quamvis autem à nonnullis latior quedam divisio sive separatio valli interioris ad mœnia usq<sup>ue</sup> Civitatis ostenderetur, ubi novo propugnaculo opus esset, quod altissimis fossis pramuniretur, unde tutò tormenta

menta majora in subitum hostem exonerare liceret: tamen à nobis Capitaneis & rei bellicæ periti per spectum fuit, rem esse majoris laboris, quam qua intra aliquot septimanarum spatium perfici posset: hostem interim, qui nocturno tempore jam propugnacolo potius erat, continuato labore subter propugnaculum dilatandis cuniculis acriter: hæc re, omniaq<sup>ue</sup> ad assultum validissimum diligentissimè preparare; nec obsisturum ei novum propugnaculum, cum ex alterâ parte liberum transitum ad reliqua munimenta, valli longitudinem sequendo, habiturus sit.

His ultro citroq<sup>ue</sup> disputatis & pensatis, temporis ac virium nostrarum ratio habenda fuit: constabat enim cives ac milites aliquot septimanas obsidionis incommoda, vigilias, labores diurnos ac nocturnos pertulisse ac defatigatos esse: hinc impossibile fore tantum opus perficere ac simul hostem ex loci occupati possessione depellere, prout ipsi quoq<sup>ue</sup> primi consilii auctores fatebantur: itaq<sup>ue</sup> quod in manu fuit, cuniculum principaliorem jam ceptum, ut vires nostra sinebant, continuare ac loca ruinosa in circuitu valli versus inferiorem loricam & Jacobinum propugnaculum trabibus, materiâ terrâq<sup>ue</sup> restaurare perreximus: Sed neq<sup>ue</sup> hostis interea in perducendis cuniculis cessavit, continuisq<sup>ue</sup> tormentorum fulminationibus, ut jam antea, ita nunc maxime à primo diluculo in multam noctem Civitatem undiq<sup>ue</sup> infestavit, ac observatum fuit sæpe intra vertentis horæ spatium, centum amplius globos in Ci-



in Civitatem missos fuisse, quibus brevis temporis intervallo omnes nocturnos labores Opera nostra diruit et corruptit. Queres magno detrimento nobis fuit; vix enim tutus conspiciendi locus in vallo relinquebatur, unde non pauci milium, civium, ac eorum qui tormentis onerandis ac dispendendis occupantur singulis diebus perire; Imo tanta fulminationis eis ac ultra Danam fuit vehementia et globorum crebritas, ut in plateam arenosam, tum ad Danam non pauci oppressi; in ipsis quoque adibus, aereis et conclavibus nonnulli vulnerati ac cæsi sint: ac nisi posterus dies, qui erat undecimus Septembris continuam pluviam occupatus hostile consilium retardasset, procul dubio cuniculi preparati sub propugnaculo arenario incensi, et simul irruptio in Civitatem à copioso milite in insidiis jam collocato et armato vi summam fuisset tentata.

Die 12. Septembris hostis à summo mane usque ad horas vespertinas horribili boatu grandiores lapides, globos ignitos et pyrobolos in urbem cruciavit, summoque cum impetu in Civitatem diversos per locos, quos dispositis Capitaneis scripto designaverat, irrumpere decreverat. Verum Serenissimus Princeps Carolus Philippus frater Regis, nec non Illris Comes Jacobus de La Gardie, supremus Dux belli, Illris quoque Comes Mansfeldicus et Dñ. Falkenberg aulæ Principis Magister, aliique Officiales optimo animo intercesserunt, et apud S. R. M. per dictum fratrem, uti postea nobis relatum est, preces obnixas interposuerunt,

suerunt, ut postremas ad Civitatem literas prius mitteret, quam ultima tentaret; in quo se exorari passus est: Itaque à tantam tempestate tertio tubicinem ablegavit, qui ex consilio omnium Civitatis Ordinum, nec non Dñi Castellani et Nobilium, Vice Capitanei arcis, Revisoris, et equitum Praefectorum intra Civitatem acceptus literas attulit, quas recitari publice fecimus; atque in iis sextam ab earundem insinuatione horam pro termino dedenda Urbis peremptorio sub comminatione extremi exitu prefixam esse percepimus: Mox magnam cum animorum consternatione ac gemitu de extremam Civitatis fortunam cum prae-memorato Nobilitatis catu consultatum fuit: nemo enim periculi magnitudinem, quod ex colloquio cum hoste ceu primò deditiois gradu consequi solet, non perspexit, omnemque occasionem de vitare ac declinare ex animo non optavit: Vicissim ob oculos omnium versabatur presentissimum periculum; Primò namque hostis tribus in locis subter munimenta Civitatis versus mœnia et portam Arenam ad multos passus jam penetraverat, et secundum valli longitudinem cuniculos in modum trianguli formatos, pulvere pyrio oppletos instructosque habuit: hoc enim et plura alia captivi ac transfuga nobis retulerunt; quin nos ipsi certis ex indiciis et argumentis, imprimis ex egesta terrae tumulis, quos è vallo cernebamus, tum quoque post expugnatam urbem plus opinione deprehendimus. 2. Novum item pontem loco prioris à nobis corrupti et sustu-

K

lati,



lati, versus Jacobeam propugnaculum preparatum in vallo consistentibus ostendit. 3. Continua fulminatione, tantoque impetu portam arenosam omnesque munitiones prescriptam ultimam scissuram, in qua milites nostri excubabant, verberavit ac ignitis jaculis milites inestavit, ut singulis horis aliquot e medio sustulerit, nullusque modus resistendi nobis superesset, sed propugnatores intra fossa recenter ducta latebras sese occultare coacti fuerint. 4. Alia item scissura inferioris munitionis versus Jacobinum propugnaculum adeo tormentis majoribus et minoribus impetita fuit, ut in ipsis valli cavernis milites vix tuto latere, nedum arma movere potuerint; Ideoque quod certissimis ictibus densitatem novi operis penetrantibus subinde interficerentur, magnis clamoribus et precibus nos obtestati sunt, aliam rationem pugnandi iniremus, ac sese potius in acie contra hostem constitueremus, ubi pugnando honestius caderent, neque ita inglorii intra munimentorum claustra adeo fœdè instar captivorum mactarentur. 5. Porta arenosa planè ab hoste dejecta et nudata fuit, ut transitus juxta valli longitudinem versus Novam portam quasi patefactus videretur, cum refici eadem, uti necessitas exigebat, et maniri contra vim majorem minimè posset. 6. Aquam ex fossa Civitatis derivando, hostis ad hemicyclum jam occupatum pontem straverat, sic preparatum, ut quinis conjunctis simul facilem transitum praberet. 7. In Dunâ flumine

omnis

omnis generis navigia, rates, trabiumque compagines benè munitas et ferreis catenis consolidatas ac pontones ad oppugnationem necessarios in promptu habuit. 8. Exercitum ex tredecim Regiminibus conflatum, quorum singula mille ducentos vel trecentos, alia plures pedites benè exercitatos armatosque continebant, nec non 24. vexilla equitum quatuor propemodum millium adduxerat. 9. Magna copia tormentorum muralium, majorum et minorum, omniisque apparatu necessario optimè instructus fuit, ut vix in potentissimarum urbium obsidionibus similis conspecta fuerit copia, adeo ut à curiosis quibusdam observatum sit, unius diei spacio nonnunquam duodecim, tredecim, imò quindecim millia librarum pulveris tormentorum displosione consumpta esse, excepto quod scopetarii in suis fossis latentes dies noctesque imbrem globorum in Civitatem miserunt, et plateas publicas passim inestârunt. 10. Ipse Rex cum Principe fratre in castris summâ diligentia et curâ, postpositis omnibus periculis, cuncta administrârunt, secundum illud; Virget præsentia Turni. 11. Insuper peritos et spectata virtutis belli Duces, Capitaneos et Officiales tam indigenas quam extraneos, rei armamentaria et architectonica militaris peritia insignes, aliosque ingeniosos pyrobolorum artifices secum habuit; instrumentis quoque et aliis utensilibus castrensibus, tum aliquot fossorum millibus abundè instructus fuit; nec tantum damni ex unius vel alterius tor-

K 2

menti,



menti, quantum nos ex sclopeti rupturâ, sensit. 12. Quamvis navigium cum machinis ignovomis ut tempestatis in portum Vindavien. conjectum fuerat: tamen durante Civitatis obsidione, Rex, ut ex captivis didicimus, novos pyrobolos & incendiarias catapultas aliquot centenar, quorum illi 160. libras, hæ 400. penderunt, in hospitali Georgiano preparari curaverat, quibus sub irruptionem universalem civium domus funditus everterentur, ac Civitas universa conflagraret. 13. Nobis contra omnis propugnandi & defendendi facultas in munitionibus urbis non solum adempta ac recisa fuit. 14. Sed apparatus etiam noster in cuniculis agendis, ob inopiam artificum huius generis & aliarum rerum, cum hostis potentia & scientia minimè fuit comparandus. 15. Numerus stipendiariorum aliàs exiguus, & tormentariorum, aliorumq; bello operantium supra dimidium fuit imminutus; multi civium juvenumq; presenti morte occubuerunt, non pauci læsi ac vulnerati domi interierunt: hinc parùm virium superfuit ad propulsandas in circuitu urbis hostiles impressiones; imò in universâ Civitate vix mille armis ferendis idonei restabant. 16. Discessus Ill<sup>ma</sup> Cnis V<sup>ca</sup> ex quo se conspiciendam præbuit, & creditus diu dilatatus, cum nec terminum nec modum literis suis exprimeret, animos civium labefactavit. 17. Regii equitum Præfecti, Capitanei, aliq; militares viri, ut sæpius jam antea, ita nunc quoq; postremo ad consilium adhibiti, conscientiam

suam aperte testati sunt, nullam se urbis servanda rationem videre; licet etiam cum instructo iustiq; viginti milium armatorum exercitu Ill<sup>ma</sup> Cdo V<sup>ca</sup> veniret, hostem tamen loco opportuno, & castris munitissimis, fossis aggeribus & sepimentis confisum, inde pelli, aut Civitatem ex manu illius eripi non posse; id quod Dñs Castellanus & alii ex Nobilitate jam antea privatim, nunc palam testificantes audivere. 18. In excubiis & vigiliis è tanto exercitu facile fuit hosti aliquot virorum obliata disponere, & singulis diebus commutare, dum vix quinto quoq; die vices in orbem redirent: contra cives nostri totam astatem laboribus continuis, in reparandis munitionibus occupati fuerunt, in ipsâ quoque obsidione sine ullâ quietis intercapedine eos arma ferre, in suis quosque stationibus sex septimanas perdurare, cæli ac hostis injurias insomnes perferre oportuit: fabri quoque ferrarii, lignarii, camentarii, & id genus opifices, sine intermissione laboribus diurnis ac nocturnis quassatas partes reficiendo, ruinas instaurando, nova opera extruendo, ita defatigati fuerunt, ut vires ferè nulla jam viderentur superesse: atq; in omni Civitate, præter egrotos & senio confectos, quisque sui officii partibus strenuè perfunctus est. Tandem, optima tormenta Civitatis majora & minora nimio usu rupta fuerunt: pulveris quoque pyri, cujus sanè licet superioris belli necessitatibus sapissime subministrati



immensa copia diligentissime congesta servabatur, penuria propè timenda fuit. Praterèa Civitas arctissime circumvallata erat, ita ut via omnes interclusæ spem defectus nostri supplendi nullam nobis relinquerent.

Quare in hoc extremo necessitatis puncto, dùm inter sacra & saxum versaremur, salutisq; ratio nulla apparet, secundum pietatis & rationis præscriptum, ac diuina humanaq; tùm omnium gentium iura conclusum est, ex duobus malis minimum eligendum esse, atq; more gentium & multarum insignium civitatum exemplo petendum, ut oblata in sex horas armorum feria in triduum prorogarentur, nullo alio fine ac instituto, quàm ut intereà cuniculi, si fieri posset, aliaq; defensionis opera contra hostem perficerentur, simulq; tempus differretur, quò Illma Cdo Va quod suis abiens ex castris ad Dunam positus, literis Skaddiâ missis, promiserat, nobis succurrendi facultatem haberet, auctioribusq; copiis reverteretur: Quam in sententiam, eadem horâ septimâ vespertinâ scripta nostra declaratio in castra Suevica missa fuit, ac simul petitum, ut per tubicinem nostrum eo nomine ablegatum responsum daretur. Is vero tubicen sub eadem vespèram in urbem sine morâ remissus fuit, & feria armorum vix ad horam quintam pomeridianam posteri diei impetrata sunt, sic tamen ut Civitas iisdem quoq; teneretur.

Itaq; (die 13. Sept.) convocato mane Senatu, omnibusq; Civitatis Ordinibus, cùm rei magnitudo maturè perpenderetur,

retur, cunctorum assensu, ne ante communem conclusionem pessum iremus, hac qualiscunq; mora ad horam quintam, missis ad Regem horâ nonâ matutinâ literis, acceptata fuit. Tùm verò Rex simul postulavit, ut Civitas deputatos sub fide publica in castra ad tractandum negotium mitteret, ac Regios obsides intra urbem reciperet. Cùm itaq; summa Civitatis undiq; deserta necessitas & angustia in consilio publico omnium oculis proposita cunctationi locum non relinqueret, selecti è numero ordinis Senatorii, more antiquo & receptâ consuetudine, mittuntur ad Collegium civium, qui rem omnem usdem accurate proponerent, & de omnibus ad salutem Civitatis pertinentibus consilia conferrent: quo audito, universa civium Communitas cum gemitu & suspirio communem calamitatem & miseras deplorârunt, ac quoniam extremâ fortunâ Civitas stare, in eam sententiam ivērunt (prout Tribuni ac Seniores postea more solito Senatui retulerunt) ut majoris securitatis gratiâ obsides utrinq; mitterentur, ac summo studio in eam curam incumbere-tur, ut si ullâ ratione fieri posset, armorum suspensio consq; obtineretur, donec Illma Cdo Va cum auxiliariis copiis à Sac. Reg. Mte decretis, diuq; à nobis expectatis superveniret, nosq; è periculo eriperet: idem etiam nos sensimus & iudicavimus.

Quamobrem ad castra denuò scripsimus, fieri non posse, ut intra tam angustum temporis spacium, res & causa gra-



sa gravissima rectè deliberaretur; moram igitur amplio-  
rem nimirum viginti quatuor horarum, (omissâ certis  
de causis obsidum mentione) roga vimus: interim bonâ  
fide ab armis cessaretur, ad Civitatis munitiones miles  
propius non accederet, fossa Civitatis materiâ non imple-  
rentur, pontes non admoventur, aut quid aliud in dam-  
num Civitatis tentaretur: atq; cum hoc responso tubi-  
cen, qui eâ nocte venerat, remittendus in castra erat; sed  
cum is iusto tempore præstio non esset, alius mox quaren-  
dus erat, qui dum abitum parat paululumq; cunctatur,  
mox e vigiliam statione in turribus collocatorum nun-  
ciatur, ingentem militum numerum ex castris hosti'ibus  
sub signis incedere ac Civitati imminere, de versisq; in lo-  
cis consedis, qui iussi erant (uti postmodum comperimus,  
nisi intra præstitutum terminum certa animi nostri de-  
claratio obviam iret, ut protinus, incensis preparatis cu-  
niculis, irruptionem in Civitatem facerent.

His auditis Cives quidam fidelissimi, cum contra utri-  
usq; Collegii sententiam obsidum mentionem in iis lite-  
ris factam non esse intelligerent, flagitare cœperunt, nos  
quoq; annuimus, ut avertendi extremi periculi causâ, de  
mittendis utrinq; obsidibus & colloquio mutuo sub salvo  
conductu instituendo, clausula iisdem literis jam paratis  
insereretur, locusq; & tempus, quo obsides convenirent,  
designaretur. Nec dubium est, singulari DEI provi-  
dentiâ consilia miserorum gubernantis contigisse, quod  
hac

hac clausula literis adjecta fuerit: hac enim ratione ho-  
stis ira mitigata, & preparata jam irruptionis impetus  
retardatus fuit. Caterum non nisi ad 12. horam posteri  
diei inducias Rex concessit; quo quidem die, (qui fuit 14.  
Septemb.) convenire placuit, ubi salvi conductus formu-  
lam hostis more militari nostris obsidibus eantibus & re-  
deuntibus misit, similemq; cautionem à Civitate postula-  
vit. Super hoc responso consilia cum Castellano Ven-  
densi, cum Vice-Capitano arcis, cum Revisore ac equi-  
tum Præfectis communicata, & ab iisdem approbata  
sunt. Igitur à parte Civitatis Dñ. Henricus ab Ulen-  
brock Pro-Consul, Dñ. Joannes Ulrici Syndicus nomine  
nostro, è civium Communitate Joannes Witten & Gi-  
deon Ridder utriusq; Collegii Tribuni deputantur & ab-  
legantur, qui omnes animo agro ac tristissimo hanc pro-  
vinciam decernere ac suscipere coacti sunt; id quod me-  
morati Dñ. Castellanus & reliqui Nobiles, tum alii ad  
consilium adhibiti testari possunt. In tantâ enim con-  
sternatione nemo fuit, qui non toto pectore hunc miserrimi-  
um Civitatis statum & fortunam sit aversatus, cre-  
brisq; gemitibus deploraverit, adeo ut omnes mortem  
præsentem, si qua inde salus in Civitatem redundaret,  
quàm hanc legationem obire aut jubere maluerit: atia-  
men faciendum fuit, quod ultima necessitas imperavit.

Quare missis utrinq; obsidibus, à Civitate post exhi-  
bitas fidei literas petitum fuit, ut juxta oblatam primis li-

L

teris



teris conditionem inter neutrales locus sibi relinqueretur, eamq; ob causam promittebatur grandis auri argentiq; summa; ad quam conficiendam singuli civium, uxorum & liberorum suorum aurea & argentea ornamenta conferre paratissimi erant; saltē ut in fide Regni Polonia sibi manere permitteretur. His aliisq; rationibus animum hostis flecti posse credebant, praesertim cū petitio pietate nitī videretur; Regnum nimirū Polonicum gravissimo bello Turcico jam implicatum esse, Rigensem quoq; Civitatem fidem & constantiam Regi & Reipub. Polonae juratam probando (quod laudem potius quam vituperium mereatur) nullam Regi Suecia ejusvē subditis injuriam intulisse; ac proinde equam esse, ut vim omnem hostilem à Civitate Rex Suecia abstineat, & copias suas abducat: Sin aequissima haec petitio ad innoxii Christiani sanguinis effusionem inter populos religionis vinculo colligatos prohibendam non admitteretur, reliquum sibi esse, ut divino auxilio contra omnem vim se suaq; tueatur.

Adhac ipse Rex respondit: quandoquidem certam induciarum securitatem manu Polonia Regis cognati sui subscriptam & signatam, salvā quidem causā principali, obtinere non potuerit, nec voluntaria Perna via restitutio à se oblata promissaq;, urgente tanto belli Turcici periculo, accepta sit, facile se hinc conjectare & praevidere, si ex animi sententiā Turcicum bellum prostrigatum fuerit, quid

quid sibi & Regno subditisq; suis deinde expectandum fiet: propterea invitum se ad stabiliendam pacem, finitis prioribus induciis, hoc bellum suscepisse, eoq; animo ad Civitatem cum exercitu venisse, quā licet per se nullā ipsam injuriā laceſſerit; sit tamen Regis Polonia subdita, hostis sui adiutrix, ac ceu domus belli, ex quā omnes contra Regnum Sueciae expeditiones, tanquam ex equo Trojano prodierint & promota sint: Hanc igitur oppugnandi sibi necessitatem imponi, ita ut eam aut in potestatem suam redigat, aut omnino ceu noxium sibi suoq; Regno nidum destruat; praesertim cū Civitas Rigenſis, cui aliās ob religionis communionem, tū Germanica gentis jura, mores, & instituta favet, minimē exemplum Civitatis Gedanensis, quā ceu neutralis hoc bello durante quieverit, imitata sit, nec oblatum in primis literis hoc beneficium suum, antequā tanti sumtus in obsidendā hactenus urbe erogati essent, quā par est gratiā acceperit, sed superbe spreverit, ac praesens Polonis adherere perstiterit: jam in eo esse, ut Civitas categoricē animum suum declaret, an sit deditionem factura, nec ne?

Cū à Civitatis nunciis replicando reponeretur, quicquid ex fide debitā Regi Polonia hactenus prestitum sit, id accusationem aut culpam non mereri, nec crimini dari posse, ubi crimen nullum commissum sit: Cū item de neutralitatis naturā, requisitis & effectis in utramq; partem diligenter disputaretur, Rex, repudiatis iis omnibus,



immutus in sententiâ suâ perseverans, ut confestim, quid in interiori mentis recessu absconditum habeant, & sibi tandem faciendum putent, paucis exprimant instando urfit, aut quid extrema sors belli ferat, periclitentur. At Civitatis nuncii precibus suis inherentes, alteram simul conditionem obtulerunt, ut, si omnino Neutralitas denegetur, saltē ad unius mensis spacium (quod beneficii alia quoq; civitates & arces non rarò experta sint) arma suspendantur, ut intereâ Dacem belli cum auxiliaribus copiis nuper conspectum, qui cum supplemento majorum virium brevi se rediturum, & Civitatem ab obsidione liberaturum receperit, de periculo commonefacere possint; haud grave & molestum suæ Regiæ Mti hoc fore, cum ipsamet palàm professâ sit, ad confligendum acie cum hoste auxilia laturo satis sibi virium & animi esse; & si id minus sibi integrum esset, tutum se in castris munitissimis omnem hostilem impetum propulsare, ac nihilominus animi destinata contra Civitatem effectui dare posse: sic autem fore, ut vel Civitate planè destitutâ, vel repulsis subsidariis copiis, majori cum gloriâ victoriam reportaret, nostramq; de re tantâ conventionem ab omni criminis suspitione immunem præsaret; id verò maxime eam ob causam, ne nostro factò in Regno Polonia laudatissima gentis Germanica, & Augustana imprimis confessionis homines per calumniam prægraventur.

Cæterum Rex iterum opposuit, non tanti se gloriam hanc emturum, ut, quam fortunante DEO manu nunc teneat

teneat victoriam, eusq; differat, & in castris arenosis diutius bareat: idcirco cathegoricâ resolutione animum aperiant, seriò imperavit. Ibi vicissim ablegati statum Civitatis, quæ tota mercatura dedita & dedicata sit, exposuerunt; commerciorum usu eam cum regionibus proximis inprimis cum magno Ducatu Lithvania esse conjunctam, Rempub. Polonam polere viribus & facultatibus, metuendam esse horribilem vastitatem Livonia & infinitas misérias, subditorumq; extremam oppressionem ac exitium, Regnum autem Svecia longo locorum intervallo disjunctum; & quæ alia tū in mentem veniebant, atq; in ejusmodi casibus consideratione digna videbantur, summo studio exaggerârunt, obnixè rogantes, suprâ oblatarum conditionum alterutram Rex acciperet, atq; ancipitem belli aleam evitaret; extrema enim Civitatem subire paratam esse.

Sed frustra hæc omnia; Etenim Rex ne tantillum de suo proposito remisit, nisi quod Civitatem cum omni suo jure, forma gubernationis, moribus & consuetudinibus, quibus hætenus Polonia Regno subiecta fuit, se conservaturum, omnibusq; viribus ac fortunis defensurū, nec ullum vel cū capitis sui periculo necessariū officium prætermisurū promitteret; & subjectionē denuò instanter urgere nō destitit; Civitatem exitio proximam esse, idq; ab ipsâ non intelligi; oportere, ut cuniculos paratos oculis suis nunciis inspiciat, deinde de salute suâ consultet, finemq; licitationis faciant,



nec patientiam suam nimio plus tentent, aut extremum casum experiantur; quem ipse Rex bene erga Civitatem imprimis verò erga imbellem sexum animatus abhorreat, Deum contestando, se solà commiseratione innocentium fœminarum ac liberorū ductum lenioribus hucusq; mediis usum esse; alioquin si vim ultimam adhibere cogeretur, militum furorem ac licentiam cuncta pervadentem, se autoritate aut imperio suo coercere non posse, quibus in vitis ac frementibus hucusq; impetum non permiserit: quod si jam clementia locum dare velint, maturè & sine ulteriori cunctatione occasionem arripiant, seram deinde ac inutilem fore pœnitentiam.

Verùm Civitatis nuncii certis mandatorum limitibus constricti, cùm ampliùs progredi non possent, bonà se fide ad Civitatis Ordines relaturos omnia sanctè promiserunt: atq; hanc quoq; gratiam Rex largiretur, ac tri-dus inducias concederet, orârunt. At Rex mora jam pertasus præcisè negavit: tandem precibus iteratis victus, per Illustres Dñ. Generalem bellì Ducem, Dñ. Archithalassum, & Dñ. Thesaurarium usq; ad meridiem sequentis diei negotium ampliavit. Sub vespèram nuncii in Civitatem, cùm Regis obsides essent dimissi, revertuntur, ac postridie (15. Septemb.) summo mane tam Senatui quàm Tribuni ac Senioribus universaq; civium Communitati, nec non Dn. Castellano & aliis supra nominatis, bonà fide ac diligentissimè, quæ acta sint, retulerunt.

Jam

Jam omnes sanà mente præditi senserunt, propositis hucusq; conditionibus nihil profici, nec interitum Civitatis, licet maximam fortunarum nostrarum partem pro salute patriæ profundere parati essemus, declinari posse, sed validissimum assultum universalem, cui tamen paucitas superstitum virorum nostrorum minimè sufficeret, excipiendum & depellendum fore, in quo omnium nostrorum vita salusq; periclitaretur. Et hanc quidem ipsam patriam consecrare non dubitassimus, si publica salus hoc modo expediri, sexusq; fœmineus imbellis, liberi ac pupilli miserrimè fidei nostræ commissi, atq; omnia quæ in humano consortio inq; oculis D E I sunt carissima, à furentis Martis rabie ac miserabili excidio vindicari potuissent. Verùm enim verò, quoniam hujus rei consequenda spem fortuna nobis omnem præcideret, neq; subvenirent à Rege & Repub. Polonà nobis debita & ab Illmâ Cne Vâ promissa auxilia, imò ut maximè in hunc usq; diem obsidionem tolerassimus, e venturæ rem comprobante, non subvenissent: unanimi consensu ac concordibus suffragiis, accedente quoq; assensu Dn. Castellani & omnium reliquorum Regis Polonia fidelium subditorum, omnium gentium jura & exempla similia pristina ac recentis ætatis sequi ipsa satis inevitabilis necessitas omnibus humanis consiliis superior coëgit: Quod si enim contra legem D E I perpetuam conscientie regulam ad ultima desperationis vesaniam prolabi, & voluntariâ perniciæ corpora nostra

mactan-



miactanda præbere voluissemus; tamen Civitas Regi & Regno Polonia conservari non potuisset. Satiùs itaq; fuit vi majori cedere, ac præviis tractatibus (quos una cum prioribus Deputatis ex Senatorio ordine Dñ. Thomas Ramus collega noster, Dñ. Joannes Majer Secretarius, & civium verò Communitate viginti circiter viri consummârunt) Suecorum Regi victori nos dedere; generali confirmatione omnium jurium & privilegiorum, nec non incolumitate Polonia Regis subditorum, si manere nollent, quâ vita quâ fortunis pridie Regis ingressus impetratâ. Sed & hoc precibus nostris à Regiâ Mte obtinuimus, ut si intra triennium pax inter utrumq; Regem coalescat, in ditionem Reipub. Polonæ, salvis juribus & statu nostro redeundi nobis facultas sit.

Haude equidem inficias imus, ex insperatâ hâc mutatione tantam tristitiam nostros omniumq; civium animos incesisse, quantam à primordio civitatis majores nostros nunquam sensisse credimus. Nihilominus Dei immortalis justissime rerum humanarum moderatoris arbitrio & voluntati nos acquiescere oportuit, cujus etiam beneficio à presentissimo interitu vindicatos nos esse gratissimis animis agnovimus: & tunc primùm intelligere cœpimus, quod fides nostra Regi & Reipubl. Polonæ præstita, judicii & rationis nostra captum in discernendo quo in versati fuimus periculo, longè superârit, & quod solius DEI præpotentis misericordiâ totum hoc negotium

Sapient-

sapientissimè ita temperatum sit, ut præter votum ac expectationem nostram, magno cum Suecici militis murmure ac fremitu, spe prædam capte urbis jam devorantis, mitiori exitu res terminaretur: Hoc idem tam Jesuita quàm alii, qui tùm fortuna nostra socii fuerunt & liberè à nobis discesserunt, voce, manibus, ac sigillis suis ingenuè testati sunt, ac nobiscum immensam banc Dei benignitatem deprecârunt.

Jam quo animo erga Rempub. Polonicam fuerimus, vel inde quoq; evidenter apparet, quod Dño Castellano, Revisori, equitum præfectis, equitibus, aliisq; Romana religioni addictis, quin ipsis quoq; Jesuitis, postpositâ privatarum litium, quibus civitatem implicârunt, memoriâ, omnia humanitatis officia præstiterimus, ac proinde non minori curâ de salute eorum solliciti, mox inter primas deditionis leges, incolumitatem corporum fortunarumq; difficulter pacti simus, ut abituris licuerit res suas vendere, & sine impedimento aliò transferre, prout cujusque rationes & voluntas tulit: Jesuita sanè vix similem æquanimittatem nobis exhibuissent, si fortè ipsis tali pacto salutis nostra ratio habenda foret.

Ceterùm quod nos à Repub. Polonâ deserti, tanto cum facultatumstrarum publicarum & privatarum dispendio serè irrecoverabili, in hanc fortunam incidimus, id propter peccata nostra, quæ Deus coram vultu suo lumine ponit, & latentium causarum nexus pro admirabili

M

suâ sa-



sua sapientiâ ad ejusmodi effectum disponit, nobis evenisse agnoscimus, ac proinde aequiori animo nobis ferendum ducimus. Causam fortasse haberemus justam omnes, de neglectâ defensione nostri conquerendi, quam Rex & Respub. Polona ex solenni jurejurando ad divini & humani juris præscriptum præstare calamitosi subditis debuit, (ut ex formulâ subjectionis Anno 1561. à Sigismundo Augusto Rege Vilna juratâ, quâ Livonia defensionem suscepit, videre licet; quò etiam Stephani Regis Anno Christi 1581. Drohicini ex pacto Civitati promissatutela spectat) omnemq; culpam calamitatum ac miseriarum & inde nascentium dolorum desertoribus nostris imputandi: siquidem ad DEI omnipotentis exemplum, beneficiis suis bonos foventis & malos punientis, terrestres quoq; Reges & Principes sese conformare decet; quorum officio convenit, subditos paterno affectu & benevolentia prosequi, contra omnes injurias tueri, hostium machinationes vigilanter observare, omnem defensionis apparatus, pecuniam, militem, comæatum, arma mature conquirere, & munitiones, castella ac arces presidii ac rebus omnibus necessariis instruere, itinera ac viarum claustra custodire, hosti cum instructo exercitu obviam ire, aut si viribus inferior sit, pacem firmare, omnia denique consilia sua & actiones, non ad sui solius affectionem aut dignitatem, non ad interitum innocentium subditorum, sed ad universorum ac singulorum salutem dirigere.

VERUM

Verum enim verò animis ad pietatis normam compositis, iram Domini peccata ulcipientis portabimus, voluntatem illius pro decreto accipiemus, ac quæ mutari non possunt, patienter feremus; DEumq; Imperatorem supremum, à cujus dispositione tanquam causâ primâ pendent constitutiones, conservationes & mutationes humanarum communionum societatumq; sine murmure ac gemitu sequuturi sumus, quòd sine ipsius nutu ne capitis quidem pilum decidere sciamus.

Quamvis etiam, ut humana ratio fert, à Sveciæ Regno, cujus intuitu hoc infansum bellum motum est, non magis quàm cetera Regni Polonia civitates & regiones affigendi ac gravandi fuisset: tamen præ reliquis omnibus infeliciores in tanta mala incidimus, dùm commerciorum usum cum Lithvanis ac Russis ad alias civitates Polonicas derivato privati sumus; maritima quoq; navigatio ingenti damno nobis constitit, ubi aliquoties naves nostrorum civium mercibus onustæ, modò 10 modò 20. ab hostili classe interceptæ fuerunt: huc accedit terna suburbiorum nostrorum hortorumq; vastatio, & rerum tam Polonicis quàm Svecicis subditis creditarum amissio ac immensa avis alieni magnitudo: nec inter breve temporis spacium hæc calamitas stetit, sed annos jam viginti duos sine ullâ misericordia & liberatione suppremi Principis adeò duriter habiti, & quoad publicas privatasq; opes attriti sumus, quanquàm aliis civitati-

M 2

bis



bus Reipub. Polona, cum quibus tamen si non in potiori, certè in pari subjectionis causa versamur, fortunam non in videmus, quod extra belli periculum jure commerciorum & neutralitatis magno cum suo commodo fruuntur. Attamen DE l'judicio hac omnia committentes, Regi & Reipub. Polona etiam in his calamitatibus nostris censura iniquitate nō sumus obtrektaturi: sic enim persuasi sumus, nihil in perniciem nostram à Rege vel Reipub. designata voluntate profectum esse; at verò si quid erroris in consiliis humanis commissum est, sapientissimis quoq; Regibus & Rebuspubl. idem accidisse & accidere posse constat.

Simile quoq; ab Ill<sup>ma</sup> Cne Uri de nobis judicium expectabamus, cui quidem cura rei Livonica demandata, spesque inde optima nobis facta fuerat; verum ut suprā memora vimus, præter expectationem utriusq; nostrum evenit, quod ex singulari odio nonnulli tam Ill<sup>ma</sup> Cni Væ quam Civitati nostra, imò Germanica nationi & Evangelica religioni infesti, malorumq; in Livoniâ consiliorum autores, rem in Comitibus bene consultatam atq; ordinatam in versum evertunt, unde nihil tempestivè, nihil solenniter, & eâ quâ conveniebat formâ sub Regis titulo ac chirographo ad prorogandas inducias, salvo principali negotio, effectum; belli in Suecia Regno præparatio alio sensu accepta & explicata; Civitati nostra, non attentis crebris nunciorum illius obtestationibus in Comitibus

mitis publicis apertè interpositis, nimia vires tributa, ac Suecici hostis respectu propè invicta aestimata, copia collecta dissipata, thesaurusq; occlusus fuit, atq; persuasum, quasi ex vicinis regionibus & districtibus Mag. Duc. Luthvania, si qua necessitas ingrueret, facili negotio miles tumultuarius, quo vires hostiles propulsarentur, colligi posset. Ea est, quæ ex malevolorum consiliis exorta est detestanda securitas! Hinc Ill<sup>ma</sup> Cnis Væ conatus in parandâ maturâ defensione, & tempore necessitatis nobis succurrendi voluntas retardata fuit; hinc neq; nobis, neq; arcibus, uti Ill<sup>ma</sup> Cdo Væ sapiens sperare jusserat, tempestivè prospicere potuit; hinc destituta provincia, & destituta necessariis auxiliis Civitas in præsentem statum devenit. Attamen hujus rei culpam Ill<sup>ma</sup> Cni Væ non perinde ut aliis imputandum arbitramur: Non enim nos latebat, Ill<sup>ma</sup> Cni Væ non voluntatem optimam, sed alia adminicula, sine quibus tanta negotia confici non possunt, defuisse.

Quapropter vicissim confidebamus, Ill<sup>m</sup> Cm Vm, quæ quidem in literis suis ob gravissimum hunc casum nullâ nostrâ culpâ, humano more loquendo, accersitum, commiserationem quandam præ se ferre videtur, nobis, qui, ut viros bonos decet, contra virtutis & conscientie præscriptum nihil penitus commisimus, in hac calamitate nostrâ, pro eâ, quâ pollet judicii dexteritate, literis suis aculeatis & injuriosis, publicè insultatam,



ram, famamq; & honorem nostrum sugillaturam non fuisse, dū criminando exprobrat, ac si nullā necessitate urgente, fidem & jurisjurandi religionem, Civitatem victori dedendo, violāsemus; cū tamen non solum ex nostris literis, sed aliorum quoq; fide dignorum à nobis discedentium ceterorum oculatorum, qui actionibus nostris interfuerunt, relatione melius & rectius fuerit informata: Sed quia nihilominus collibuit Ill<sup>ma</sup> Cui<sup>us</sup> V<sup>obis</sup>, tam graviter in nos invehī, non possumus non hanc intolerabilem injuriam ad animum revocare acerbè molestèque ferre.

Nam quod Ill<sup>ma</sup> Cdo V<sup>obis</sup> desertionem nostri & subsidii defectum, nec non vim & potentiam hostilis exercitus eam, cui nos succumbere oportuit, negare nititur, quid aliud facit, quàm quod viventis corporis animam, aut meridiani solis lumen negare ausit? Sic autem habeat Ill<sup>ma</sup> Cdo V<sup>obis</sup>, se istis conjecturis & suspicionibus epistola sua insertis, veritati ac iustitiæ, in tam notorio factō, nihil derogare posse.

Quod enim (I.) ad edificia, mœnia, munitiones & arma attinet, Ill<sup>ma</sup> Cui<sup>us</sup> V<sup>obis</sup> obscurum esse non potest, urbes etiam florentissimas, castraq; munitissima, atq; omni rerum & armorum abundantia instructissima, si vi majori oppugnentur, exitio tandem subjacere, nedū si viris & praesidiis destituantur: id quod omnium temporum, cum primis nostri seculi exempla, tam Germania, quam Italia, Hunga-

Hungaria, Belgii urbium & arcium munitissimarum, ubi magna bella gesta esse scimus, testantur, quibus Rigensis Civitas non per omnia aquanda venit.

Præterea, (2.) quod militum inopiam Ill<sup>ma</sup> Cdo V<sup>obis</sup> nostra culpa imputat; apud bonos gravesq; viros parum momenti habet: quippe virium nostrarum proportionem Ill<sup>ma</sup> Cui<sup>us</sup> V<sup>obis</sup> attendere oportuit, nec plus à nobis pro aequitate iudicii sui exigere, quàm facultates nostra ferunt. Cū in ditionem ac fidem Regni Polonia concederemus, benè nobis consci fuimus imbecillitatis nostra, cujus imprimis intuitu subjectionem professi, ac defensionem contra vicini nos hostes à Rege Stephano uno eodemq; folio pacti sumus. Itaq; non nostris propriis viribus, sed Regni & Reipub. opibus defensio nostra nitebatur; in quam sententiam publica Comitiorum decreta promulgata sunt; utinam executio eorum subsequuta fuisset! Porro quod majora olim præstitimus, ac sub exordium hujus funestissimi belli circiter mille pedites nostris sumtibus aluimus, ex quibus alios sæpius unā cum tormentis, annonā, & necessariis rebus ad expugnandas & tuendas arces & oppida aliasque Reipub. operas, cū publica necessitas flagitabat, contestanda perpetua fidei nostra ergo promississime suppeditavimus, necessariam conclusionem ad præsens tristissimum tempus non infert, quo ab illo felicitatis gradu diutius armorum & hominum injuriis longè deturbati sumus. Nam (ut satis Ill<sup>ma</sup> Cui<sup>us</sup> V<sup>obis</sup> constat) eadem est Rerum pub.



publ. & communitatum conditio & natura, quæ humani corporis; atq; ut medicus in curando eo accuratè circumstantias omnes pensitat, ac succulento validoq; fortiora medicamenta largiori haustu, quàm infirmo & macilento propinat: ita nec Ill<sup>ma</sup> C<sup>do</sup> Va à Civitate diuturni belli languore macerata, exhausta, tot damnis terram mariq; confecta & defatigata, tantum roboris, quantum antea sana ac robusta præsinit, expectare potuit aut debuit. Atq; ut maxime omnes facultatum reliquias in conducendis mille circiter peditibus infuturi, literas & mandatarios nostros Lubecam ac in Prussiam miseramus, per vastam quoq; Livoniam summo studio militem conquisiveramus; colligere tamen supra numerum jam antè definitum plures non licuit. Quam in re haud dubie fidei nostra fides habenda erat, cum ipsamet Ill<sup>ma</sup> C<sup>do</sup> Va Regius belli Dux, missis undiquaq; expeditoriis Regia Militis, operam Officialium suorum exquisitissimam, ne ducentos quidem milites Germanicos conscribere potuerit: ut silentio prætereamus, quantam cum difficultate Polonia Reipub. militia præfecti in bello nupero contra Turcam, quamvis amplum stipendium proponerent, vix dimidiatum numerum militum coegerint, unde insignis quidam Præfectus non abs re gembundus optasse dicitur, ut ex lapidibus milites in tantam necessitate excitarentur. Ad quid ergo insimulatur unica Civitas, quod plusquam universa Respub. difficillimo hoc tempore præstare non potuerit?

tuerit. Errat quoq; Ill<sup>ma</sup> C<sup>do</sup> Va, dum innuit, nos pacis tempore 300. & plures milites stipendio nostro alere consuevisse: secus enim docent rationum nostrarum commentarii, nec vires nostra tantis sumptibus non necessariis suffecissent.

(3.) Objicit Ill<sup>ma</sup> C<sup>do</sup> Va duo equitum vexilla sub Præfectis Labarre & Ceridone, subsidio nobis missa: At non meminit, eos regio stipendio non contentos, singulari mercede mēstruo nimirum duodecim taleris de singulis equis, excepto pabulo, conducendos, atq; non tam in usum civitatis, quàm arcis præsidium, quò etiam destinati erant, nobis alendos fuisse. Quod si ibidem stationem suam obijissent, milites nostri, quorum numerus aliquando ad 70. 80. vel 100. circiter assurgebat, propria nostra necessitati subtraheretur, præsidio arcis quotidie summittendi non fuissent. Jam quantum equites, quorum absentiam milites nostri supplere debebant, præstiterint, Ill<sup>ma</sup> C<sup>do</sup> Va facile dijudicabit, ac sine dubio ex iis cognovit, qui à nobis discesserant. Quidam in iis lingua admodum prompti fuere, sed manu inertes, super mensam vel ipsum debellaturi Alexandrum: Sed ubi Rhodus, non semper saltus erat.

(4.) Ill<sup>ma</sup> C<sup>do</sup> Va nobis civium obædientiam & concordiam objectat, magistratui, quasi vel ignavia vel infidelitatis accusari posset, periculum fortè creatura: Non invidemus civibus obædientie & patientie laudem, quam laborando, vigilando, pericula depellendo, malaq; alia

N

feren-



ferendo, promeruerunt; Verum nos quoque universi et singuli omnibus animi corporisque viribus partem non minimam totius molis sustinimus, ac non tantum ordine statuque, sed curis quoque et in periculis adeundis priores fuimus, idque tam cives quam peregrini, qui a nobis discesserunt, verissimum testabuntur. Atque hac ipsa omnium in civitate Ordinum concordia fidem nostram erga Regnum Poloniae et constantiam arguit, atque Illm<sup>e</sup> Cm<sup>m</sup> Um omnesque alios confutat, qui vel hunc vel illum Ordinem pusillanimitatis aut perfidia suspicione onerare satagunt: Si enim, cum contra hostem pro Rege et Regno Poloniae fortiter pugnaremus (quod tot innocentium sanguine testatum fecimus) nulla animorum disjunctio apparuit; quis est, qui pusillanimitatis nos merito accuset, qui summam necessitate adacti, in eadem animorum conjunctione cum civibus, tam iis qui abierunt quam qui manserunt, perseverantes, maestissimo vultu et animo deditionem fecimus? Et quidem tum denique, cum civium militumque numerus, ut supra memoratum est, valde imminutus esset, periculi magnitudo usque ad verticem capitis increvisset, et fiducia secundum Deum posita in subsidiis Illm<sup>e</sup> Cnis<sup>m</sup> Va, (qua duodecimam saltem hostilis exercitus partem ad Dunam adorta resiliit, et semel retrogressa ad nos non rediit,) evanisset. Quod autem concordia illa vires nostras imbecilles, quae tam validum et numerosum exercitum propularent, auctiores reddere potuerit, Philosophorum leges ratiocinari non sinunt.

(5.) At

(5.) At aetiori, Illm<sup>e</sup> Cdo Va inquit, cives fidei vinculo, quam milites conducti ad profundendum sanguinem et extrema subeunda tenebantur: Recte sane; Id enim actioni Illm<sup>e</sup> Cnis Va plane respondet, quae militis sui sanguinem majori in precio habuit, quam ut cum hoste potentiore dimicaret, ac periculosam certaminis aleam jaceret, Idem de jure certis axiomatibus evincere laborat: Sed quatenus hac viris belli peritis probari possint, dies docebit. Civium fidem et constantiam erga supremum Principem verbis non extenuabimus, quam quanti et nos et illi fecerimus, factis utrinque testificati sumus: Vix tamen Illm<sup>e</sup> Cni Va dare possumus, cives armorum imperitos, extra belli strepitum educatos, periculorum insolentes, extra vocationis suae ordinaria terminos plus contra hostem, quam milites singulariter hoc nomine stipendiis conductos in officio suo ordinario prestare teneri: alioquin ex hac militia professione pauci fortes milites existerent, paucae quoque civitates conservarentur, pauciores item caperentur: licet in eo pares sint cives et milites, quod utriusque pari fidei, pietatis, omniumque divinarum et humanorum jurium vinculo adstringantur (id quod nostrates mutuam certandi emulatione testatum fecere) neutri tamen ultra possibile obligentur. Quotidiana experientia demonstrat, munitiones praesidiariae aliquot millium militum manu firmatas, necdum in tanto periculi gradu constitutas, ad deditionem compulsas esse, praesidia



ad Dominos suos reversa, facti sui apud eosdem non vituperium, sed excusationem meruisse, quippe non ignaros, humanis potius ingemiscendum esse casibus, quam fama aut honori devictorum quidquam detrahendum. Cujus rei plurima pristini ævi, tum nupera quoque exempla civitatum Juliaci, Reinbergi, aliarumque munitionum in memoria recenti barent.

(6.) Absurdum est quod objicit Ill<sup>ma</sup> C<sup>do</sup> V<sup>a</sup>, commeatus nobis non defuisse: In eos enim, qui simul viribus ac copiis satis instructi, ex metu inani, nullâ cogente necessitate deditionem faciunt, hoc torquere licet: nos verò annona defectum causam deditionis nunquam pretendimus. Feriatus utinam ab armis hostis esset, usque dum annona nostra defecisset, maturè tamen satis è Podoliâ succenturiata subsidia, licet integram ibidem annum morata, subvenissent. Sed ab abundantia commeatus qua salus?

Quando devictis sita res in cuspide ferri est,

Vivantne an tristi exitio absumantur Achivi?

(7.) Porro libuit Ill<sup>ma</sup> C<sup>ni</sup> V<sup>a</sup> turrium & tectorum ruinam ceu ridiculam causam animorum consternatorum & subsequente deditionis nobis affingere; cum tamen ex tot literis nostris clarè perspexerit, vix mulierculas aut minorennes nostros isto ruinarum vel tectorum fragore perterrefactos fuisse, nedum ut nos admodum commoti simus; licet continuâ majorum tormentorum terribilia fulmina, tum ignitorum globorum & grandiorum lapidum

ejaculatio, haud parum damni Civitati dererint. Sic autem statuatur Ill<sup>ma</sup> C<sup>do</sup> V<sup>a</sup> hanc continuam tormentorum dislosionem, etiamsi adibus nostris solo æquatis, imbelli cœtur necessitas in subterraneas cellas ac specus migrandi imposita fuisset, minimè causam deditionis fuisse, nisi (quod ipsamet Ill<sup>ma</sup> C<sup>do</sup> V<sup>a</sup> innuit) cuniculi artificiales subtus propugnacula Civitatis nullâ ratione à nobis prohibendi, tum violenta in munitiones extremè quassatas irruptio cervicibus nostris jamjam imminens, & qua illam consequi solent, infinita mala, quibus virium nostrarum imbecillitas respondere minimè poterat, animos nostros terrore non vano perculsos ad deditionem inclinasset.

(8.) At non primi (Ill<sup>ma</sup> C<sup>do</sup> V<sup>a</sup> regerit) Rigenses hoc genere oppugnationis sunt petiti. Verum hoc quidem & fatendum est; sed nec id falsum aut diffitendum, non primos esse Rigenses, qui cuniculis expugnati & victi sint. Hic Ill<sup>ma</sup> C<sup>do</sup> V<sup>a</sup> nos insinuat, quod contrariis cuniculis hostiles non everterimus! Facile est linguâ consilia jactare sua, carpere aliena, sed manu prestare difficile. Non defuimus officio nostro, pro virium nostrarum modulo, ut in reliquis rebus ad defensionem civitatis parandis, ita in hoc hominum genere conducendo, & laboribus continuè mancipando, quibus diu multumque hostiles machinationes in hemicyclo inferiori ad portam arenosam elusimus.



Quod autem hostis noster artificibus cuniculariis aliisque instrumentis & adminiculis instructior, nos numero, firmitate & celeritate superaverit, nulla hic nostra culpa est. Quod aquilam accipiter, Sveciam Riga viribus & potentiam non aequet, neutri crimini dari posse obvium est.

(9.) Quid ultra? Hæc culpa, hoc crimen est, Ill<sup>ma</sup> C<sup>do</sup> Va nobis insultat, quod unius saltem mensis & septimane spacium obsidionem toleraverimus: Nos verò inde coniecimus, Ill<sup>m</sup> C<sup>m</sup> V<sup>m</sup> nondum esse de his rebus rectè edoctam, nec percepisse, quanto cum impetu hæc aquilonaris tempestas in civitatem incubuerit, quamque gravis fuerit humeris sub onere fatiscientibus: si ipsamet Ill<sup>ma</sup> C<sup>do</sup> Va hic fuisset, aliter sentiret, certè patientiam suam satisfecisset. Non est quod temporis brevitatem vel dierum numerum, sed periculi magnitudinem & hostilis exercitus robur computet, justamque estimatione ponderet. Ipsamet Ill<sup>ma</sup> C<sup>do</sup> Va in castris suis trans Dunam, non quinque septimanas, non quinque dies, sed vix octodecim horas, vi majori & periculi metu ita jubente, commorata est! Et nobis vitiovertere non veretur, quod necessitati, quæ in quinque septimanis ad extremam lineam assurrexit, cedere coactissima? Jam si quis miretur, quod alteras quoque septimanas quinque interitus nostri paroxysmum non sustinuerimus, miretur ille & hoc, & accuset egrotos, quod periculoso & vehementi morbo correpti, septimo, nono vel undecimo die vitam claudant, nec ad vigesimum vel trigesimum diem supervixerint.

(10.) Et

(10.) Et licet sint quadam urbium, ut Ill<sup>ma</sup> C<sup>els</sup>. Va nobis objectat, quæ vim hostilem superarunt: nunquid etiam non meminit Ill<sup>ma</sup> C<sup>do</sup> Va multò plura recenseri urbium exempla, quæ nostrâ longè munitiores, milite atque omni apparatu instructiores, hostibus non aequè potentibus victas manus dederunt? Nobis quidem id jure gloriarì licet, si nulla unquam civitas, certè nostram inevitabilis fati violentia & necessitate adactam, ac summas in angustias detrusam, deditiois justissimam causam habuisse. Nec dubitamus, si vel optimus belli Dux vel Hectori similis nobis adfuisset, eum, cognita periculi magnitudine, maturius ad hæc ipsa remedia expedienda salutis publicæ fuisse descensurum. Nos enim quod usque ad ultimum temporis articulum desperabundis similes negotium traxerimus, ac spem contra spem conceperimus, simplici quadam & ingenuâ fiduciâ, fidem erga Rempub. Polonam illasam conservaturi, inducti sumus: sed & retinendi pristini commerciorum usus & libertatis studium; partim etiam tantarum machinationum ignoratio audaciam nostram obfirmavit.

(11.) Atqui instat Ill<sup>ma</sup> C<sup>do</sup> Va & immeritò culpam in nos rejicit, quasi non satis de tantâ, quæ nos premebat & animos despondere cogebat, necessitate a nobis commota sit; alioquin se etiam capitis sui periculo nobis succursuram fuisse! Prob Deum atque hominum fidem, quæ hæc accusatio est? Testamur oculos auresque Ill<sup>me</sup> C<sup>nus</sup> Va arctif-



De arduissima obsidione, Et tonitruum hostilium iudices;  
testamur tot nuncios Et creberrimas literas nostras, quas,  
dum via patebat, Et satis grave Et factu difficile erat,  
eo nomine ad Illm Cm Vm misistavimus. Quid verò  
responsi, unde spem certam auxilii subventuri caperemus,  
tulerimus, testes sunt ipsa, quae diligenter à nobis asservan-  
tur Illma Cnis De litera. Sub adventum hostis Illma Cdo  
Va Vizunis die  $\frac{3}{13}$ . Augusti, scripsit, se proxime sequenti  
septimanà infallibiliter in castra venturam; quae autem  
Et ubi, non exprimit. Postea cum hostis advenisset, ite-  
rum scribit Illma Cdo Va ex eodem loco die  $\frac{6}{16}$ . Augusti, se  
absq; omni dubio prima castra in Curlandià ad Dunam ri-  
pam posituram. Deinde cum Birzas reduisset, pollicetur  
Illma Cdo Va die  $\frac{11}{21}$ . Augusti, ut in prioribus quoq; literis  
sape promisit, se ducentos pedites vel haydones (quos ta-  
men non vidimus) nobis auxilio, si cuperemus, missuram,  
in reliquis quoq; nobis operà Et studio suo non defutu-  
ram, ac in castra (quorum locum tamen non exprimit)  
quam primùm venturam; interim se doceri vult, quid  
hostis agat aut moliat. Porro cum apud Barbara fa-  
num copias colligere cepit, literas mittit die 3. Septemb.  
stil. nov. scriptas, se brevi nobis Et hosti conspiciendam se  
praebituram; id quod accidit, sed conspectus ille non diu  
duravit, plusq; tristitia reliquit quàm gaudii attulit.  
Tandem post suum recessum Illma Cdo Va die  $\frac{30}{10}$ . Augusti  
Septemb.  
ex ca-

ex castris Skaddiensibus scribit, quae litera  $\frac{4}{14}$ . Septemb. die  
nobis primùm redduntur, cum hostis ad Dunam viribus  
ac firmitudine loci sit superior, se copias majores collectu-  
ram ac redituram esse: diem tamen, quo Et quantis cum  
viribus ventura sit non exprimit. Deinceps autem cum  
ob interclusa itinera literas vel nuncios mittere prohibiti  
fuimus, nihil literarū ab Illma Cne Va accepimus. Non in-  
ficiamur optimo animo Illm Cm Vm fuisse affectā, Et uti an-  
teā, ita nunc quoq; communem salutem Provincia defen-  
sam voluisse; sed quia tantū virium colligere non potuit,  
quae hosti ad Dunam munitissimis castris firmato aquā  
proportionem responderent, prudenter sibi Et Reipub. con-  
suluisse, nec tam gloriolam suam quàm publicam salutem,  
quae in Illma Cne Va Et in milite consistebat, spectasse; id  
nimium considerando, semel tantum in bello peccare li-  
tere: ac si forte in praelio miles Illma Cnis Va occubisset,  
latam hosti fenestram patefactum iri in Lithvaniam Et  
Curlandiam excurrendi. Quis sit autem, quod similes  
rationes nostrae in simili ac forte majori periculo apud Illm  
Cm Vm locum non inveniant? cur sceleris ac perfidia lo-  
co habetur, quod hoste longè inferiores, Et tanquam inda-  
gine undiq; clausi Et inter malleum Et incudem consti-  
tuti, id remedii genus salutis servanda gratia elegerimus,  
quo à certissimo interitu nos Et universam Civitatem,  
uxores liberosq; vindicaremus. An tam vilis precio à  
Cne Va aestimamur, ac si sanguis nostrorum omnium, non  
O eadem



eâdem dignatione à D<sup>eo</sup> ac Christiano orbe censeretur, quâ stipendiarii militis? certè id nemo nobis persuadebit.

(12.) Tandem in victoris clementiam nostris literis deprecatam nos deliquisse Ill<sup>ma</sup> C<sup>do</sup> V<sup>a</sup> argutatur, quasi eâ fretis ira victoris minus formidanda atq<sup>ue</sup> adeò tam festinata deditio deproperanda non fuisset! Sed verba sunt in publicâ calamitate miseros & oppressos subsannantis; nec opera precium in confutandis istiusmodi cavillationibus facturi sumus. Nam in summis angustiis & manifestâ virium inopiâ, potentissimi hostis extremam patientiam tentare, spretâq<sup>ue</sup> oblata misericordiâ iram armatorum in se concitare, id verò extrema dementiæ est. Perstat igitur solidum ac immotum veritatis fundamentum, à nobis summâ vi oppressus ac planè derelictis nihil commissum esse, cuius non possit coram D<sup>eo</sup> & universo orbe ex politicis & militaribus legibus reddi expedita ratio; siquidem ea urbium & castellorum, ut cunq<sup>ue</sup>, sunt munitissima, ratio est, ut, si à potentiori hoste labore non interrupto & indefinente oppugnatione premantur, ac undique arctissime cincta subsidiiis prohibeantur, in potestatem oppugnantis veniant necessum sit.

Nunc superest, ut rationes Ill<sup>ma</sup> C<sup>nis</sup> V<sup>e</sup> examinemus, quibus probare nititur, auxilia Regis ac Respub. submissa esse. Primò asserit Ill<sup>ma</sup> C<sup>do</sup> V<sup>a</sup> in Comitibus publicis ea esse decreta; Fatemur equidem; quippe de iisdem per Responsa publica nunciis nostris data, tum per varias literas

Regias

Regias in Civitatem missas benè sperare subindè iussimus; sed sperare tantum: Quæ enim decretorum executio? quæ arcium praesidia? quæ subsidia contra vim obsessis suppeditata? Ipsamet Ill<sup>ma</sup> C<sup>do</sup> V<sup>a</sup> literis suis Vilna die 4<sup>to</sup> Julii datis queritur, grave sibi, imò impossibile esse exiguas copias, nedum justum exercitum, in hoc rerum statu colligere.

(2.) Sed Ill<sup>ma</sup> C<sup>do</sup> V<sup>a</sup> quicquid hîc in ferendo auxilio mora culpæ intervenit, totum in hostem bellum integro triennio contra nos preparatum occultantem, & Commissarios in Tractatibus ludentem rejicere satagit. Quid ad nos? Regia M<sup>tas</sup> hanc causam dicat: Utinam verò Poloni in preparandis defensivis, maxime sub exitum induciarum, armis sollicitudine suâ hosti respondiissent, fortè in tantas miseras tristissima Livonia & Civitas nostra conjecta non fuisset.

(3.) Hæc Ill<sup>ma</sup> C<sup>nis</sup> V<sup>e</sup> de hoste est sententia: de nobis verò ferè non absimilis: Nimirum nos spem pacis literis quibusdam nostris fecimus; nos in causa fuimus, quòd copias Ill<sup>ma</sup> C<sup>do</sup> V<sup>a</sup> serò collectas serò in campum duxerit. Valde hîc errat Ill<sup>ma</sup> C<sup>do</sup> V<sup>a</sup>: In hanc enim sententiâ non meminimus, ullas unquâ à nobis ad Ill<sup>m</sup> C<sup>m</sup> V<sup>m</sup> literas missas esse, nec in Cancellariâ nostrâ conceptas servari scimus: Illud verò recordamur, multorum invidiam ac odia in nos concitata esse, quòd soli præter Ill<sup>m</sup> C<sup>m</sup> V<sup>m</sup> de pace desperavimus, atq<sup>ue</sup> hæc ratione inanum sumtum bellicorum atq<sup>ue</sup> injuriarum militis passim populabundi autores futuri essemus.



(4.) Quamvis item *Ilma Cdo Va* innuat, hac auxilia ingruente bello nobis submissa esse: tamen ex ipsis *Ilma Cnis Va* diverso tempore ad nos ante ac post deditiōem missis literis contrarium apparet; in quibus omnibus de difficultate copiarum constandarum queritur, spem autem de maioribus quotidie confluentibus facit: in iisdem quoque literis aperte fatetur, se tardè quidem, sed non serò, vigesimo scilicet ab obsidione die cum volitantibus vexillis trans *Dunam* sese conspiciendam praeuisse: tandem in literis ad *Skaddiam* eodem quo hinc discederet die scriptis, ostendit, nondum se virium satis habere, sed augmentum plurimum copiarum expectare. Hæc minimè consonant cum illà assertione, statim ingruente bello auxilia missa esse; ea enim nostra Civitati laboranti adesse, non aliis in locis periculo vacantibus hære debuissent.

(5.) Illa verò ipsa quæ è longinquo conspeximus subsidia, quid nobis profuerunt? non magis quam famelico panem, vel agroto pharmacopolium eminùs intuenti, quando re presenti frui non datur. Sanè gaudium nostrum de adventu *Ilma Cnis Va* in literis nostris gratulatoriis *Ilma Cni Va* magno cum periculo per stationes hostium noctu missis, exposueramus; plus autem solatii ex præsentia *Ilma Cnis Va* liberatione cepissemus: quamobrem petimus, quid animi haberet, quid postridie contra hostem tentandum, quidque à nobis præstandum putaret, nos certiores redderet; nos enim ad omnem casum paratos fore. Verum *Ilma Cdo Va* rem in eo cardine versari perspexit, ut postridie ce-

die celeriter pedem referre coacta sit, litera autem ejus in castris ad *Skaddiam* eodem die data, ob infesta itinera, non nisi quarto post die nobis redderentur.

(6.) Unde neque spes ea, quæ nos tot literis suis hucusque *Ilma Cdo Va* lætavit, potuit esse tam pertinax, cui tantà urgente necessitate ulterius inniti, aut tutò confidere possemus. Quæ enim hæc spei nostra anchora? auxilia esse in propinquo; exercitum *Ilma Cnis Va* augeri; propterea *Ilma Cni Va* *Dunam* recessisse, quia hosti non sufficeret, sed brevi cum majori exercitu esset reditura. Constat ex sacrarum literarum testimonio, Abrahamum quidem patrem credentium in spiritualibus celebrari, quod spem contra spem foverit; attamen cū capti vum fratrem suum *Lothum* ex *Regum* infidelium manu redempturus erat, non solà animi fide utebatur, sed 318. servorum suorum auxilio, sumtis armis, manus quoque movebat. Num efficaciorē fidem *Rigensibus* quàm Abrahamo *Ilma Cdo Va* tribuet? Utinam hostis fama adventuri auxilii deterreri à proposito potuisset, libenter spem indubiam ac tenacem aluissimus! Esto sanè si deditiōnem dies aliquot differre valuissemus (quod tamē in nostrā potestate non erat situm) quo pacto tandem *Ilma Cdo Va* nos undique firmissimis munitionibus circumvallatos è periculo eripuisset? cum longo post tempore, quo omnes copia sine dubio sub signis convenerāt, *Mitavia* à Rege duabus tantum universi exercitus partibus obsessa opem ferre nequiverit, nec iteratò ad pugnam provocata cum hoste ad castra usque *Ilma Cnis Va* progrediente configere, sed vi majori, quāvis



equitatu instructior, & patenti in campo securior periculo se subducere potuisset, cedere maluerit. Quā quidem in re Ill<sup>ma</sup> C<sup>do</sup> Va vires suas cum hostilibus conferendo, tempus, locum, occasionem, futurosq; eventus prudenter pensitando, tanquam cautus belli Dux, quod optimum visum fuit, delegit. Quo igitur jure nos reprehendit, quod dubia spei de auxilio in hanc usq; horam non subventuris frustra innixi, crudeli temeritate extrema periclitari, atq; in vastam exitii voraginem nos precipitare abhorruimus?

(8.) Neq; est quod Ill<sup>ma</sup> C<sup>do</sup> Va nos insimulet, ac si paucitatem copiarum suarum despexissemus, ac DEI prasidio justaq; causa minus essemus confisi; Ex omnibus enim actionibus nostris liquet, plus nos fiducia in DEum quam ipsam Ill<sup>m</sup> C<sup>m</sup> V<sup>m</sup> collocasse, qui vitam ac sanguinem multo tempore cum interitu multorum virorum bonorum impendimus, tū Ill<sup>m</sup> C<sup>m</sup> V<sup>m</sup> licet parvā manu armatam constanti sollicitudine accersi vimus. Quin ipsa met Ill<sup>ma</sup> C<sup>do</sup> Va in causā politicā non nisi cum ratione DEo confidit, nec temerē tam exiguis copiis cum valido exercitu configendum, sed meliori tempore & fortuna ad usum Reipub. prudenter se reservandam censuit. Cur ergo nos ceu sensus communis expertes nudis promissis & spei frustranea tamdiu inniti oportuit, donec propugnacula Civitatis per cuniculos in aërem disiecta, urbs quoq; incendio, caedibus ac rapinis vastata direptaq; fuisset? E si  
autem

autem hanc fiduciam nostram ipso facto liquido comprobata eventus sefellit; divinam tamen justitiam accusare Christiana pietas vetat: rursus à Repub. Polonā, Ill<sup>ma</sup> C<sup>ne</sup> V<sup>ra</sup> aut alio quocunq; accusari non meremur; quin omnia quae evenerunt, occulto & inperscrutabili DEI judicio committenda, & in silentio ac spe fortiter sustinenda arbitramur.

Tandem metum quendam Ill<sup>ma</sup> C<sup>do</sup> Va nobis improperat, qui ad deditionem nos perpulerit: Quod si muliebri aut puerili iste metus fuit, est certē, cuius nos meritō pudeat; sin talis, qui in constantē & fortissimum quemq; cadere solet, & ad eadem consilia conjugere eos nō rarō iussit, injuria est, quod Ill<sup>ma</sup> C<sup>do</sup> Va ignominia notam nobis inurere & nos eādem operā incusare non veretur, quod impiā Phocensium desperatione ac stolidā ferocia, uxores liberosq; diripiendos, trucidandos, aut perpetuā servitute opprimendos, furenti militi non propina verimus:

Dulce & decorū est pro patriā [non cum patriā] mori. Si eodem nos quo Ill<sup>ma</sup> C<sup>do</sup> Va affectu duceremur, justius Ill<sup>ma</sup> C<sup>ni</sup> V<sup>e</sup> metus objici posset, idē, quod haud diu ultra Dunam morata, nunquam reversa, periclitanti Mitava opitulata non sit, pugnam deniq; cum hoste detrectaverit: sed conscientia nostra & prudentissimorum virorum judicia non permittunt, siquidem Ill<sup>ma</sup> C<sup>ni</sup> V<sup>e</sup> prudentia hoc imputandum censemus; ac similem vicissim censuram apud Ill<sup>m</sup> C<sup>m</sup> V<sup>m</sup> jure merebamur.

Summa



Summa ergo ab Ill<sup>ma</sup> Cne<sup>Ura</sup> injuriâ afficimur, literis ac dictis ejusdem incisi, ac si urbem ultro, præcipiti metu, nullâ urgente gravi necessitate, nec præmonitâ Ill<sup>ma</sup> Cne<sup>Ura</sup>, obliti nexus ac sacramenti fidei, Regia M<sup>ti</sup> & Reipub. Polona debita, ruinam turrium ac adium evitaturi tradiderimus, fortitudinis ac constantia pristina immemores, castitatem & integritatem fidei nostræ amiserimus, ac decantata merita nostra obscuraverimus.

Hæc talia ab Ill<sup>ma</sup> Cne<sup>Ura</sup> sub subarato pristina amicitia auro, ac fucata imò etiam in ipso literarum Ill<sup>me</sup> Cnis<sup>Ura</sup> vestibulo resignata benevolentia pallio, jactata in improperium nostrum per calumniam crimina fronti nostro inuri non patiemur, eaq<sup>ue</sup> aquo animo ferre nec possumus nec debemus; quin Ill<sup>m</sup> Cn<sup>Ura</sup> aliosq<sup>ue</sup> omnes, qui eandem cantionem concinunt, apertâ contradictione redarguimus, quippe qui sub veritatis & innocentia clypeo satis nos tutos esse scimus. Quemadmodum enim Regi & Regno Polonia fidem hucusque nostram integram illibatamq<sup>ue</sup> conservavimus, quantumvis supra viginti & duos annos, belli alieni, & à nobis non excitati ingentia mala & calamitates, aliis interim urbibus questum & lucrum ex nostrâ perniciæ facientibus, perpessi simus: (quod præclara Regis & Reipub. Polonæ testimonia non pauca asserunt, & res ipsa palam loquitur) Ita in præsentī obsidione nunquam animos nostros subit, ab istâ fide & obedientiâ deficere. Et quidem hanc fidem concordia civium nostrorum, (de quâ fortasse multi in Poloniâ dubitant, Ill<sup>ma</sup> Cdo<sup>Ura</sup> verò U<sup>ra</sup> certò persuasa est,) comprobavit, quippe qua

pe qua in eo potissimum consistebat, quòd durante obsidione non per transfugam, non schedam ullam, imò ne verbalum quidem hostis de statu nostro edoctus fuerit, licet præmium mille talerorum ei, qui captivum vel alium quempiam statum civitatis nunciaturum exhiberet, propositum esset; excepto saltem quòd, præter pugnantes in cuniculis textorem captum, ante ceptos tractatus famulus militis cujusdam, & inter armorum serias Lotavicus puer transfugerint: quod ut laudem maximam nobis, sic summam hosti admirationem & simul anxietatem peperit.

Atq<sup>ue</sup> ab hoc fidei nostræ & constantia tetragono, non ulla animi fluctuantis affectio, non odium aut amicitia, non utilitas aut dignitas ulla, vel quidquid mortalia pectora movere solet, nos dimovere aut abstrahere potuit: sed solius ineluctabilis fati violentia ac præsentissima panolethria horror cum ingenti dolore nos abripuit, & vulsi, & Regis Sveciæ imperio subjecit. Hoc ipse Deus Opt. Max. omnes latentes animorum recessus perscrutans, in ultimâ illâ mundi disquisitione testabitur; tum per se quoq<sup>ue</sup> notoria esse putamus, quæ in luce clarissimâ, & oculis totius orbis gesta sunt, ut omnium bonorū & militia peritorum judicia non vereamur. Quin Regia M<sup>ti</sup> ipsa Dominus modo noster clementissimus, hæc fide & fortitudine nostrâ tantoperè fuit delectatus, ut, quamvis magnis sumptibus ac laboribus, inprimis verò tormentarij pulveris jacturâ immani, nec nō multorum insignium Officialium, tum militis numerosi sanguine hæc expugnatio sibi constiterit, tamen animo verè regio & excelso hanc virtu-



tem nostram cedro dignam iudicavit, & clarissimâ voce, sui ingressum urbis nos obtestatus sit, maiorem se fidem fortitudinem & obsequia à nobis non postulare, quàm qua Regi & Resp. Polona hæcenus & in hac ipsâ obsidione præstitimus.

Quamobrem utrum Respub. Polona vel Ill<sup>ma</sup> Cdo<sup>a</sup> Va, quæ & præsidio & subsidio non adfuit, de nobis; an verò nos de Repub. Polonâ ac Ill<sup>ma</sup> Cne<sup>a</sup> Va justiore conquerendi causam habeamus, videat & iudicet Dominus Deus & universi prudentes domesticis affectibus soluti.

Porrò non possumus non vehementer mirari, exprobrare Ill<sup>mo</sup> Cm<sup>o</sup> Um nobis, se ob favorem suum erga Civitatem, cujus merita in publicis Comitibus & alibi prædicaverit, multorum invidiam subiisse! Sic enim existimamus, id nos de Repub. Polonâ abundè à primo subjectionis, imò multo antè tempore meruisse: satis enim merita nostra tam Ordinū utriusq; status, nec non Nunciorum terrestrium Nobilitatis univ<sup>er</sup>sarum quorundam Jesuitarum, longè antè quàm nos mutuâ amicitia jungeremur, testimoniis & documentis comprobantur. Jam quòd Ill<sup>ma</sup> Cdo<sup>a</sup> Va ex quo bellum in Livonia, Dño Chodkiewiczio Moschoviticâ militiâ occupato, nomine Respub. gessit, nostra obsequia & auxilia, quibus jam antè & ejus in hoc munere antecessoribus adesse consuevimus, similiter experta est, eaq; ut par fuit, simul cum aliis commendavit, rem fecit excell<sup>sa</sup> suâ dignitate, tum ipsâ veritate dignam; ac si pristina fortuna mansisset, in hoc studio libenter perseverassemus. Nunc conscientiam nostram virtus & integritas perfectissima consolantur, nec cujusquam odium promeruimus.

Si qui

Si qui tamen fortè animo male volo in nos juerint, quorum cupiditates explere nequivimus, isti ingenii sui ductum secuti sunt; nobis verò accidit, quod vulgatam habet verberbum; Virtuti comes Invidia.

Cæterum, quam nobis Ill<sup>ma</sup> Cdo<sup>a</sup> Va malorum ex hac conversione oriundorum Iliadem ominatur, nos ipsi in consultatione dedenda urbis prævidimus; sed communis omnium nostrorum interitus, & inexorabilis fati, cui cuncta cedere coguntur, extrema necessitas, Dictatoriâ potestate consilium conclusit. Interim tamen de infinitâ Dei benignitate, qui ex tot malis insigne aliquod bonum pro suâ admirabili sapientiâ elicere potis est, non desperantes, patientissimis animis meliora expectamus: is enim fortè iram suam placatus nostriq; misertus avertet; adversariis verò nostris bellorum cupidis & innocentium perniciem machinantibus mala consilia & cogitationes in capita eorum rependet. Solet enim Deus per bellorū scivitiam utriusq; partis peccata plerunq; castigare. Non equidem negamus, partem calamitatum, quas Ill<sup>ma</sup> Cdo<sup>a</sup> Va literis suis recensuit, quæq; bellum comitantur, nos jam sentire: Veruntamen nihil sub Sole stabile est; & nulla Respub. fortunam ita faventem habet, in quâ membra suos non patiantur manes: nec sub Polonico imperio gravaminum & querelarum expertes fuimus; fides nihilominus & constantia nostra illibata permansit. Si præsidia toleramus, quæ jure regio ac suo sumtu victor Civitati imposuit! meminerimus, ad securitatem & levamentum civium nostrorum hoc pertinere; sanè militari disciplina juxta præscriptum or-



dinationis regia, quam Gubernatori suo discedens reliquit, adeo coercetur, ut aliquot mille militum, tam in Civitate quam in castellis circumjacentibus collocati, vix tantum molestia nobis creent, quantum jam ante pauci Haydones in arce Rigensi nidulati nobis inferre non dubitarunt. Quod si ex voto non omnia nunc succedunt! consolatur tamen nos solennis rerum humanarum vicissitudo à Deo ordinata, ubi prospera cum adversis, cum paupertate divitiae, valetudo cum morbo, cum bello pacis felicitas non Riga tantum, sed in universo orbis theatro in vicem commutantur. Si fortunarum nostrarum jacturam fecimus! Et Germania, Gallia, Hungaria, Bohemia, Austria, Polonia, Belgium, atque regna cetera exempla infinita variantis fortuna nobis suppeditant, quae plurimos virtute, divitiis et honore excellentes viros supra civilem sortem evectos, proximis annis de summo felicitatis gradu, ad pauperiem extremam deturbavit, imò non paucorum ades ac pradia, uxoribus atque liberis immaniter trucidatis, plerique in barbarorum servitutem abductis, igne ferroque devastavit: nam Deus in caelo habitans, terrarum orbem iustitiae et aequitate moderatur, nec personarum rationem habet. Esto Rigenses aliquot cives amissas suas opes qualescunque nunc lugere! certe illustres viri Senatorii Ordinis sortem suam querulam voce aliquando deplorarunt: Si commerciorum usus cum Russis Lithvanis et Curlandis turbabitur et in damnum Civitatis imminuetur! equidem ipsi quoque, qui à quatuor jam seculis Rigensium commerciorum utilitate fructi sunt, haud dubie parum emolumenti inde reportabunt:

Si peri-

Si periculum nobis à Polonia Regno imminet! profecto Magno Ducatui Lithuaniae et Curlandiae (cujus invasio praeter meritum nobis à quibusdam affingitur) non minora à Suecia Rege impendent pericula: Si paupertatis onere gravabimur! sanè Lithvani vel Curlandi divitias non cumulabunt: Nondum est Civitate nostra Deus et fortuna planè exultatum abut; supersunt et hic etiamnum divinae benedictionis semina, cujus fructus mirifice succrescentes gratà subinde mente, quantum satis est, decerpimus;

Ceterum quam in literis suis Ulmae Cado Va pingit triplicem felicitatis differentiam, ceu mirabilem et vix refutatione dignam, non admodum moramur, divinae legis et rationis humanae normam secuti. Quod si felices laudeque digni sunt, qui fortiter pro patria occubuerunt! quidam et illi, qui vitam sanguinem pro communi salute profundere paratissimi, divinam tamen providentiam ad majores Reipublicae usus conservati sunt? Sanè utrisque laudatarum gentium more et instituto praemia ac honores sunt decreti. Illos verò, qui ab omnibus tractatibus puros ac immunes animos retinuerunt, prorsus ignoramus: Nam in hoc gravissimo negotio nihil clam, sed omnia aperte, in publicis consiliis tam Praetoris, quam utriusque civium Collegii more antiquissimo sunt acta, consultata, cum praesentibus quoque Nobilibus et Officialibus Regiis communicata, ac unanimi omnium consensu definita et conclusa. Quod si quis aliud in linguam promptum, aliud in pectore clausum habuit, summi quoque periculi tempore dissimulandi artificii usus est, ubi dissimulationi nullus est locus, minime felix is est censendus, sed gravissimam



visissimam reprehensionem incurrit. Jam nullo modo conscri-  
entia inquinatur, cum ad prescriptum diuini ac humani ju-  
ris, Et juxta optimarum gentium exempla, vi majori imbe-  
cilliores cedunt, honestissimisq; conditionibus salutem pacif-  
cuntur. Exempla omnis a vi pro nobis faciunt; qua si allega-  
re liberet, facile demonstrari posset, vix sub Sole regnam aut  
dominium fuisse, quod a potentiori suo tempore non fuerit su-  
peratum, Et ubi victi gravissima quaq; perpeffi, pacem pecu-  
nia vel quacumq; ratione non redemerint. An verò inter  
felicissimos numerandi sint, qui cum uxoribus ac liberis e Ci-  
uitate migrarunt, omnes sanã ratione praditi iudicent. Atq;  
ut maxime ad exemplum paucorum, qui in mutuo commer-  
ciorum usu omnes fortunas suas Reipub. Polonia incolis cre-  
diderunt, urbe excessissemus, quorsum tandem migrandum  
nobis fuisset? Valde periculosum est, robustissimo in rebus  
humanis fato reluctari; ac procliuus, vetus domicilium Et  
fortunarum reliquias deseruntur quàm recuperantur, quippe  
extra RIGAM ubi aliam RIGAM reperiamus, plane nesci-  
mus. Sed quidni etiam vicinis gentibus aequè graue Et incom-  
modum futurum esset, si veteres hinc migrassent coloni, Et  
soli Sveci Civitatem insedissent? Satis est ad extremum di-  
scriminis articulum, neglectis omnibus fortunis, fidem con-  
stantissimè cultam etiam sanguine obsignasse: Nunc per vim  
majorem Sermi Sveciae Regis in viti a Reipub. Polonia corpo-  
re, qua nobis ex pacto tutelam debebat, diuulsi, Et nexu obli-  
gationis reciproca, secundum omnium gentium jura Et exem-  
pla soluti, reliquias DEI beneficio conservatas deserere, aut  
relictis

relictis patriis laribus, in quibus salvã conscientia Et hono-  
re degere ac manere datum est, caeca animi cupiditate sponta-  
neum exilium amplecti, atq; alienã misericordia nixi, vitam  
inopem sustentare non tenemur.

Hac omnia paulò uberius Illma Cui De perscribenda ideo  
duximus, ut innocentia Et existimatio cum primis nostra  
vindictetur, omniumq; ob oculos ponatur, tum ut Illma Cui De  
Et reliqui ad quos hoc bellum spectat, paulò altius rem pen-  
santes, omni cura Et sollicitudine tandem in salutem com-  
munem incumbant, quò bello funestissimo supra viginti duos  
annos patriae viscera depascenti aliquando finis imponatur,  
pax Et concordia stabiliatur Et sanctè seruetur. Quam  
quidem ad rem cognitã voluntate Et mandato Illma Cui De  
commisso, pro tenuitate nostrarum partium, tanquam in causa  
communis salutis, omnem laborem, operam studiumq; no-  
strum libentissimè conferemus, prout in ipsa deditiois for-  
mula, fidei nostra tum nondum obliti, pacti sumus, viamq;  
ad pacificationem Et concordiam mutuam stravimus. Alio-  
quin uno isto excepto casu, nobis, qui inevitabili diuino fato  
in fidem ac deditioem Sermi Sveciae Regis concessimus, ac so-  
lennis iurisjurandi religione fidelitatem firmavimus, picta-  
te ita jubente decretum est, eadem quã antea Polonia, nunc  
Sveciae Regem Et Rempub. devotione ac veneratione pro-  
sequi, Et in omni fortuna penes eundem non minori cum lau-  
de Et honore perseverare, neq; ulla in re contra officium Et  
conscientiam nostram Regno Polonia nos obligatos vel ob-  
noxios profiteri. Nam ut nullo scelere vel fraude ad Reg.

Mm



*Item Svecia Dominum modò nostrum clementissimum transivimus, sic nullà perfidià vel maleficio ad vos ut unquam redeamus, licet id in potestate nostrà situm esset, aut impunè fieri posset, permoveri nos aut induci patiemur, sed divinam providentiam sequemur. Non ea calami subsidia promittentis vis fuit, ut pessum cunctes servaret; non erit etiam blandientis aut minitantis, ut nos in aliam ditionem translatos vincat aut recuperet.*

*Quamobrem summo studio Illust. Cdm Vam petimus, ab istiusmodi consiliis et machinationibus, quæ nec ipsius nec nostræ ingenuitati conveniunt, sibi temperet, literas clàm mittere superseadeat, nec quempiam nostrorum hominum à virtutis et justitiæ tramite devium in miserias exitiumq; præcipitet; Sic verò existimet, quicumq; nuncius cum clandestinis literis et mandatis subordinatus in Civitatem deinceps venerit, excepto, qui lege et more militari cum mandatis apertis missus fuerit, tubicine, gravissimâ poenâ tam venientis temeritatem, quàm spargentis levitatem punitum iri. Captivos quoq; Illust. Cdo Vra quos dimittit, contra morem militare illicitis pactis ad ea minime obligabit, quæ Christianam consuetudinem ac castrensem disciplinam lædant. Tandem ita Illust. Cdo Vra statuatur, non alio animo hanc scriptionem, quàm pro vindicando honore atq; existimatione nostra susceptam esse.*

*Quod superest, DEum immortalem oramus, ut salutaria consilia Regi et Ordinibus Poloniæ inspiret, ut pax fugitiva aliquando revocetur, gladius fuso tot innocentium Christianorum sanguine madens, ad cuius mentionem cohorrescimus, in vaginam reconcidatur, cognatorum Principum concordia firmetur, miserrimorum subditorum, qui reliqui sunt, quieti consulatur; Sic domus et familia Principum floreant, divinæ benignitatis rore crescant, inter duo Regna perennis tranquillitatis et amicitiae iura ac vincula consolidabuntur, omnesq; eorum cives à tantis tempestatibus, in mutuâ utilitatum et communicatione, ac gaudiorum societate, Christianâ charitate conglutinatis animis, pacis in portu quiescant, ac perpetua vota pro salute Principum, supremo Principum Domino, in quo omnes vivimus ac movemur, indefinenter nuncupabunt: Sic deniq; Illust. Cdni Vre pristinae observantiae nostræ officia constabunt; Quam benè valere optamus.*

*Datæ Rige die quarta mensis Februarii Anno Christi pacis auctoris,*

*Millesimo Sexcentesimo Vigesimo secundo.*

1620





II List. Ruff.  
by Provinciar.  
Leon.



